

જટાયુ

ડૉ. અમરેન્દ્ર

जटायु

अंगिका उपन्यास

जटायु
अंगिका उपन्यास

लिखनियार
डॉ. अमरेन्द्र

प्रकाशक
मनप्रीत प्रकाशन
दिल्ली-जालंधर

© Dr. Amrendra

प्रकाशक : मनप्रीत प्रकाशन

शॉप नं. 7, 12/190,
गीता कॉलोनी,
दिल्ली-110031

संस्करण : सन् 2005

मूल्य : 125 रुपये

रेखांकन : प्रभाकर

शब्दांकन : उमेश लेजर प्रिंट्स, दिल्ली-110032

दूरभाष : 011-282 1174

मुद्रक : बालाजी ऑफसेट, दिल्ली-110032

JATAYU (Angika Novel) By Dr. Amrendra

मित्र

वेद प्रकाश वाजपेयी

के

जेकरो स्मृतिये आवे हमरो पास शेष छै ।

पुरवा के झोंका सें आरी के किनारी-किनारी झबरलों निसुआरी के गाछ सिनी हेने झूमी रहलो छेलै, जेना महुआ रो निसांव ओकरो माथा पर चढ़ी गेलो रहै । पुरवा जेन्हें कुच्छु तेज हुवै कि निसुआरो एक-दूसरा सें लिपटी-लिपटी बाँसुली के सुरो में गीत गावै लागै छेलै । आकि हेने लागै, जेना निसुआरी के बीचों में बैठी कोय बाँसुलिये टेरेतें रहे—छिनमान मोहनावाला बाँसुली । सुनहैं तन-मन बेसुध करी दै वाला—एकदम चितचोरवा संगीत । पुरवा रुकै तें बाँसुलियो बजवों रुकी जाय, जेना बजवैयां बाँसुली में दुबारा फूँक मारै लें दम खींचते रहे आरो एक क्षण वास्तें हठाते सन्नाटा पसरी जाय छेलै ।

गोधूली बेला होय में आभी आरो कुछ देरी छेलै । मतरकि भगवान विश्राम लै लें तेजिये-तेजी पच्छिम दिश भागी रहलो छेलै, आपने धुनो में—झपकलों आँखी सें । गाँव के पिछुलका बाँधों पर को, कै पुस्तों सें खाड़ों बुढ़वा बरों के गाछी पर चुनचुन चिरैयाँ के झुंड बंधे लागलो छेलै । जत्तै चिरैया, ओल्लै रँ के आवाज । जेना एक्के साथ हजारो तबलची सब्भे तालों में तबला-डुग्गी ठोकवों शुरू करी देलें रहे । कि तखनिये ताड़ों गाछों के डमोलों एहँ जोरों सें खड़खड़ाय उठलै कि दीपा के तें जेना जाने निकली गेलै । जानो रो मोह आदमी के एकदम प्राकृत अवस्था में लानी दै छै, विवेक-ज्ञान के सब बान्हन के तोड़ने-ताड़ने । आदमी के बनावटी संस्कार तखनी आदमी के दुमड़िये नाँख अलोपित होय जाय छै । दीपाहौ के कुछ हेने स्थिति तखनी भै गेलो छेलै । हुन्नं डमोलों के खड़खड़ैवों आरो हिन्नं जेना पीपर के भीजलों-कोमल पत्ता उड़ी के दीवाल सें सट्टी गेलो रहे, दीपाहौ विधाता सें होन्हें चिपकी के रही गेलै ।

एक बारगिये जेना प्राणों के सब सितार बजी उठलो रहे, ठीक होन्हे विधाता के एक क्षण वास्तें लागलो छेलै । ओकरा लागलो छेलै कि ओकरो देहों में कोय अबुझ राग बाजी गेलो रहे—अपने आप, जेकरा सुनी ऊ एकदम बेसुध होय गेलो छेलै । कुछ क्षण लेली तें वहू मूर्तिये बनलो रहलै—जानी-बुझी के । आरो फेनू विधाता आपनो बोली के कल्ले कोमल करी दीपा सें कहलें

छेलै, “अरे, डमोलों खड़खड़ैलै । यै में डरै के की बात छै । कोय गिद्ध-चिल्ह बैठलों होतै, आरो की ।” आरो वैनै रूई वाला स्पर्श सँ दीपा केँ अलग करी देलै छेलै ।

विधातां आँख उठाय केँ डमोलों दिश देखलकै, एक गिद्ध आपनोँ डैना समेटतें एक डमोलोँ पर बैठे के कोशिश में आभियो इस्थिर नैं हुएँ पारी रहलोँ छेलै । सायत चिढ़ैय्ये लेली विधातां दीपा सँ हँस्सी केँ कहलै छेलै, “झाँसी के रानी, जरा ऊपर देखोँ, गिद्धे छेकै, तोरो टोला के परसवन्नी में नांगटे नाचै वाली सिंगारी भुत्तिन नैं ।”

आपनोँ इस्थिति आरो विधाता के बातें तेँ दीपा केँ एकदम लाजोँ में गोती केँ राखी देलकै । ऊ लाजोँ सँ एकदम टुहटुह लाल होय उठलै, जेना एक क्षणोँ लेली परासो केँ मात दैलै तैयार भै गेली रहै । जे देखी एक क्षण वास्तें विधाता पत्थल बनी गेलोँ छेलै । आँख फाटले के फटले रही गेलै । ओकरा हेनोँ लागलोँ छेलै, वें एक नैं, बल्कि खिललोँ पलासोँ के जंगल देखलै रहै । विधाता के आँख अपने आप एक क्षण लेली बन्द होय गेलोँ छेलै । कि तखनिये दीपा के नजर विधाता पर पड़ी गेलोँ छेलै, “अरे तोरहूँ गिद्धा सँ डोँर लागै छौं ?”

आरो दोनोँ आपनोँ-आपनोँ जीत के सवाद चाखतें हँसी पड़लै, जेना पागल पुरवैया के छूला सँ निसुआरी सिनी फेनू बाजी उठलोँ रहै ।

कि फेनू वही खड़-खड़ । दोबारहै नैं, तीन-चार बार खनै-खन में ।

“बाप रे बाप, है एत्तेँ गिद्ध एक ताड़ोँ पर । की रँ के असगुनिया बोली निकाली रहलोँ छै ।” दीपां सामान्य भेतें कहलै छेलै ।

“आभी तेँ चारे-पाँच नी ऐलोँ छै । गोधूली आरो गिरेँ दौ । एक-एक डमोलोँ पर दू-दू गिद्ध बैठी केँ आवाज करै छै । कभी तेँ एक-दू आरो कखनियो सब एक्के साथ । घरोँ में घुसल्लहौ पर थिर नैं रहै देल्लौ ।” कहतें-कहतें विधाता हठाते गंभीर होय उठलोँ छेलै ।

“तेँ है यहाँ पर पोसी केँ राखलोँ छौ कथी लेँ ?”

ई बात दीपां गंभीरता केँ तोड़है लेली कहनेँ छेलै आरो वही भेलै । विधातां हँसते हुएँ कहनेँ छेलै, “तेँ की हमरा सिनी आबेँ गिद्धे-चिल्हा पोसै छियै ? सुग्गा-मैना सँ हमरा सिनी केँ दरेस नैं छै की ?”

“है सब बात तेँ ऊपर बैठलोँ मशानोँ के मेहमानें बतैथौं ।”

“ई मेहमान तेँ ई गामोँ में आठ-दस बरसोँ सँ ही दिखाय पड़ेँ लागलोँ छै, नैं तेँ यहाँकरोँ लोगें की एत्तेँ-एत्तेँ गिद्ध के बासो जानवो करै छेलै । नैं कल्याणी के समाधि बनतियै, नैं ई मशानोँ के मेहमान यहाँकरोँ वासिन्दा ।”

“कल्याणी के समाधि ?” दीपा हठाते चौकी उठलौं छेली ।

“हौं, है सब बात तेँ तोरा मालुमो नैं होथौं.....एगारोँ साल सें ज्याद्है के घटना भै गेलोँ होतै । तोहें तखनी गाँव छोड़ी दैलेँ छेल्लौ । तखनी तोरोँ उमिरो की होल्लौ, मुश्किल सें पाँच-छोँ साल । हम्मैं समझै छियै कि तोहे हरगौरी बाबा केँ सायत जानल्लै होभौ ।”

“नैं जानै छियै, मतरकि है कल्याणी के खिस्सा ?”

“वही तेँ बताय लेँ चाहै छिहौं । कल्याणी हरगौरी बाबा के बेटी रहै —एकलौती बेटी.....हौ, हौ-वहाँ देखौ, कुच्छु टीला नाँखि दिखाय रहलोँ छौं नी, वहेँ छेकै हरगौरी बाबा के कोठी । एक बीघा वाला कोठी । देखवैया के पाँच-पाँच थमवैया लागै—बस हेने । राजा-रजवाड़ा सें कम शान नैं राखै छेलै हरगौरी बाबा ।

“पर कहानी तोहें कल्याणी के कही रहलोँ छेलौ ।” दीपा जेना कल्याणी के कथा छोड़ी केँ कुछ सुनै लेँ तैयार नैं रहेँ ।

“धीरज धरोँ । कल्याणिये पर जाय रहलोँ छियौं । कल्याणी दस-बारह के भेलै तेँ कोठी के सब पूजा-पाठ के भार आपन्है पर लै लेलकी । एकदम पुजारिने भेषोँ में विहान-शाम । हौ, हौ देखी रहलोँ छौ नी, छोटोँ रँ के मठ । कोठिये के ठाकुरवाड़ी छेलै । वाँही कल्याणी भोरे-शाम प्रातकालिक आरो संझवाती वास्तें आवै छेली । आन्हें छेलै । झोंड़ पड़ें कि उठें बिन्डोवोँ । कल्याणी नैं रुकैवाली छेली । आरो एक दिन हेनोँ भेलै कि बिन्डोवो सें कल्याणी नैं बचेँ पारली ।”

“की, बिन्डोवोँ में ऊ कहीं उड़ियाय-पुड़ियाय दबी-मरी गेलै ।”

“बस हेने समझोँ ।” विधाता रोँ बोली हठाते भारी होय गेलोँ छेलै ।

“साफ-साफ बतावोँ नी, की भेलै कल्याणी केँ ?”

“कल्याणी उड़ियैतै-पुड़ियैतै की, ठाकुरवाड़ी के पुरहैतो जी के की दोष । कल्याणी केँ रोज भोर-शाम मंदिर में दीया जरैतें देखी केँ पुरहैतो के मनोँ में जोत जरी उठलै । छवारिके रँ तेँ छेवो करलै पुरहैत । मतरकि यहू बात कोय नैं जानै छेलै कि पुरहैतो के मनो में जोत तेँ बादो में जागलोँ छेलै, कल्याणी-मनो में वहेँ जोत, ऊ पुरहैत लेँ कहिया सें जरी रहलोँ छेलै । आरो एक दिन दोनोँ के इंजोर एह्लै बढ़लै कि मंदिर एकदम अन्हार सें भरी गेलै ।”

“ई तेँ पाप छेकै । समाज-परिवारो के विश्वास के प्रति छल ।”

“मजकि ऊ दोनो के नजरियो में की ई पाप-पापे छेलै, नैं कहलो जावेँ सकें । पाप तेँ मनो केँ दाबी अपकर्म करै में होय छै । मन खुली गेला पर वही पाप कहाँ रही जाय छै । ओकरा पुण्यो तोहें कहेँ पारोँ । प्रेम के प्रकाशन

कोय कमजोर मनो के कुव्वत नैं छेकै । प्रेम के पूर्णता दै वाला ऊ चट्टान नाँखि होय छै, जेकरो सीना सें पानी के सोत बहतें रहै छै आरो आपन्हें ऊ सोत सें सिहरतें रहै छै ।”

“मजकि तबे की भेलै ?” पता नैं की बुझी के विधाता के ई बातों के प्रतिवाद करलैं बिना दीपां आगू के बात जानै ले पूछले छेलै ।

“चलो, आगू के बात ठाकुरबाड़ी के नगीचे पहुँची के बतैभौं ।” आरो ई कही विधाता दीपा के आँगरी पकड़ी बान्हो सें नीचे खेतो के मेढो पर उतरी गेलो छेलै । उतरतें-उतरतें साड़ी में एकदम लटपटाय गेलो छेलै दीपा, मजकि एक वेर रुकियो गेली छेलै ।

लाल-लाल तपलो जेठ आबे पझाय पर आवी गेलो छेलै, आषाढ़ के एकदम नगीच । पर अभी बरसा नैं गिरलो छेलै । होना के आषाढ़ के आव-भगत लेली किसानें खेतो के बीचो-बीच, किनारी-किनारी सिरहोरी बनाय देले छेलै । आरी से उतरी के विधाता वहे सिरहोरी पर चले लागलो छेलै । चेपो के लाती सें हिन्ने-हुन्ने फेंकी के चलवो विधाता लेली एक अलगे सुख के बात छेकै । कोय कुछ बोले—बुढ़ैती पर लड़कौरी कहीं सुहाय छै, पर है सिनी बातों के असर विधाता पर होय वाला नैं छेलै । ऊ ते दीपा साथ छेलै, नैं ते सिरहोरी के सब चेपो खेतो में ढनमनाय गेलें रहतिये ।

सच्चे में चित्त चंचल करैवाला हेनो पुरवैया बही रहलो छेलै कि केकरो बच्चा बनी जैवो एकदम मामूली बात छेलै । खेतो के बीचो सें दोनों होने आगू बढ़लो जाय रहलो छेलै, जेना नहरी सें छुटलो पानी खेतो आकि काटलो खाड़ो के बीचो सें ससरी के सर-सर बहै छै । पुरबा ते दोनो ले जेना पंख बनी गेलो छेलै ।

“ठहरियो, ऊ गड्ढा दिश नैं उतरयो ।”

“से की ?” दीपा हठाते रुकतें पूछले छेलै ।

“ऊ गड्ढा नैं छेकै । अमृता सरोवर छेकै । देखौ, हौ भे रहलै ठाकुरबाड़ी आरो ठाकुरबाड़ी के सामना-सामनी वहे अमृता सरोवर के बचलो अवशेष छेकै, जै में ऊ पुरहैत के लोगें आखरी दफा वही बिहौती धोती पिन्ही के मतछिमतो नाँखि घुरतें देखले छेलै आरो फेनू कहियो नैं देखलकै । विश्वास नैं करभौ, विश्वास ते खैर हमरो नैं होय छै, मतरकि जे आँखी देखने छै, ओकरो बात केना के काटभौ ? बूढ़ो-पुरानो, काकी-दादी, केकरहौ सें पूछो ते बतैथौ कि यहें अमृता सरोवर छेकै, जैमें संझवाती जैरैला के बाद दोनों नैं नहाय के यहें ठाकुरबाड़ी में एक दूसरा के गल्ला में माला डाली देले छेलै । कल्याणी हठाते

कनियायं बनी गेलो छेली । फेनू जे कुकुआरो-बिन्दोवो गाँव में उठलै, तेँ यही गाँव की, गाँव के गाँव उधियाय उठलै । ई तेँ हरगौरी बाबू के रौब-दौब कहौ कि बिन्दोवो देखतहँ-देखतहँ ठडैय्यो गेलै । कल्याणी के माँगो सें सिनूर मेटाय के ओकरो बीहा कलकत्ता के एक छवारिक सें करी देलो गेलै । तेसरे दिन हरगौरी बाबू के आदमी कलकत्ता गेलो छेलै आरो दसवें रोज कल्याणी दोभियो होय गेलो छेली ।

“की कल्याणी नें तनियो टा विरोध नैं करलकै ?”

“यहे बात के तेँ दुख छै दीपा, कि कल्याणियो नें ठाकुरबाड़ी में आपनो बीहा के बादो में पुरहैतो के जोर-जबर्दस्तिये बतैनैं छेलै । ई तेँ पुरहैत-वध के पापे रो डोर कहो कि पुरहैत मार खाय्यो सें बची गेलै, नें तेँ कोय आन होतियै तेँ हड्डी-पसली-बोटी बालू, माटी बनाय के राखी देले रहतियै ।”

“आरो पुरहैत यहे डरो सें भागी गेलो होतै ।”

“एकदम नैं दीपा, एकदम नैं । मारो डरो सें भागना होतियै तेँ दूसरे-तीसरे दिन भागतियै, जबे कि पुरहैत के गायब होवो तेँ कल्याणी के बीहा के तीन साल बाद के बात छेकै, जबे कल्याणी ससुराल सें पहलो दाफी नैहर ऐलो छेली ।”

“ई बात तेँ हमरो समझै में आरो नैं आवी रहलो छीं ।”

“छे नी माथो चकराय वाला ? कारण जानियो लेवा, तहियो विश्वास नैं होतहैं । जिनगी में कभी-कभी हेनो घटना घटी जाय छै कि ओकरा समझना हजार बुद्धि के बाहर रो बात होय जाय छै । हमरो-तोरो बुद्धि के बात छोड़ो, आपना के बड़का वैज्ञानिक समझै वाला चुप होय जाय छै । हेना के कुछु-से-कुछु कारण बताय के केकरो मनो के शांत करी देलो जावे सकै छै, मतरकि कारण बताय वालाहौ सही कारण नैं जानै के कारण मनो सें खुदूदे बेचैन रहै छै । तबे लागै छै, ई दिखाय वाला दुनियाँ के शक्ति सें अलगा कोय शक्तिवान शक्ति छै जरूर-हेनो-हेनो दुनियाँ के व्यवस्था दे में एकेक निमिष एकदम सजग, तभिये तेँ एत्ते बुद्धि बढ़ी गेला के बादो, हौ नैं दिखैवाला शक्ति बड़का-बड़का पहाड़ के धूल के नम्रता सें भरतें रहै छै । जोँ है नैं होतियै तेँ पुरहैत आरो कल्याणी के हौ घटना केना होतियै ।”

“की होलै ?” दीपा के बेचैनियो सीमा तोड़ी देले छेलै ।

“बतैय्यो देलियो तेँ विश्वास नैं करभौ । वैंमें शहरो के हवा-पानी खेलो-पीलो आदमी के हेनो सिनी बातो पर विश्वास तेँ आरो नैं होय छै । होना के विश्वास करो कि नैं करो मतरकि है सच छेकै-तीन साल बाद

कल्याणी आपनो दुल्हा साथे आपनो नैहर लौटली छेलै, गोदी में आपनो जेठो बच्चा लेले । समुच्चा गाँव में कल्याणी के आवै के खबर मची गेलो छेलै । कल्याणी ऐलै ते लोगो के पुरहैतो के खयाल ऐलै । सही बात ते यहें छेकै कि कल्याणी के ससुराल गेला के बाद सें ऊ ठाकुरबाड़ी एकदम्में अछूत बनी के रही गेलो छेलै । कुमारी लड़की ते की, कोय बिहेलियो संझवाती दिखाय ले यहाँ ऐवो बन्द करी देले छै । हों, जोंन दिन कल्याणी ऐली छेलै, ऊ दिन दू-चार जोर-जनानी संझवाती के बहाना पुरहैत के देखे ले ऐली छेलै । ई गाँव के कोय बूढ़ो-पुरानो सें पूछी ला, सब्में बतैथों कि ऊ दिन केना साँझहै सें ऊ पुरहैत मतछिमतो नाँखि—ई जे सरोवर छौं नी, एकरहे चारो ओर तिरफेकन दिऐ लागलो छेलै । कभी ठेहुना भर पानी में दुकी के बैठी जाय, ते कभी मुड़ी टेढ़ो करी लेरुवे नाँखि छलांग मारी ठाकुरबाड़ी में घुसी जाय रहै । एकदम पगलाय गेलो रहें ऊ.....तखनी है रँ परपट नैं छेलै । तबें ठाकुरबाड़ी आरो ई सरोवर के हुन्नें दिश कोन-कोन रँ के ढकमोरलो गाछ नैं छेलै । कुछ ते हरगौरिये बाबू, ई ठाकुरबाड़ी सें जी उचाट होला के बादे, कटवाय लेले छेलै, बाकी गाछ हुनको पूत-पोता आरनी । कहै छै, पचासो आदमी गाछी के पीछू सें पुरहैत के तमाशा देखी रहलो छेलै, कोय मजा लुटै ले, कोय ओकरो दुख सें दुखित होय केआरो ठीक बारह बजतें होतै रात, देखवैया देखलकै, ऊ पुरहैत आपनो साथें वहें बिहौती पटौरी लेले ढेर देरी बादें ठाकुरबाड़ी सें निकललो छेलै आरो यहें पोखरी में नहाय-सुनाय के पटौरी पिन्ही लेने छेलै, फेनू है जे पत्थर के जोड़ी-जोड़ी बनेलो गेलो टुटलो-फुटलो घाट देखी रहलो छौ नी, याँही बैठी के ऊ घंटो कानतें रहलो छेलै, बच्चे नाँखि फूटी-फूटी के । पूछवौ ते मंगरू मामा बतैथों कि हौ रँ पुरहैत के कानतें देखी के केना सब देखवैयो के कलेजा मुँहो पर आवी गेलो छेलै आरो चुपचाप वैठा सें चली देले छेलै.....सब्में यहें नी सोचले होतै कि रात भरी पुरहैत कानतै, फेनू बिहान होतें-होतें सब शांत होय जैतैयहें सोची के सब चललो गेलो होतै । मजकि, ई केकरा मालूम छेलै कि विहाने आवै वाला शांति-मशानो के शांति सें ज्यादा भयानक भेतै । कनवैयो तक नैं होतै.....ठीक रात के चार-पाँच बजतें होतै, फरचो होय में कुछवे देरी रही गेलो होतै कि हौ रातको सन्नाटा में हेने आवाज भेलो छेलै जेना आकाशो सें पहाड़ धरती पर गिरी गेलो रहे । एक्के बारगी सौंसे गाँव जागी गेलो छेलै । बुतरू-बूढ़ो, जोर-जनानी, सब । कोय सोचै नैं पारी रहलो छेलै—आखिर ई आवाज केन्हो छेलै । आरो जबें हरगौरी बाबू के हवेली दिश सें चिकरै-हँकरै के शोर उठलो छेलै, तबें ते लोगें पहिने यहें सोचले छेलै—हुएँ नैं हुएँ, हौ आवाज

बम फूट के होतै । हरगौरी बाबू के हवेली में डकैती हुए लागलो छै, बस यहे सोची गाँव भरी लाठी-फरसा-भाला लै के हल्ला-गुल्ला करतें हवेली दिश दौड़ी पड़लो छेलै । पर यहाँ ते दुसरे दिरिश छेलै । है जे ईटो-पत्थर के पहाड़ देखे छौ, हरगौरिये बाबू के कभी हवेली छेलै ।गीत-लाद, भोज-भात के बाद हवेली सुख के नीन सुती रहलो छेलै—एकदम निभोर । गाँववाला यहाँ पहुँची के देखने छेलै, यहे हवेली—हरगौरी बाबू, हुनको जनानी, हुनको बेटी-जमाय आरो नाती वास्तें कब्र बनी गेलो छेलै । हवेली टुटी के पुरानो कब्र नाँखि दिखाय रहलो छेलै, जेमें एक पुस्त के साँस बंद होय गेलो छेलैदीपा, तोरा विश्वास नै होतै, जे हवेली के तोड़े में हजार मजूर के महिनौ लगतियै, से क्षणे में ईटो-माँटी के पहाड़ बनी गेलो छेलै ।” कहानी कहतें-कहतें विधाता हठाते रुकी गेलो छेलै, जेना ओकरो मुँहो पर अनचोके कोय हाथ राखी देले रहे ।

दीपाहो एकदम चुप होय गेली छेलै, ईटा-माँटी के टील्हो के ढेर । एत्ते सालो के बाद वहाँ रहियो की गेलो छेलै । एकदम निरयासी-निरयासी के देखी रहलो छेलै दीपा । की जानै ले चाहै छेलै । की खोजे ले चाहै छेलै ?

“हेना निरयासी टील्हा में की देखी रहलो छौ ?”

“कुछवे नै ।”

ओकरो बोली सें लागलो छेलै, जेना—नीदवासलो दीपा के कोय अनचोके झकझोरी के जगाय देने रहे । फेनू सामान्य होते हुए वें पूछने छेलै, “आरो ऊ पुरहैत ?”

“ई ते बताय ले भूलिये गेलियो, ऊ घटना के खबर दैले कुछू लोग ई पोखरी दिश दौड़ी ऐलो छेलै । मजकि पुरहैत यहाँ होतियै, तबे नी । गाँववाला के ते छोड़ो, गाँव के कोय जीव, पशुओ के खबर नै भेलै कि पुरहैत कखनी-केना के ई गाँव छोड़ी के कहाँ चललो गेलो छेलै । ई कत्ते अजुबा बात छेकै कि जॉन दिन ई ठाकुरबाड़ी में पुरहैत कल्याणी साथें बीहा रचैने छेलै, वहू दिन मंगलवारे छेलै आरो जॉन दिन सब खिस्सा खतम भै गेलै, मंगले के दिन छेलै । की तोहें एकरा खाली एक संयोगे भर कहभौ । जे हुए ओत्तो बड़ो दुर्घटना सें जहाँ हरगौरी बाबू के परिवार ले गाँववाला दुखित छेलै, वहाँ गाँव के सब बच्चा-बुतरू पुरहैतो ले ।”

दीपा सें कुछवे बोललो नै जाय रहलो छेलै, खाली नजर उठाय के विधाता दिश देखलकै । भला बुतरू के उदासी के कारण की होतै ? दीपा के बुझलो आँखी में प्रश्न छेलै, जेकरा समझ में विधाताहो देरी नै करले छेलै, “पुरहैत हर मंगल के गाँव के बच्चा-बुतरू के बीच मिठाय-लमनचूस बाँटे छेलै । आपनो बीहा के यादगारिये में नी बाँटतें होतै आरो नै ते कथी ले बाँटतियै ।

से बच्चा-बुतरू के तेँ हर मंगलवार-दिन पुरहैत लुग भीड़ लगी जाय छेलै । जबें बुतरू सिनी केँ मालूम भेलै कि पुरहैत जी गाँव सेँ राते-रात चली देलेँ छै, तेँ दू-तीन दिन ताँय ऊ सिनी बच्चा दूर नॉखि ई ठाकुरबाड़ी के हिन्ने-हुन्ने टौचैतें रहै । पर दुःख केकरोँ स्थाई रहेँ पारलोँ छै, चाहे दुःख केकरो लेँ रहेँ । समय मेटी-माटी केँ सब साफ करी दे छै, जेना सिलोटी पर लिखलोँ अक्षर केँ कोय बुतरू । पुरहैत केँ बुतरूओ भुलाय गेलै आरो धीरे-धीरेँ तेँ बड़को सिनी हिन्ने आवै सेँ डरेँ लागलै । जोर-जनानी, बच्चा-बुतरू तेँ ई मानिये लेलेँ छै कि यहाँ ढेर सिनी आत्मा बिचरै छै । हमें समझै छियै, बाटो-बटोही हिन्ने से नें टपतेँ होतै ।”

“आरो तोहें यहाँ पर विद्यापीठ खोलै लेँ चाहै छौ, की ?”

“होँ, ई जमीन एकदम खाली छै । हमें समझै छियै, हरगौरी बाबू के गोतिया ई जमीन विद्यापीठ के नामें लिखै में कटियो टा देर नें करतै । आदमी बसतै तेँ भूत-प्रेतो के वासोँ कहाँ रहतै, बस यही सोची केँ । आरो एक बात, एत्तेँ बड़ो जग्घा में सोचौ—कै सौ गाछ लगतै । एक्के साथ दू-दू सपना पुरी जैतै । आबें तोरा की बतैय्यौ कि कै सालोँ सेँ ई सपना हमरोँ आँखी में जागी रहलोँ छै ।”

“से तेँ ठीक छै, मजकि है तोरोँ विद्यापीठ में कैटा बच्चा-बुतरू पढ़ै लेँ ऐत्हीं । के माय-बाप आपनोँ जवान लड़का-लड़की केँ पढ़ै लेँ भेज्त्हीं । केकरा आपनोँ सन्तानोँ के मोह नें धेरै छै, खैर है सब तेँ बादकोँ बात छेकै । पहनेँ यहाँ सेँ लौटोँ ।”

“भूत-प्रेत के बात सुनी देह भौआय गेलौ की ? डरी गेल्हौ की ?”

“होँ, डोर लागेँ लागलै—मरलोँ भूतो के डोर नें छै, जीत्तो आदमी के डोर ओकराहौ सेँ कहीं ज्यादा बड़ी केँ होय छै । नें तोहीं बचेँ पारभा, नें हमराहै बचावे पारभौ ? चलोँ लौटोँ ।”

जखनी दोनोँ लौटी रहलोँ छेलै, सुरूज भगवान चानन नदी के हौ पार डूबै के धड़पड़ी में छेलै । खेत पार करी दीपा गाँववाला बाँध चढ़लै, वांही सेँ दोनोँ केँ दू दिश बँटी जाना छेलै । हुन्ने माघ-पूस के सूरजे नॉखि सूरज डूबै में लीन छेलै आरो हिन्ने दीपा-विधाता अलग-अलग दिशा में जेठ-बैशाखो के सुरूज नॉखि ठहरलोँ-ठहरलोँ बड़ी रहलोँ छेलै, जेना गोड़ो के गति रुकी-रुकी जैतें रहेँ ।

“कल्ले दीपिया केँ विधतवा के हाथों में हाथ डाली केँ ऐतें देखलेँ छियौ ।”
 “की मलकी-मलकी, झूमी-झूमी केँ, जेना ऊटों साथें झूल झुलतेँ रहेँ ।”
 “ई विधतवो जन्मे सें साँढ़ जनमलोँ छै । आबेँ साँढ़ छेकै तेँ”

ढीवा, प्रफुल्ल, खखरी आरो बम-बम के ठहाका एक्के साथें जेना उधियाय उठलै । कान फाड़ी दै वाला ठहाका । मजकि शनीचर चुप्पे रहलै । ठोर के कोनियो नैं हाँसलै । ई देखी केँ खखरीं दुसरोँ तीर छोड़लकै, “की शनिचर, विधाता के किस्मत पावै के मनौती भगवानोँ सें करी रहलोँ छैं की ?”
 “खखरी, बोली-चाली पर लगाम रखें । विधाता के बारे में तोरा जे कहना छै, कहें, ऊ तोरोँ दोस्त छेकौँ, मजकि दीपा बारे में जे भी बोलना छै, सोची-समझी केँ बोलें । है बात भूलियैं नैं कि दीपा के बाबू हमरोँ बाबू के मित्र छेलै, वक्त पर खूनो बहाय वाला । हम्मू ई बात केँ नैं भूलै छियै । आरो जहाँ तक मनौती के बात छै खखरी, ऊ तेँ मनोँ में छेवे करै । ऊ मनौती छेकै, ई सौँसेँ इलाका के विधाता बनै के । हमरोँ नजर छै, ऊ इस्कूली पर, जेकरोँ प्रिंसिपल विधाता के होवोँ लगभग-लगभग तय छै । खखरी, कुछ हेनोँ भी तिरिया चाल चलें कि विधाता प्रिंसिपल नैं हुएँ पारें । जों ऊ होय गेलै, तेँ वें आपनोँ बुद्धि-बलोँ पर केकरो चाल नैं चलें देतौ । आरो सुन, है बात के भनक, विधाता केँ तेँ की, ई गाँव के हवौ-पानी तक के नैं होना चाहियोँ कि हम्में विधाता लेली हेनोँ सोचै छियै । आखिर ऊ हमरोँ दोस्त छेकै । पर है तेँ राजनीति नी छेकै आरो राजनीति तेँ छिनार होय छै, जहाँ कोय केकरो नैं होय छै । की ढीवा, ठीक कहै छियै नी ?”

“हमरोँ बाँस कभी गलत कहें पारें ? कभी गलत सोच्छौ पारें ? एकदम बीछी-बीछी केँ फिट बात बोलै छै । अरे, संसद में है रँ बात करै वाला नेता होना चाहियोँ, जे साफ-साफ बोलें सकें, आबेँ हेनोँ की, जे वहाँ पहुँची बिलय्ये नाँख सुकुड़यैलोँ नुकैलोँ रहेँ कि कहीं कोय डेस्को नीचू कुछ पूछी नैं दें । आरो जबेँ हेनोँ सिनी आदमी वहाँ जावें पारें, तेँ की हमरोँ शनिचर नैं जावें पारें ? की कमी छै हमरोँ शनिचर में । पुरजा लै केँ नैं, आपनोँ कुवत सें बी0 ए0 पास करलेँ छै, एक-दू के नैं, हजार-दस हजार लोगोँ के माथोँ आपनोँ भाषण सें घुमाय दिऐँ पारें । तेँ कथी में कमी छै, जे कि हमरोँ बाँस दिल्ली-पटना सरकार में नैं घुसेँ पारें ।”

“कहूँ कमी नैं छै ढीवा, कहूँ कमी नैं छै । हम्में एत्तेँ जे कुछ करी रहलोँ छियै,

आखिर कहाँ पहुँचें लें ? दिल्लिये-पटना नी ?” शनिचर भावपूर्ण मुद्रा में कहनें छेलै । फेनू ढीबा दिश मूँ करी के बोललै, “पहुँचवो एत्ते आसानो ते नैं छै । एकरो वास्ते चाहियो, छल-प्रपंच, जोर-जबर्दस्ती, आकि सेवा, विश्वास, प्रेम । मतरकि है सेवा, विश्वास वाला रास्ता सें राजनीति में ऐवो जिनगी बिताय देवो होतै । हमरा ते आयकल में दिल्ली-पटना पहुँचना छै; ढीबा, आयकल में । आरो एकरो वास्ते पहिलके मार्ग आयकल ठीक छै । कै ठो छै—जे दुसरो रास्ता सें आवै छै ?.....यही सें नी कहै छियो तोरासिनी के, या ते है श्रीज्ञान विद्यापीठ खुलवे नैं करे, जों खुले ते विधाता ओकरो प्रिंसिपल नैं बने । देख, जों विद्यापीठ यैं ठां खुललौ ते आदमी के बुद्धि बढ़े लागतौ आरो बुद्धिवाला ते बात-बात में टांग अड़ाय वाला होय छै । कुछ करै ले चाहवैं ते जुलूस निकालतौ, धरना देतौ, सब गुड़-गोबर । हमरा सिनी जे राजनीति करै छियै, ऊ मुखे पर चलै वाला छेकै । एक बात जानी ले जेकरो जत्ते बुद्धि छोटो होय छै, ऊ ओल्ले आपनो जाति-धरम पर मरै-मिटैवाला होय छै, यही सें कहै छियो कि केकरो बुद्धि नैं बढ़े देना छै । प्रफुल्ल, तोहें छेकैं हमरो ग्रुप के चाणक्य, कुछ हेनो कर कि है विद्यापीठ के प्रिंसिपल तोहें बनी जो । जों हेनो होय जाय छै, ते यहाँ विद्यार्थी नैं, हमरो कार्यकर्ता रहतै । आखिर हमरा सिनी के मिटिंग-माटिंग करै वास्ते ऑफिस-ऊफिस चाहियो की नैं ? की हेने बहियारी-बहियारी भेलो फुरवैं ?”

सबैं शनिचर के बात बड़ी ध्यानो से सुनले छेलै आरो सब सुनला के बाद बमबमें ठेहना बलें खाड़ो भै के कहले छेलै, “शनिचर, तोहें एकदम ठीक कहै छैं । हमरा सिनी के एक जग्घो चाहियो, जहाँ बैठी के मौज-मस्ती बाँटे सकौ । आवे कखनियो खड़े, पीयै के मोन भै जाय छै ते रोजे-रोज जग्घे के तलाशी करै ले पड़े छै । ऊ इस्कूली के प्रिंसिपल प्रफुल्ल होतै ते हमरो कलालियो वहाँ नी होतै । की प्रफुल्ल ?”

“तोरा सिनी चुप रहें । यै में प्रफुल्ल के की विचार छै, पहलें यही जानना चाहियो ।” शनिचरें बमबम के आगू बोलै सें रोकते कहले छेलै ।

“यै में हमरो की विचार, तोरा सिनी साथ देभैं ते यहू होय जैतै ।”

“देख प्रफुल्ल । हममें तोरा यै में यै लेली भिड़ाय ले चाहै छियो कि तोहें भेलें विधाता के जात । यै सें बात कुछ आरो होव्हो करतै ते दूसरो रैं के होतै । जों हममें खाड़ो भै छियै ते कल्ले सें जात-जात के झगड़ा खाड़ो होय जैतै । नहियो होतै, ते सब जातें मिली के हेनो बनाय देतै । तोरो खाड़ो भेला सें एकरो बाते कहाँ उठै छै । हममें ते पीछू सें छेवे करयौ । की ?”

“से बात ते ठिक्के छै मतरकि.....”

“जाति से केना लड़भैं, यही नी ?”

“से बात नैं छै शनिचर । जातो में कुछ बरियो होय छै की नैं ? विधाता ऊ खानदानों के छेकै, जेकरो घरों के बिल्लियो वेद-पुराण बोलै छै । भर रुपसा गाँमे के बात नैं छेकै, ई इलाका भरी में ओकरा सिनी के विद्या-बुद्धि के मुकाबला करै वाला के छै ? की है तोहें नैं जानै छैं ? हम्में सोचै छेलियै कि ओकरो सामना में भला के गाँववाला हमरा सहतै ।”

“सहतै, एकदम सहतै, मुरुख कैथ । तोहें विधाता के ऊ गोतिया सिनी के आपनों पक्ष में पहिलें लान तें, जे विधाता घरों से भीतरे-भीतर जलै छै, वही तें विधाता के विधवा बनाय देतै । की समझलैं ?.....हम्में समझी गेलियै, है रैं तोरा समझै में नैं ऐतौ, जब ताँय बुद्धि-बूटी के गंध तोरो गल्ला बाटै दिमागे में नैं जैतौ ।”

शनिचर के एतना कहना छेलै कि सब्भे के चेहरा एक बारगिये खिली गेलै । बुद्धि-बूटी के सब सरँजाम ढीढ़ के करै ले लागै छै, रगड़-घस्स से ले के पत्थल के चीलम के लाल घंघरी पिन्हैवो ताँय । से ढीवा आपनों कमर से लत्ता में लपेटलो गाँजा निकाली के आपनों बायाँ तलहथी पर दायाँ अंगुठा से दम दै के रगड़ना शुरू करी देलकै । दम दै के रगड़ै वक्ती ढीवा ठेहुना बलें एड़िया पर जरूरे बैठी जाय छै आरो जे बार रगड़ दै छै, तै बार ऊ लगभग ठेहुना तक झुकी आवै छै । झुकै-उठै के बीच ढीवा आपनों आदत मुताबिक वहे फेंकड़ा पढ़े लागलो छै,

लाल गेहूँ की लचलच पुड़िया आ पुड़िया की ठूठ
मैं छाकूँ, तुम खाओ मुसाफिर, तब मचे गहगट
नहीं सुहागिन, यह भी नहीं गहगट, वह भी नहीं गहगट
लाल पलंग पर लाल बिछावन ओ तकियन का ठूठ
मैं सोऊँ औ तुम भी मुसाफिर, तब मचे गहगट
नहीं सुहागिन, ये भी नहीं गहगट, वो भी नहीं गहगट
तब हरे बाँस की हरी पत्तियाँ आ चिलमन की ठूठ
मैं भरूँ और तुम पीओ मुसाफिर, तब मचे गहगट
हाँ मुसाफिर यह भी रही गहगट, वह भी रही गहगट

ढीवा आखरी तीन पंक्ति तभिये बोलै छै, जबे कली के रगड़ के जरूरत नैं रही जाय छै, नैं ते ऊपरलके पंक्ति दोहरैतें-तेहरैतें रहे छै । जखनी वें साँस खिंची के आध मिनट तक गहगट बोलथैं रही जाय छै, तबे सब्भे के ई मालूम भै जाय छै कि माल बनी के तैयार होय चुकलो छै ।

इखनियो वहे भेलै । चिलम में काटलो कली कस्तूरी के गंध से गमकी

उठलो छैलै आरो देखहैं-देखहैं चिलम के मुँह कोय राकसे रँ रहि-रहि केँ फुक-फुक आग उगलेँ लागलो छैलै, सबके मुँहों से लगी-लगी केँ ।

“ई छौड़ा के हाथों में जादू छै । मंतर मारी-मारी केँ रगड़ै छै, नैं तेँ दुवे फूँक में आँख केन्हों सबके पलाश फूल बनी गेलों छै । शनिचर एक दाफी तहूँ ले केँ देखैं नी ।” खखरीं कहलेँ छैलै ।

“नैं खखरी, अभी नैं । देखै छैं, विधाता केँ पीतेँ ? सब बन्द करी देलेँ छै, नैं गांजा, नैं दारू, नैं पुड़िया । एकरों रहस्य हम्मं नी समझै छियै । पीतहौँ होतै तेँ खाली नुकैये-चोरैये केँ । दोस्त तेँ हम्मू ओकरे छेकियै, मतरकि आबेँ कहियो देखै छैं, वें हमरोँ संगत करै छै ? नैं तेँ वही विधाता हमरोँ साथें महुवा महादेव बनले रहै छैलै । आय ओकरोँ साथी छेकै—बस कमरूद्दीन, जोगी, रवि चक्रवर्ती आरू खुशीलाल । वें में लतांत आरो खुशीलाल तेँ मत पूछैं—यहू भुलाय देलेँ छै कि दोनों हमरे गोतिया छेकै । तबेँ जात के दुश्मन जाते होय छै । लकड़ी नैं कटतियै जों आरी के पीछू में लकड़ी नैं होतियै । जावै लेँ दें । जों लतांत, खुशीलाल ओकरोँ साथ छै, तेँ प्रफुल्ल आरो बमबम हमरोँ साथें । जोड़ी बराबर छै, देखना तेँ आबेँ यही छै कि ऊँट कौन करवट बैठै छै ।”

“ऊँट वहेँ करवट बैठलै, जोन करवट हमरासिनी ओकरा बैठैवै । नैं बैठतै तेँ टांग तोड़ी केँ बैठैलोँ जैतै ।” भारी निसांव के कारण प्रफुल्लें बड़्डी मुश्किल सें एत्तेँ बात कहेँ पारलेँ छैलै आरो वांही एक गाछी सें आपना केँ साटी साधु-सन्यासी रँ आपनोँ गोड़-हाथ फैलाय केँ आँख बंद करी लेलेँ छैलै ।

“बस यहें तेँ तोरा सिनी में छौ, जहाँ पीलैं कि कोय मरड़ बनै छै, कोय मौनी बाबा । एक अनिरुद्ध-विधाता केँ जोड़ी छै । रातो भर संगति करते तेँ रातो भर कुछ करै के ही संकल्प लेतेँ रहतै । यहाँ तेँ तोरा सिनी के मुँह में जोरन नैं गेलौ कि जमी केँ थक्का । हफ्ता भरी बाद मिटिंग छेकै आरो परफुलवा के हाल देखवे करी रैल्लों छैं । तोरो सिनी सुतवे करवें—कोय आगू, कोय पीछू । तोरा सिनी के बल्लों पर प्रिंसिपल पदों सें विधाता के हटैवोँ फूँक मारी केँ भट्ठी बुझैवोँ नाँखिये छेकै ।” एतना कही शनिचर गुस्सा में उठलै आरो कमीज-पजामा केँ जोरोँ सें झाड़तें पुबारी टोलोँ दिश चली देलकै—लम्बा-लम्बा डेग मारनैं । देखलैं नी चौधरी के मिजाज” प्रफुल्ल ने आपनोँ मुंदलोँ आँखी सें बोललै ।

“केकरा की कहवैं प्रफुल्ल, एक चौधरी होतियै तो समझैलोँ जावें पारें छैलै” खखरी ने आपनोँ मुंदलोँ आँखी केँ बड़ी मुश्किल सें खोलते कहलेँ छैलै । सौंसे इलाका में हमरो गाँव विचित्र छै—बाभनो चौधरी, ग्वारो चौधरी, कैथो चौधरी, साहुआ चौधरी । ई भेलै सच्चा समाजवाद—बाभन-नौवा, सब ठाकुरे ठाकुर ।

पकड़तें रहो के के जात छेकै । शनिचरो चौधरी, सोराजी का चौधरी, भैरुवो का चौधरी, विधतवो चौधरी आरो नै ते नै खेखरियो चौधरी । ई गाँव के नाम रुपसा के राखलकै, अरे एकरो नाम ते होना चाहियो—चौधरगाँव । की खखरी ?”

दीबां एकदम भारी गल्लो सें कहलै छेलै ।

“धुर मरदे, है कोय नाम भेलै—चौधरगाँव । यहे नाम कलखनी बनी जैतै—चोर गाँव । कहीं जैवें ते आनगाँव के लोग बोलतौ, चोरगाँव के कुटुम ऐलो छै ।”

खखरी के बात सुनी अब तक चुप्पी बमबम नै एहै जोर सें ठहाका लगैलकै कि जेना छोटी-मोटी ठनके-ठनकी गेलो रहे । “चोरगाँव के कुटुम” सब्भे नें एकेक करी के ई बात दोहरैलै छेलै आरो वाँही पर हँसी सें लोटपोट होतें आपनो जग्घा पर पटुआय गेलो छेलै ।

शनिचर के जैतें देखी के बमबम, खखरी आरो दीवो एक लम्बा साँस खींचतें वाँही पर आपने-आपने जग्घा पर आहिस्ता-आहिस्ता पटुआय गेलै ।

३

“गोड़ लागै छिहौं, वसन्त का ।”

“के विधाता बेटा ? आवो-आवो । आवे ते तोरहौ सिनी हमरा भुलाय देन छै ।”

“है नै कहो काका । जो हेने बात होतियै, ते आय तोरो दुआरी पर आवै के जरूरते नै होतियै । काका, जन्मडीह सें कत्तो आदमी उखड़ी जाय, ओकरो लेली आदमी के सीना में जे ममता, श्रद्धा होय छै, ऊ स्थान शहर में बनलो नया हवेलियो नै लिए पारे ।”

“से ते छेवे करै बेटाअरे वहाँ नै, यहाँ बैठो । हों, आवे सुनावो गामो के सब हाल-चाल, ठीक छौ नी ?”

“सब ठिकके छै काका, मतरकि तोरा है रँ निश्चिन्त देखी हमरा अचरज भै रहलो छै । की तोरा मालूम नै छौ कि आय मिटिंग छेकै, विद्यापीठ के सब्भे व्यवस्था रो मुतल्लिक ।

“से ते मालूम छै ।”

“ते तोरा मिटिंग में जाना छौं काका । तोरे निर्णय मिटिंग में आखरी निर्णय होतै । है सबनें मानी लेले छै ।”

“अरे नैं बेटा नैं, हमरा वहाँ कथी ले ले जैवा । आबे गामों में हौ बातो नैं रहलै कि बाप-दादा केकरो रहे, ऊ सब्हे के बाप-दादा होय छेलै आरो केकरो मजाल कि बाप-दादा के बात उठी जाय । पंचायत सें कम नैं होय छेलै गाँव के एक बूढ़ो । आबे ते पंचायतो के बात के मानै छै । हमरा छोड़िये दा बेटा । अभी तौय जॉन इज्जत के बचैनें ऐलो छी, ओकरा है आखरी दिनों में कथी ले फटे ले देवै । बेटा कुल आरो कपड़ा जे बचाय के चलै छै, वहे मनुक्ख छेकै ।”

“काका, तोहें एत्ते सिनी बात सोची लेलहौ केना । वहाँ हेनो कुछुवे नैं होतै ।”

“की होतै आरो की होय रहलो छै, है सब के तोरा ओतना खबर नैं छौ बेटा । कुछु दिनों सें गाँव में जे खेल चली रहलो छै, तोहें की ऊ नैं जानी रहलो छौ । इखनिये सें दुर्गापूजा के तैयारी ले के पूबारी टोला के कहना छै, जे रँ हर साल होय छै—मेला में कीर्तन आरनी के सिवा आरो कुछ नैं होतै । ज्यादा-से-ज्यादा, खरच करी के रजौनों सें चमरखानी जी के बुलैलो जैतै, झाँकी दिखाय ले आरो कुछुवो नैं । पर पछियारी टोलो के मिजाज ते पूबारी सें एकदम अलगे छै । एक दिन बहियारी सें लौटी रहलो छेलियै, ते प्रफुल्ल मिली गेलै । पूछलियै, ‘की प्रफुल्ल, दुर्गापूजा-मेला ले के पछियारी टोला की सोचले छै ?’ ते जानलौ, परफुलवा की बोललकै ? बोललै, ‘पछियारी टोला के छवारिक दल के ते एक्के मोन छै—अबकी मेला में नाँचै गावै वाली आवे । राम-लीला में रंगीला के राम आरो हनुमान वाला पाट देखतें-देखतें गाँव ओकताय गेलो छै, आबे सब रसलीलै देखै ले चाहै छै, सें अबकी ते मेला में रासेलीला होतै, यही हमरा सिनी के निर्णय छेकै ।”

“बोलै ले दौ काका, हममें शनिचर सें ई बात कहभै । आरो शनिचर कही देतै ते केकरो मजाल छै—कोय मेला-टेला में पतुरिया नाँच कराय ले ।”

“यहे ते दुख छै बेटा । है सब शनिचर के मालूम नै छै, हेनो नै छै । आय गाँव भरी में कत्ते लोग छै, जे पीयै-खाय वाला नैं रही गेलो छै । पीयै वाला दिन-रात एक करी देले छै । कभी दुर्गाथान, ते कभी आमो बगीचा में, कभी बाँधो पर, ते कभी बहियारी में । हम्मीं आँख नीचा करी के निकली जाय छी । जानै छियै—ऊ सबके आँख नीचा नैं होय वाला छै । देखियौ, हममें ते देखै ले नैं रहवौं मजकि एक जुग बीततें-नै-बीततें यहे गाँवों में घरे-घर पीछू दारू के एक-एक भट्टी भेतै, हों एक-एक भट्टी । नैं भट्टी बन्द होतै, नैं पीयै वाला ।

.....आखिर भट्टी पीछू दस-दस टाका के दू हिस्सा शनिचरा दलों के मिलै छै । गाँव के गाँव बनाय ले पहलें तेँ यहे जरूरी छै कि भट्टी बंद हुएँ । आरो तोहें की समझै छौ, शनिचरा ई चाहतै । हरगिज नैं ।”

हम्मैं तेँ मानै छियै काका, कि परिस्थिति-परिवेश आदमी केँ जरूर प्रभावित करै छै, मतरकि सामर्थवान व्यक्ति परिस्थितियो केँ बिना प्रभावित करलें नैं रहै छैई जे गामों में श्रीज्ञान विद्यापीठ खोलै के बात सोचनें छियै, ओकरो पीछू हमरो बहुत बड़ो संकल्प छै । गाछ-बिरिछ के नीचें, टटिया-मड़ैया के नीचें विद्यापीठ—ई गाँव के आग यही पानी सें खतम होतै काका, आरो जहाँ ताँय लत के बात छै, ऊ कत्तो खराब रहेँ, अभ्यास सें की नैं छुटै छै । हमरो दारू पीयै के हिस्को छेलै । छोड़ा वाला भी तोहीं छेकौ कक्का । तबें तोहें हार कहाँ मानलें छेलौ ।”

“की याद दिलाय देलौ बेटा” वसन्त कां हँसतें कहलकै—“तबें यहे बमबम पीछू सें हमरा सुनाय-सुनाय कहै—विधतवा मुनी-समाजों के चक्कर में पीवों-खैवों छोड़ी देलकै । यहे तेँ देखना छै कि बाघे कहिया ताँय माँस खैवों छोड़ै छै.....ई मुनी-समाजे एक दिन गाँव बर्बाद करी केँ राखतै । आय एक साथी गेलै, कल दुसरो जैतै, परसू तेसरो । आदत की छुटतै, हों, मुनी के नामों पर चोरका-चोरकी पीतै, आरो की”

काका ऊ मिटिंग में तोरा जरूरे चलना छौ ।” विधाता हँसतें कहलकै ।

“आबें तोहें कहै छौ बेटा तेँ जैवै, जरूरे जैवै । कहिया छेकै मिटिंग आरो कैठां होतै ?”

“यहे एतवार केँ छेकै, पाँच रोजों के बादे । नकुल बाबा के दुआरी पर वाहीं सब लोग जुटतै । दू-तीन रोज के भीतरे टाड़्डी, भदरिया, डुमरामा, खिड़्डी सब गाँमों के प्रमुख आदमी केँ एकरो खबर करी ऐवै । तेँ जाय छियौ काका, महाराणो पहुँचना छै, होना केँ सूचना पहले पहुँचाय ऐलो छियै ।”

“जा बेटा, सारथी सब्बे नैं बनें पारें । जे पांचजन्य फूँकै—वही कुशल सारथी ।”

इन्तजार करी रहलौ छेलै । मनो में कै बारी होलौ छेलै कि उठी के चली दौ । हो ते दीपा के नानिये छेलै कि विधाता के आवी-आवी कही जाय, “तोहें जइयो नैं, दीपां तोरा ई कहै लें कही गेलो छैं कि हम्मैं तुरत्ते लौटी रहलो छियै, भागियो नैं बेटा..... की कहियौ बेटा, एकरो माय-बाबू जहिया सें एकरा सें अलग भै गेलै, तहिया सें हम्मी एकरो माय आरो सहेली । आबे ते तोरा बातों में ई एत्ते डूबलो रहे छै कि पटनो जाय के बाते नैं बोलै छै ।.....आबे तोहें चल्लो जैवा बेटा, ते ऊ हमरा पर गुस्सेती । हम्मैं केन्हौ के चाय बनाय छिहैं । आबे दीपा रें ते नहिये बनावे पारभौ । तबे देखे छिहैं । हमरा सिनी के जमाना में ते एक गिलास औंटलो दूध मेहमानो के देलो जाय छेलै । आबे ते बस दू बूँद दूध, चायपत्ती आरो पानी । दूधो ते पानिये आबे छै । आबे पानी में पानी मिलाय के अतिथि के खातिर करलो जाय छै । चिनियो पड़े छै ते चुटकी भर । नैं सोंर, नैं स्वाद । तबे नया युगो के नया लोग । एक गिलास औंटलो दूध पीतै ते छो दिन पेट खराब.....जैय्यो नैं बेटा, आवै छियौ ।”

खूब छै दीपा के ई नानियो । नानी के आँगन दिश गेला के बाद विधातां मने-मन सोचलकै आरो नानी के सबटा कहलो बात याद करी के एक अजीब सुख सें गनगनाय गेलै कि तखनिये दीपाहौ आवी गेलै ।

“बहुत देर बैठे ले पड़लौ की ? बोर होलौ ?” दीपा रों चेहरा पर अजीब प्रसन्नता आरो चंचलता छेलै । ओकरो यही प्रसन्नता आरो चंचलता ते विधाता के मिन्दो दीपा के टुक-टुक ताकै ले विवश करतें रहे छै । तखनी विधाता कुछ नैं बोलै छै । आपनो आँख पत्थल नाँख स्थिर करी दीपा के निहारतें रहे छै, जेना कोय नदी के बीच आकाश सें उतरलो परी के हेरतें रहे, जेकरा कहियो नैं देखले छै, फेनू कहियो नैं देखे पारतैविधाता के है रें आपना के निहारतें देखी के दीपाहो के सब चंचलता अनचोके पहले नाँख खतम भै गेलै ।

“अरे तोरा की भै गेलो छैं । हेना चुप केन्हें भै गेलौ ?”

“चुप कहाँ छेलियै । अपना-आप सें बात करी रहलो छेलियै ।”

“फेनू हमरा सें के बात करतै ?” दीपा बड़ी अर्थपूर्ण आँखी सें विधाता के ई कही देखले छेलै ।

“अभी मनेमन जेकरा सें बात करी रहलो छेलियै, ऊ भी ते दीपाहे छेलै ।” शायत दीपा के आपनो प्रश्नो के उत्तर मिली गेलो छेलै । सुनहैं आँख झुकी गेलो छेलै ।

“बस, हम्मैं कहै छियौ नी—है आपनो आँख उठैनें राखो । तोरा नैं मालूम, जब

ताँय हम्मैं तोरोँ आँख देखतेँ रहै छौं, नैं जानौँ कत्तेँ-कत्तेँ संकल्प के मेघ उमड़तेँ-घुमड़तेँ रहै छै हमरोँ मनोँ के पर्वत पर ।”

“पहिले एगो संकल्प केँ तेँ पूरा करोँ । विद्यापीठ पूरा करै के संकल्प ।”

“दीपा, एकरा तेँ जेना होतै, पूरा करवै । महतो का के भी यही इच्छा छै—एकटा इस्कूल होतियै तेँ घरे-घर राजेन्द्र बाबू पैदा करी देतियै । है होतियै तेँ बच्चा-बुतरू की.....जे कहौँ मेहता का के सपना राजेन्द्र बाबू सें कम बड़ोँ नैं छै ।”

‘मतरकि हमरा तेँ कभियो-कभियो भय बनी जाय छौं । एखनी हम्मैं चूल्हो का आरो भोला का कन सें आवी रहलौ छियौ, हुनका सिनी केँ मिटिंग में आवै के खबर दै केँ । चूल्हो का की कहलकौँ, जानलौ ? कहलकौँ, ‘बेटी शनिचर के दोस्त प्रफुल्ल आरो दीवा सें जरा सावधाने रही केँ काम करियोँ । अरे शनिचर विधाता के दोस्त छेकै तेँ की, आदमी के महत्वाकांक्षा बढ़ी जाय तेँ बहुओ-माय के गर्दन काटै में नैं चुकै छै । हमरा तेँ लागै छौं, तोरोँ दोस्त सिनी कुछु-न-कुछु भांगटोँ खाड़ोँ करथौँ ।’

“यै बारे में तोरा नैं सोचना छौं । गाय आकि बरद के एक्के माथोँ पर दू सींघ होय छै, एकदम अलग, मजकि दोनों केँ कभी एक-दूसरा केँ चोट आकि घायल करतें देखलें छौ । हों विपत्ती ऐला पर दोनों मिली केँ एक्के बार दुश्मन पर बार करै छै । शनिचर हमरोँ बचपन के दोस्त छेकै । ओकरा हम्मी ठीक-ठीक बूझै छियैखैर छोड़ोँ, इखनी हम्मैं चलै छियौ, मंटू का सें मिलै लें । देखियै मिटिंग के सब सरँजाम होलौ छै की नैं ।”

“आरो नानी जे दूध-चाय के काढ़ा बनाय केँ लानी रहलौ छै, ऊ के पीतै ?”

“तोहें । हम्मैं चलै छियौ । हम्मैं तेँ ई कहै लें ऐलोँ छेलियौ कि शनिचर केँ मिटिंग में लानै के भार तोरहेँ पर रहलौ । आरो ई काम अइये निपटाय लेना छै, की समझलौ ?” एतना कही केँ विधाता सुट सना कोठरी सें निकली घरोँ के बाहर भै गेलै । दीपा है समझौ नैं पारलकी कि हेनोँ होय जैतै ।

तै तमन्ना के मुताबिके नकुल बाबू के मकान के बाहर वाला बरामदा पर मिटिंग बैठैलो गेलो छेलै । छवारिक सें लै के बूढ़ो-बुजुर्ग सब्हे उपस्थित भेलो छेलै । कुछ अधवेसुओ आगू-पीछू होय के बैठलो रहै । यै में पाँच अधवैसू ते शनिचर के ही अगल-बगल में विराजमान छेलै । प्रफुल्ल, ढीवा, खखरी, रामलोचन भी शनिचरे सें सटलो बैठलो छेलै । एकदम एक दिश । बाकी दुसरो दिश में । मिटिंग में पहले कानून के जानकार मंटुवे बाबू बोलना शुरू करलकै, “ते ई सब्हे के मालूम छै कि है मिटिंग कथी ले बुलैलो गेलो छै । यै लेली, यै बारें में कुछवे बात नैं करी के सीधे ई बातों पर विचार करना चाहियो कि श्रीज्ञान विद्यापीठ कहाँ बनें आरो ओकरो प्रिंसिपल के हुएँ । चूँकि विद्यापीठ वास्तें कोय महल-उहल खड़ा करना ते नहिये छै, दू-चार काठ केरो ठाट-पलनियाँ गिराना छै । यै में हजार-दू हजार, जे भी खरच बैठतै, सब हमरो दिश सें । काठ-कोरो के ते कमी छै नैं, छप्पर-छौनी चूतै ते हम्मैं साले-साल की, महिने-महिना बदलबावें पारों । विचार यहें करना छै कि विद्यापीठ हुएँ ते हुएँ कहाँ आरो एको सब तरह देखभाल सें लै के पढ़ाय तक के व्यवस्था करै वाला प्रिंसिपल के बनें ? हम्मैं चाहवै कि यै विषय पर पहिने वसन्त दा ही बोलें ते अच्छा ।”

“जहाँ तक प्रिंसिपल चुनै के बात छै, ऊ ते लगभग ई तैय्ये छै कि विधाताहै ऊ पदों के लायक छै आरो ई बात सब्हे लोगों के मंजूर छै । रहलै बात स्थान के, से ते विधाता के कहना छै कि हरगौरी बाबू के मठ वाला परती जमीने यै वास्तें उपयुक्त होतै । एकदम शांतो छै आरो गाँमों से दूरो नैं ।”

वसन्त चौधरी के बात खतम होतै शनीचरें रामलोचन दिश देखलें छेलै आरो रामलोचन पट सना उठी के खाड़ो भै गेलै । वैनें खड़े-खड़ दोनों पंजा के दोनों बाँही में फँसैते हुएँ डोली-डाली कहना शुरू करी देलें छेलै, “वसन्त काका के हो बात ते ठीक छै कि विधाताहै ऊ विद्यापीठ के प्रिंसिपल बनें । सब तरह सें ऊ योग्यो छै । मतरकि है बात विधाता केना अपने-आप तै करी लेलकै कि दिवंगत हरगौरी बाबू के जमीन विद्यापीठ वास्तें मिलिये जैतै ।”

“मिलि जैतै, हरगौरी बाबा के गोतिया श्याम बिहारी काका सें हमरो साफ-साफ बात होय चुकलो छै ।” विधाता बड़ा विश्वास के साथें शांत स्वरो में कहलकै ।

“मतरकि एक गोतिया के कहलें सें की होय जाय छै । आरो चार गोतिया हामी भरतै, तबे नी ?”

“हमरा श्याम बिहारी बाबू विश्वास दिलैनें छै कि कोय गोतिया तरफो सें कोय विरोध नै होतै । बलुक यै बातो सें सबके खुशिये भैतै ।”

“आबे खुशी भैतै कि दुख, है बात ते हरगौरी बाबा के एक गोतिया अखौरी काका के मुंशी विपिन बाबू ही बतैतै । की विपिन बाबू।”

प्रफुल्ल के इशारा पावी के अखौरी बाबू के मुंशी विपिन घोष खड़ा होय के आपनो चश्मा के शीशा आपनो कमीजो सें मिनिट भरी रगड़तें रहलै, फेनू ओकरा आपनो आँखी पर चढ़ैतें शीशा के ऊपर सें एकबार वहाँ उपस्थित लोगो के देखलकै, जेना कुरुक्षेत्र में खाड़ो अर्जुन आपनो रिस्तेवाला के पहचानी रहलो रहे । फेनू वें शनिचर के देखलकै, जेना वें ओकरा सें कहतें रहे, हममें हिनको खिलाफ केना लड़े पारों ।

शनिचरो बड़ी अर्थपूर्ण आँखी सें कनखी में देखले छेलै, जेकरा वहाँ खाली कमरूद्दीन आरो जोगी ही देखले रहै । कमरूद्दीन कंगूरिया अंगुरी विधाता के जांधी में गड़ैतें हुए है दिश इशारो करले छेलै, मतरकि विधाता कुछ नैं समझे पारले छेलै, से फेनू ऊ मुड़ी झुकाय के मुंशी विपिन घोष के बात सुनै में लागी गेलै ।

“आरो सब गोतिया के बात ते हममें नैं कहे पारों, मतरकि अखौरी बाबू साफ-साफ कही देले छै—हमें जमीन दै के पक्षो में नैं छियै । हवेली गिरला के बाद ऊ मलवा के ठीक-ठीक छानबीन नैं करलो गेलो छै । हुए सके छे, वें मलवा में लाखो-करोड़ो के जेवरात गड़लो रहे ।” विपिन बाबू के बात खतम होना छेलै कि सौसे मिटिंग खुसुर-फुसुर के शोर में डूबी गेलै । विधाता के झुकलो मुड़ी कुछ आरो झुकी के रही गेलै, जेना ओकरो सब कुछ हेराय गेलो रहे, वहाँ जेना ओकरो कोय्यो नैं रहे । कमरूद्दीन ओकरा है र टुटतें देखलकै ते निराशा आरो खुसुर-फुसुर के फाड़तें हुए कड़ा बोली में कहना शुरू करलकै, “जो अखौरी काका यै लेली तैयार नैं छोट ते चिन्ता नैं । मतरकि यहे कारण हमरो सपना ते नैं टूटे पारे । चानन नद्दी के किनारा वाला जमीन, जेकरा पर मील भरी शीशम गाछ लागलो छै—वांही विद्यापीठ खुलतै आरो आबे वांही खुलतै, कोय दुसरो जग्घो नैं । हममें ते विधाता सें कहले छेलियै कि हमरो इस्कूल के सामना में जे दसबिधिया जमीन छै, वांही संस्था खोलै, मतरकि यें मानवे नैं करलकै । हों चाननपट्टी वास्ते विधाता तैयार छेलै—ठाकुरबाड़ी वाला जमीन के बाद । ते आबे वांही विद्यापीठ खुलतै...हमें ते ई विधाता के पहलो कहले छेलियै—एक अखौरी काका नैं, कै अखौरी बाबू तोरो योजना के खिलाफ लागलो छै । एक के समझाय के काम बनैलो जावे सके, मतरकि ऊ सब अखौरी

बाबू के नैं, जे खोटी-खोटी के ई गाँव के सुख-सपना, समृद्धि के खाय में लागलौ छै ।”

कमरूद्दीन आरो कुछ कहतिथै कि बीचे में चेहरा कुछ कड़ा करतें शनिचर नें टोकतें हुए कहलकै, “कमरूद्दीन तोहें जरूरत सें ज्यादा बोली रहलौ छें । जों तोहें यै में केकरो पेंच-पाँच समझै छैं ते सीधे नाम लै के बोल । है मौगयाही वाला चाल छोड़ ।”

शनिचर के कड़ा रुख करतें देखलकै ते खखरी, ढीवा, चौरासियो होकरे सुर में एक-एक करी के बोलें लागलै, “हों कमरूद्दीन, तोहें जों खोटी-खोटी खायवाला अखौरी बाबू दिश अभी बोललैं, ओकरो नाम ले । मास्टर छेकैं, ते मास्टर हेनो साफ मन राखें, कैथो हेनो पेटो में घुरची राखी के नैं बोल । यहाँ साहू टोली के लोग सब नैं बैठलौ छै कि साँढ़ हेनो जैवें आरो सब आपनो दुकान बन्द करी लेतै ।”

“खखरी, बोली पर लगाम राख । सरपंच के बेटा छेकैं ते आपनो घरों में । जों कैथो के घुरची-उरची वाला कभियो बोललैं ते ठिक्के कैथो के घुरची विसाय जैतौ, हों ।” हठाते शनिचर के पीछू बैठलौ प्रेमरत्न बलबलाय उठलौ छेलै, जेकरा शनिचरें घूमी के आगू बोलै सें टोकी देलै छेलै । सब शांत भेलै ते कमरूद्दीन वहे बोली में फेनू कहना शुरू करलकै, “समय ऐतै ते नामो बिछाय के राखी देभौ । एक बात ते यहाँ पर फेनू सें कहिये दियौ कि पठाने के बेटा छेकियै—हमरो बाबू ई जानै छेलै कि झपटलो सिंह के जबड़ा में हाथ घुसाय के ओकरो जीभ केना खींची लेलौ जाय छै । पठान कोय चौधरी, मंडल, घोष के धौंस नैं सहलै छै, नैं सहतौ ।”

“कमरू तोहें बिरनी के हुरकच्ची रहलौ छैं । जधी पर बात-विचार करै वास्तें तोहें ऐलो छैं, ओकरहै पर बतियाव ।” चौरासी बोललै ।

‘तोहें कोन मेंठ, मुखिया या हमरो इस्कूली के हेडमास्टर छेकैं, जे तोरो बातों पर हममें चलवौ । आरो बिरनी-उरनी के बातों सें कमरूद्दीन के नैं डरावें । जुग जमाना बदली गेला के बादो चौधरी परिवार के खूनो में कोय नरमी नैं ऐलो छैपरसू ताँय अखोरियो काका के जमीन दै में कोय आपत्ति नैं छेलै, कल सें की भै गेलै । खेतों के जमीन दलदल भै रहलौ छै, ते की हममें नैं जानै छियै, कौने-कौने आपनो नाली के पानी भीतरे-भीतर खेतों दिश खोली के राखलौ छै । सबने जानी रहलौ छै, सब्भैं देखी रहलौ छै । हमरा सें नाम पूछी के की होतौ । जबे नामे बताय के नौबत ऐतै ते यहु जानी ले, एकेक करी के, ऊ सबके दीवाल ढाही के, नाली-मोरी हरो सें जोतवाय के

भतवाय-भल्ली देवौ ।”

“ते पहले तोहें यहें कर ।” ई कही के शनिचर आपनो जग्घो सें उठलै आरो सीधे बरामदा सें घड़धड़ैलो बाहर निकली गेलै । शनिचर के बाहर निकलना छेलै कि ओकरो पीछू-पीछू प्रफुल्ल, ढीवा, प्रेमरत्न, खखरी, चौरासियो सिनी निकली गेलै, पर ओकरो पक्ष के लड्डू कापरी, धीरेन दास, भैरो चौधरी, सोराजी चौधरी आरनी वांही बैठलो रहलै, शायत ई जानै ले कि मिटिंग में आखिर की फैसला लेलो जाय छै । यहो हुएँ पारें कि भैरो चौधरी आरो वसंत चौधरी आरनी के सामना आपनो पक्ष-विपक्ष खुलै दै ले नैं चाहै छेलै ।

शनिचर सिनी के है रँ उठी के चली देला के कारण मिटिंग में अनचोके एगो अजीब रँ के सन्नाटा आवी गेलै । कोय कुछ नैं बोली रहलो छेलै । एकबारगिये जेना सबके गोवध लागी गेलो रहे ।

“तोरासिनी है रँ गुम्मी कैन्हें साधी लेलौ । है मिटिंग शनिचरें नैं बोलैले छेलै, जे ओकरो चल्लो गेला सें मिटिंग रुकी जैतै ।” रवि चक्रवर्ती झुंझलाय के कहलकै ।

“ठिकके ते बोलै छै चक्रवर्ती । जे निर्णय लेना छैं, ले । आरो निर्णय की लेना छै । जबे आरो अखोरी सिनी साथें अखोरियो काका जमीन दै में कुनमुनाय रहलो छै ते, यहें मानलो जाय कि चानन वाला जमीने पर विद्यापीठ खोललो जैतै । विद्यापीठ वास्तें हौ मुर्दघट्टी सें ते यहें जमीन हजारो गुणा बढ़ियाँ आरो स्वर्ग छै । छै की नैं !” कमरुद्दीन एक तरह सें मिटिंग में लेलो जाय वाला फैसला पर मुहर लगैतें कहलकै ।

आरो होवो करलै वही । एक्के सुरो में सब्भें ई फैसला के समर्थन करी देलकै । समर्थन नैं करलकै ते सोराजी चौधरी, भैरो चौधरी आरो लड्डू कापरी । समर्थन के ते बात दूर, धीरेन दासें ते दबलो जुबान में ई फैसला के विरोधे करतें हुएँ कहलै छेलै, “हमरा लागै छै, एत्ते जल्दीबाजी में है रँ के फैसला लेवो ठीक नैं छेकै । चानन-पट्टी पर विद्यापीठ खाड़ो करै वास्तें गाँव के एकेक आदमी सें पूछना चाहियो, यहें गामो के नैं, आस-पास के सब्भे गामो के लोगहौ सें । सार्वजनिक आरु सरकारी सम्पत्ति पर है रँ आपनो संस्था खोली लै के फैसला गामो में गुस्सा आरु फूट के कारण हुएँ पारें ।”

“तोहें एकरा आपनो संस्था केना बोली रहलो छौ ?” रवि चक्रवर्ती जरा गोस्सा में ऐतें कहलै छेलै ।

“अरे ई विद्यापीठ विधाता के आपनो संस्था नैं छेकै ते की गाँमो के छेकै ? गाँमो के दू-चार आदमी करतै कि सौंसे गाँववाला ? आमदनी सें कुछवे

लोगों के पेट भरतै कि सौंसे गाँव वाला के ? तबे ई विद्यापीठ आपनो नैं भेलै ते की गाँववाला के भेलै ।” सोराजी चौधरी के ई बातों पर विधाता कुछ कहै वास्तें उठै ले चाहवे करी रहलो छेलै कि ओकरा हाथ पकड़ी के बैठैतें हुएँ कमरूद्दीन कहै ले खाड़ो होय गेलै । वातावरण जत्ते विषाय गेलो छेलै, वहेँ कम नैं छेलै, ई एकदम्मे महराय नैं जाय, यै लेली कमरूद्दीन के इशारे सें वसंत चौधरी नैं बैठै के आदेश देलकै । वसंत चौधरी के इशारा-आदेश गाँव के मुखिया के आदेश से कोनो कम नैं होय छै । कमरूद्दीन कसमसाय के फेनू बैठी रहलो छेलै ।

जेना कोय महीन चीज हेराय गेला पर तरहथी सें कोय ओकरा खोजतें रहे, होने वसन्त चौधरी ने आपनो तरहथी धरती पर फेरतें-फेरतें कहवो शुरू करलकै, “श्रीज्ञान विद्यापीठ के कल्पना विधाता के जरूर छेकै, यै में कोय शक नैं, मतरकि ई कल्पना के पुरला सें जे लाभ होतै, ऊ गाँववाला के होतै, यहू में केकरहौ शक नैं करना चाहियो । यज्ञ करै के बात कोय एक आदमी सोचै छै, ठीक छै, मतरकि जखनी कुंडो में दस पंडित के हाथ पड़ै छै आरो गाँव जुटी के मेला बनाय दै छै, ऊ यज्ञ सबके होय जाय छै—सब पुण्य के भागी । पहिलो दाफी यज्ञ के बारे में सोचै वाला तबे कहाँ रही जाय छै । इस्कूल, अस्पताल, धर्मशाला आरनी खोलवो यज्ञ सें कोनो कम नैं होय छै । एकरा खोलै वाला आपनो लाभ एक्के पैसा देखी के करै छै, बाकी पन्द्रह पैसा के लाभ दुसरे के मिलै छै । तहियो यज्ञ हुएँ कि दशहरा, इस्कूल हुवे कि धर्मशाला—यै में गाँव के एक प्रमुख आदमी, सौ-हजार आदमी के रूच के प्रतिनिधि होय छै, प्रतीक होय छै । ऊ एक आदमी के हों-नैं करवो सौ-हजार आदमी के हों-नैं करवो छेकै, हममें यहें मानै छियैआबे जबे बेटे दाखिल शनिचर या प्रफुल्ल के मनो में ढेर सिनी शंका छै, तबे एत्ते बड़ो यज्ञ पूरा करै के संकल्प उठैवो आभी ठीक नैं होतै । हमरो ते यहें विचार होतै कि यै लेली एगो आरो मिटिंग बोलैलो जाय, जै में शनिचर आरनियो मौजूद रहे । आभी वै सब के गैर मौजूदगी में कुछ फैसला करी लेवो, नहियो विवाद के विवाद बनाय लेवो होतै ।”

वसन्त चौधरी के सुझाव वेदवाक्य बनी गेलो छेलै, से केकरहौ कुछ आबे बोलना की छेलै । हों मिटिंग उठी जाय के पहिने विधाता एतना टा कहतें-कहतें ही उठलै, “काका, जे रास्ता पकड़ी के तोहें यात्रा के अंत चाही रहलो छौ, हमरा नैं लागै छै कि वै रास्ता के कोनो कांही अन्तो छै । हेनो कहीं नैं हुवै कि हमरा सिनी आपनो मंजिल पावै के किंछ लेलें यात्राहे करतें रही जाँव ।” सचमुचे, विधाता रो बाद जे-जे एकेक करी के उठी रहलो छेलै—सबके

मुँहों पर अजीब निराशा आरो भय के भाव घुमी रहलौ छेलै ।

६

“खखरी, कमरूद्दीनमां के चौधराहट देखलै नीं ।”

“से तोहें नैं देखलैं की ?”

“जे कहै छियौ, चुपचाप सुनलै जो ।” अनचोके शनिचर के मुँह-हाथ तनी गेलौ छेलै, “ठिक्के, कमरूद्दीन के बातों सें तेँ यहै लागै छै कि जेना विधाता आरनी केँ शंका छै कि हमरूहै सिनी अखौरी बाबू केँ भड़कैलै छियै ।”

“बातो तेँ सहिये छैवै नी करै शनिचर ।” खखरी बड़ी नरम बोली में कहलकै ।

“अरे मूरख, तेँ जाय केँ ई बात विधतवा आरनी केँ कही आवैं । तोरोँ जात में सब पढ़ी-लिखी केँ डॉक्टर, इंजीनियर, प्रोफेसर भै गेलै, मतरकि तोरा आपनोँ बुद्धि सें कुछ लेना-देना नैं । एकदम नाम नाँखी दिमाग पैलै छैं, एक गंगा छै, तोरे जात नी छेकै रेँ । एक तोहें छैं । अरे कभियो तेँ बुद्धि केरोँ बात करलोँ करेँ ।”

“तेँ ले, हममें चुप होलियौ । तोहें आपनोँ ग्रामोफोन बजावें आरो हममें कान पटैलें सुनतें रहवौ, बस ।”

“तोहें हमरोँ ग्रामोफोन सुनें की नैं सुनें । जखनी राज खुलतौ आरो कमरूद्दीन के ग्रामोफोन बाजतौ, तखनी गाँव भरी सुनवैय्या मिलतौ । समझलैं नी खखरी ।”

“विधतवो केँ कम नैं समझै, ऊ गूरोँ छेकै तेँ कमरूद्दीन मुँ छेकै । हों ।”

“से तेँ ठिक्के कहै छैं खखरी । मतरकि हेकरा सें है तेँ पता लगवे करै छै कि गूरोँ के दरद आरो मुँह के चिकरवो—एक दूसरा सें कत्ते जुड़लो छै । हमरोँ पीड़ा-परेशानी पर कोय आहो करैवाला छै की ?”

“की बात करै छैं शनिचर । तोरोँ चिन्ता के कारण यहै नी छेकौ कि विधाता के प्रतिष्ठा गाँव-जवार में बढ़लोँ जाय रहलौ छै, तेँ ऊ प्रतिष्ठा केँ

मेटियामेंट करै के भी वेवस्था करी लेलो गेलो छै ।”

“ऊ केना खखरी ?” शनिचर के चेहरा पर अनचोके एक विचित्रे चमक आवी गेलो छेलै ।

“ऊ हेना केहै ते तोरहो मालूम होतौ कि कमरुद्दीन, गंगा, लतांत आरो खुशीं, भीतर-भीतर है मोन बनाय ऐलो छै कि चानन के शीशम वाला वनों के बीच विद्यापीठ खोली देलो जाय । मिटिंग-मिटिंग फेनू देखलो जैतै, जहिया होतै, होतै । आरो हमरो पलान सुनें । जोन दिनां विद्यापीठ के वैठा तरी पड़तै, ऊ दिन ते अतिथि सिनी के गल्ला में मालाहौ पड़वे करथै ? बोलें हों । वही वक्ती में हममें बेलिया से अतिथि साथें विधाताहौ के गल्ला में माला डलवाय देवै ।”

“अरे, ते ये में की होय जैतै । तोहें नहियो डलवैवें, तहियो डालतै—प्रिंसिपल बनै के नातें ।”

“शनिचर, हमरा ते दिमाग नहियै छै, लागै छै तोरो नैं छौ । अरे बेलियां चाहे जोन मनो से विधाता के गल्ला में माला डालें, हममें आरो प्रफुल्ल यहें सोचलें छियै, कि हुन्नें माला पड़तै आरो हिन्नें हल्ला उड़वाय देवै कि बेलियां भरी स्वयंवर में विधाता के वोंर चुनी लेलकै ।”

“ते लोगें मानी लेल्लौ, आरो हेकरा से हमरा फायदा की होतै—ई ते बताव ।”

“बुद्धि होतियो ते समझी गेलो होतियें । खैर । देखें, लोगें है बातों पर मानै छियै कि विश्वास नैं करतै, मतरकि ई डोर-भय से गाँववाला आपनो लड़की के ते विद्यापीठ नहिये जावे देतै । आरो जबे लड़किये नैं जैतै, ते विद्यापीठ कहाँ से । ई स्कूल ते गामो रो अछरकटुवी आरो मुरुख लड़किये के विद्वान बनावै लेली नी खोललो जाय रहलो छै आरो वही नैं, ते इस्कूले की । मानलियै कि बसन्तका हेनो दू-चार नैं आपनो बेटी-पुतोहुओ के भेजियै देलकै, ते वहै से विद्यापीठ बनी जैतै की ? ऊ ते नदियो-बहियार जाय छै ते आठ गो मिलिये के जाय छै ।”

“बुद्धि ते लगैने छैं खखरी । आरो सुन—यैमें हमरा सिनी के केन्हीं के ऊँट आपने दिश बैठाना छै, जो है नैं होय छै, ते है जानी ले—हौ जे शीशमो के वोंन छै, ओकरो एक्को गाछ भविष्य में हमरा सिनी के नसीबो में नैं आवै वाला छौ । इखनी ते गाछो के काटियो लै जाय छैं, कोय नैं जानै छै, कलखनी जबे वांही विद्यापीठ होतै ते कोय-न-कोय आदमियो चौबीसो घंटा रहवे करतै, तखनी गाछ काटवो ते की, दातुन वास्तें टहनियो तोड़वो काल बनें पारे । हममें नी

जानै छियै, विधाता के—अच्छा कामो ले ते ऊ दोस्तियो खराब करी लै छै । आरो फेनू ते ऊ एकदममें एकबध्मो होय जाय छै, एकदम सुराहा । कोय बात बोली देलकौ, ते बोलिये देलकौ, फेनू ते रघुकुल रीति सदा चली आई, प्राण जाई पर वचन न जाई ।”

“फिकिर नोट शनिच्चर । फिकिर नोट । नैं केकरो प्राण जैते, नैं केकरो वचन, जैते ते बस विद्यापीठ ।”

खखरीं जखनी ई बात कहलकै, तखनी ओकरो दोनों ठोर हाँसै के क्रम में तनतें-तनतें एकदममें सोझो होय उठलै । जखनी कोय गंभीर चाल सोची के खखरी हाँसै छै, तखनी ओकरो दोनों ठोर हेने होय जाय छै । एक दूसरा सें जेना लट्ठा सें सटलो, तिरैलो, जेकरो नीचें हँसी भीतरे-भीतर दम तोड़ी दै छै । सिसकियो भर बाहर नैं निकले पारै छै । हेनो हाल में ओकरो आँखो अपने-आप बंद हुए लागै छै । एखनियो वहे रँ होय रहलो छेलै ।

“खखरी, नीन आवी रहलो छौ की ?”

“विधाता के वरमाला पिन्है ताँय आवे हमरा नीन कहाँ । बराती निकालिये के ऐतौ नीन ।” अबकी खखरी नैं आपनो चौव्यो में हँसी दाबै के जगह एक अजीबे मुड़यैलो रँ हँसी मुँहो सें बाहर करी देने छेलै ।

“एखनी हाँसै-कानै के समय नैं छै खखरी । तबे लागै छै—तोंहे विधाता के व्यक्तित्व सें परिचित नैं छै । है बात ते तहूँ जानी ले, जो नैं जानै छै ते—एक विधाते हेनो छै, जेकरो वास्तें छौड़ियो आपना के बदनाम करै में गौरव महसूस करे पारै । जहाँ देखें, जेकरा देखें—छौड़ी सिनी ओकरे चर्चा लै के बैठलो छै । ई छौड़ा पट्टी-लिखी की लेले छै, सब्बे वास्तें जेना पनसोखा बनी गेलो छै । दिन्हौं, रातहौ-बारहो मास चमकै वाला.....खखरी, ई समझवो तोरो भरमो हुए पारै कि एक यही कारण सें विद्यापीठ चलवो रुकी जैतै ।”

“ते एक काम कर शनिच्चर, केन्हौ के ढीवा के वहाँकरो प्रिंसिपल बनाय दें आरो ऊ प्रिंसिपल होय जाय छै ते विद्यापीठ आपने आप बैठी जैतै । विद्यापीठ में गाँव रो छौड़ी नैं, हमरासिनी पहुँचवै.....महिना-डेढ़ महीना आरो सालो के बात छोड़, कल्हे खम्बा-खुट्टी वहाँ गाड़ । है जेठो के रौद सें ते देहो के पपड़ी उखड़े लागलो छै । यहाँ गाछो के नीचू झरक सें मुँह जरी जाय छै, वहाँ गाछ सिनी के नीचू पर्णकुटीर होते आरो कुटीर में हमरा सिनी के होतै सीधे मोक्ष । शनिच्चर जल्दी विद्यापीठ खुलवाव आरो वहाँकरो प्रिंसिपल ढीबा बने या हमरा बनाव आकि आपने बनी जो । हौं, तोंही केन्हें नी बनी जाय छै । तोरो नामो पर विधाता हामी भरी देतौ ।” खखरी ई कही के अनचोके गंभीर बनी गेलो

छेलै ।

“सोचले ते ठिक्के छैं । सोची ते हम्मू यही रहलो छेलियै कै दिनों सें, मतरकि सपना विधाता के, फेनू ऊ पद के लायक विधाता.....हमरा के अपनैतै । तबे जों हम्मैं आपनो मनो के ई बात विधाता सें कही दियै, ते हमरा टरकावै के कोय हिम्मतो नैं करे पारे.....आरो हमरा पूरा विश्वास छै—विधाता हमरा प्रिंसिपल बनाय देतै । ओकरा खाली विद्यापीठ चाहियो । मालिक-मुखतार ऊ संस्था के कोय्यो रहे ।”

“तबे फेनू बात की छै ।”

“कुछवे नैं । खखरी, जबे आपनो सिनी के सब चाल मात हुऐ लागतै नी, तखनी बस यहें करलो जैतै । बस यही । विधाता के किंछा आरो गामो केरी छोड़ी सिनी के साक्षर करै लेली हम्मैं आपनो हित के होम नैं करे पारौ । दुसरो लागै छै कि अखोरी काका वाला जग्घा पर विद्यापीठ बनै के विरोध करी के हमरासिनी फँसी गेलो छियै । जों आबे विधाता के कहवो करवै, ते जिदयाहा के हम्मैं नी जानै छियै—खैर आबे जे हुऐ ।” कहतें-कहतें शनिचर नैं हाथ-मुँह एकबारगिये कस्सी लेले छेलै ।

७

जेठो के पड़पड़िया धूप, खौललो पानी रँ धरती पर गिरी के रुकी गेलो छेलै । पोखर ते पोखर, चानन नद्दी के ठोर-ठोर तांय सूखी गेलो छेलै । कुछ बूँदा-बूँदी होय चुकलो छेलै, यै सें ओकरो पटपरी पड़वो रुकी ते गेलो छेलै आरो जमलो पानी के सूखी गेला के कारण जोंन-जोंन पोखरी के पपड़ी-पपड़ी उघड़ी गेलो छेलै, आषाढ़ के एक अछार सें ऊ बैठी ते जरूरे गेलो छेलै, मतरकि एक अछार पानी सें ते धूप आरो गर्मी के रोआबो आरो बढ़ी गेलो छेलै । धरती पर नैं, जेना सीधे आगनी पर बुलतें रहे आदमी, भगवान के थोड़ा टा ऊपर उठला के बादे सें भुइयां हेने भट्ठी बनी जाय छेलै । दिन चुल्हा के धिपलो पुस्ता आरो खपड़ी के धिपलो बालू बनी जाय । बिहाने जे चिड़िया के चुनमुन आरो आदमी के जे शोर होय जाय, वहे भरी । की मजाल छेलै कि आँखी के सामना भगवान के ऐतें-ऐतें घोरो सें कोय बाहर निकलै के बातो सोचे पारे ।

जेकरा मौतें घेरले रहे—ओकरो बाते अलग छेलै ।

विधाता के केन्हैं विश्वास नै छेलै कि हौ धूपो में दीपा एक बहियार पार करतें आपनो घरो सें ओकरो घोर चललो ऐतै । हेना के पावो भर जमीन पार नै करै ले लागै छै, मतरकि है धूपो में चली देवो ते जाने पर खेलवो छेलै । दीया लौ रँ चमकै वाला दीपा के मुँह-धूप के कारणें, ताम्बो रँ लाल होय उठलो छेलै । तमतमैलो । कुछ कारखी लेलें । जेना जलतें लाल लकड़ी आपनो ऊपर कारखी जमैतें चललो जैतें रहे । एक क्षण ते दीपा के देखी के विधाता विश्वासे नै करलकै कि ऊ दीपा हुऐ पारें ।

“हेना की ताकी रहलो छौ ?” दीपा मुस्कैतें हुऐ विधाता सें कहने छेलै ।”

“देखी नै रहलो छियौ । हम्मैं तोरो माथो के बारे में सोची रहलो छियौ । होश-हवास रहलो छौ की नै.....है आगिन में चली के आवै के की जरूरत छेलै ।” विधाता के चेहरा पर परेशानी एकबारगिये बढ़ी गेलो छेलै ।

“की हमरो ऐवो तोरा अच्छा नै लागलौ ? की बैठे ले भी नै कहवौ ?” दीपा के चेहरा पर अभियो वहे मुस्कान छेलै ।

“अरे ई बात नै छै दीपा । हमरो कहै के मतलब तोहें नै समझलौ । पहिने यहाँ आवी के तोहें बैठो । यै ठाँ ।” विधाता बड़ा प्यार सें ओकरो हाथ पकड़ी के खटिया के सिरहौना दिश बैठाय देलें छेलै, जहाँ नद्दी के किनारी-किनारी पसरलो बँसबिट्टी सें ऐतें हवा सीधे पहुँची रहलो छेलै । शीतल हवा के झोंका लगथै दीपा के आँख कुछ क्षण लेली बंद होय गेलै । दीवाल सें अटकी के आपनो के निढ़ाल छोड़ी देलकै—कुछ क्षण लेली ।

“तोहें थोड़ो देर लेली आराम करो । हम्मैं तोरो आवै के खबर भाभी के करी दियै ।”

“कैन्हें, हमरा सें असकल्ला में डोर लागै छौ ।” दीपा आपनो आँख मुनले-मुनले कहलकै ।

एक क्षण लेली ते विधाता सोचै नै पारलकै कि दीपा के की जवाब दै । फेनू बिना कुछ बोलले, ऊ कल्ले-कल्ले दीपा रो एकदम्मे नगीच पहुँची के ओकरो कपार पर बूंद नाँखी बनलो घाम के आपनो कमीज के एक छोर सें उठाय लेलकै । दीपा के लागलै, जेना कोय केकरो सबटा ताप हरी लेले रहे, जेना केकरो तपासलो कंठ में हेमाल जल उढ़ेली देले रहे । ई सब एक क्षणे में होय गेलो रहै । केना, कोय नै जाने पारलकै । पर दीपा बिना कुछ दुसरो भाव देखैले आकि बिना ई बतैले कि आभी कुछ होलो छै, आपनो नींदवासलो

हेनो आँखी के खोललकै आरो सिरहानै में आपनो दिश झुकलो विधाता के देखी ओकरो दोनो तरह्थी आपनो हाथों में लैके वही में आपनो मूँ छिपाय लेलकै । मतरकि जल्दिये दीपा सचेत होय के फेनू बैठी गेलो छेलै, जेना कांही कुछ नैं भेलो रहे ।

“कांही भांग खाय के ते नैं चललो छै ?”

“खाय के ते नैं चललो छियै । मतरकि सोचले छियै, अबकी आवै वाली होली में वही कलाली में जाय के खूब महुआ पीवै, जहां तोरा सिनी.....।” आधे बात कही के दीपा कोनराय के बहुते मिललो-जुललो भावो से विधाता के देखने छेलै ।

दीपा के बात सुनहैं विधाता खिलखिलाय पड़लै । कहलकै, “पीयै छेलियै, हौ कहौ ।” फेनू ओकरो कानो के पास आवी के धीरे से कहलकै, “कहियो गाँमो से तोहें जाय के है बात कहलौ नी, ते हम्मैं वही निसांव में वहाँ पहुँची के तोरो नाम लै-लै के तोरो नाम अमर करी देबों । समझलौ ?”

“एखनियै नैं करी देले छै की ?” दीपा नैं बड़ी अर्थपूर्ण आँखी से ओकरा देखने छेलै, “खैर छोड़ो, हमरो यहाँ आवै के कारण पुछवौ की नैं ?”

“हमरा से मिलवो आरो की ।” आँखो में हँसते हुँ विधाता कहलकै ।

“जी नैं, यै कामो वास्ते तोरा हमरा कन आवै ले लागतौ । हम्मैं ते तोरा एक खास बात बताय ले ऐलो छियौ । आपना के रोके नैं पारलियै ते ई कड़कड़िया रौद में आवै ले पड़लो । बाते कुछ हेनो छै ।”

“ऊ कोनो बात रहे दीपा । कत्तो महत्वपूर्ण, तोहें है रँ धूपो में नैं निकली गेलो करो । तोरा नैं मालूम, तोहें धूपे रँ हमरो जिनगी वास्ते छँह छेकौ, छँह बनलो रहो, छँह में चलते रहो । कभी होलै ते हम्मैं तोरो घरो से लैके आपनो घरो ताय केला के गाछ लगाय देवै, जेकरो छँही में चली तोहें यहाँ, हमरो घोर ताय आवे सको ।”

“हम्मैं तोरो वास्ते छँह की बने पारभौ । तोरा याद भी करै छियौ ते हमरा लागै छै, तोहें एक विशाल बोर गाछ बनी गेलो छै, कभी पीपल के झबरलो गाछ आरो हम्मैं वही नीचू में तोरो छाया के शीतल हवा पावी के कभी बाँसो के आरो कभी पीपरो के पत्ता नाँख बेसुध डोलते रहै छी.....सोचै छियै—एत्तो भावुकता की ठीक छेकै ।” कहते-कहते दीपा के आँख झुकी गेलो छेलै ।

“दीपा, जे भावुक नैं छै, ऊ जीवन के जान्हौ नैं पारे । खाली आँखी से

नदी के देखला से नैं ते ओकरो भीतरिया रेत के पता लागै छै आरो नैं ते नदी के शीतलता के । आदमी रो भावुकता ते आदमी के कला छेकै, जीवन के भीतर ताँय झाँकै के यंत्र । ई भावुकता धरती के आदमी के ईश्वर के सबसे बड़ो भेंट छेकै, जे सब्हे के नैं मिले पारे, नैं मिलै छै । ईश्वर से जेकरा ई जत्ते ज्यादा मिललौ छै, ऊ ओत्ते बड़ो कवि, कलाकार, चिंतक बनी गेलो छै । मतरकि तोहें कुछ कहै ले जाय रहलौ छेलौ.....”

दीपां आपनो मूड़ी दू-तीन दाफी दाँया-बाँया हूँ-हूँ करतें डोलैलकै, जेना कहै वाला बातों के सोझरैतें रहे आरो एक बारगिये कहना शुरू करलकै, ‘हों ते तोरो मित्र शनिचर दा हमरो लुग ऐलो छेलौ । कही गेलो छौं—अखौरी काका के कोय आपत्ति नैं छै-जों विधाता हरगौरी काका के परपट वाला जमीनो पर विद्यापीठ खोलै ले चाहै छै, ते खोलै । हममें अखौरी काका के सब तरह से समझाय देने छियै ।’ तबे ते हमरो सिनी के सपना पूरा समझो । अरे, ई सुनी के तोरा कोय खुशी नैं भेलौ ?”

“बिल्कुल नैं ।”

“कैन्हें ?”

“कैन्हें कि विद्यापीठ आबे हरगौरी काका के जमीनो पर नैं बनतै । जों ई बनतै, ते चानन नद्दी वाला चौर में, जेकरो तीनो ओर शीशम के जंगल खाड़ो छै । हों ।”

“ई हठाते तोरो निर्णय बदली जाय के हममें कारण जाने पारौ ।”

“एखनी हममें ठीक-ठीक नैं कहे पारौ । मतरकि कल रवि जोर दै के हमरा कही गेलो छै, ‘विधाता, विद्यापीठ खुलतै ते चानने वाला जमीनो पर—कुछ बसै, कुछ उजड़ै—हैं नैं होतै । नया कुछ करला से बेहतर यही होतै कि हमरा सिनी पुरखा रो बनैलो सम्पत्ति-कृति के बचावौ । यहै पैहने जरूरी छै, जरूरिये नैं, नया पीढ़ी रो सबसे बड़ो कर्तव्य ।’ बड़ी गंभीरता से कही गेलो छै चक्रवर्ती ।”

“मतरकि ई बातों के पीछू रहस्य की हुऐ पारे ?”

“हमरा लागै छै । चानन के शीशम-जंगल कारण छेकै । पहने ते एकाध गाछ कांही-कांही कटलो दिखै छेलै, मतरकि पाँच साल के भीतरे की रँ चानन नद्दी के पछिये नाढ़हो होय गेलो छै, तहूँ देखले छौ । आखिर हौ गाछी के काटी के रहलो छै ? बाहरी वाला के साहस हुऐ नैं पारे, जब ताँय नद्दी के आस-पास वाला साथे गामो के लोगो के ये में हिस्सेदारी नैं हुऐ । कै दफा मिटिंग बैठलै, खोज-खबर लेली । के-के खुली के सामना में ऐलै ? ये से अर्थ निकलै

छै, यहुँ गामो के लोग एकरा में जुटलो छै । वन विभाग के अधिकारी ते देखशोभा.....दीपा, जंगल के तीन कोना हमरा सिनी के गामो में पड़ै छै, ये लेली एको रक्षा के भारो पहिने हमरे सिनी पर पड़ै छै ।”

“ते तोंहे की सोचै छै ? ये में शनिचर दा के सांठ-गांठ छै आरो यही लेली हुनी अखोरियो काका के जमीन दै ले मनाय लेले छै, ताकि विद्यापीठ चानन पट्टी में खुले के बदला वहीं खुले ?”

“दीपा, ये बारे में हममें कुछ नै कहै पारौ । मतरकि, शनिचर के हममें जानै छियै । ऊ आपनो दिमाग से चले वाला कम, दोसरो के बातों पर रहे वाला अधिक छै । कोय ओकरा मनो से समझाय ते दौ कि हममें ओको दुश्मन छेकियै, ते हुँ सकै छै, वे यहू मानी ले.....तखनी ते ऊ आपनो दिमागो से कामे ले वाला नै.....एकरहू में कोय अचरज नै कि गामो के दू-चार आदमी लोभो में ओकरा फँसाय लेले रहे या फेनू फुलाय देले रहे । शनिचर के गाछी से की लेना-देना, ऊ ते आपने जंगल के मालिक छै, ओकरे गाछ कटी जाय छै ते ओकरा मालूम तक नै होय छै । जेभी हुँ, रवि ठिक्के कही गेलो छै, आबे हमरा सिनी पर दोहरा जिम्मेदारी आवी गेलो छै—अमृत बचैयो के, अमृत बाँटहू के ।”

आपनो बात कही के विधाता एका-एक एकदममें खामोश होय उठले । हुन्ने दीपाहू कोय चिन्ता में लीन होय गेलो छेलै । शायत अमृत के बात ऐहें दोनों ई सोचे लागलो छेलै कि अमृत से सूनो होय के आय मन्दार केन्हो सूनो होय गेलो छै । कल एको पेटो में अमृत बसे छेलै ते देवता-दानव सब्भे एकरा से सटलो रहै । आय ओको अमृत छिनाय गेलो छै ते ओकरा पर देवता सिनी ते की, आदमियो सिनी कभिये काल दिखाय दै छै । मनारे के भूमि पर नी बही रहलो छै ई चानन नदूदी । एको अमृत ते सुखिये रहलो छै, एको गाछ जे अमृत के कथाहे नौखि छै, कल ई कथाहू नै रहतै, तबे ? तबे की होतै ?की होतै तबे ?.....दिन के तमतमैलो धूप के साथे-साथ दोनों के प्रश्न-चिन्ता-शंका, ऊ धूपो से कहीं बढ़ी के दोनों के मन-प्राण के बेचैन करहें रहलै, करथें रही गेलै । घंटो ।

“आव विधाता, आव । आबे ते तोहें हमरो लुग आन्हें-जान्हें छोड़ी देनें छें । ई विद्यापीठ की तोरो दिमागो में धँसी गेलो छौ कि दोस्तिये पार ।” शनिचर ने विधाता के नगीच ऐला पर कहलकै आरो आपनो छाती में कस्सी लेलकै । शायत विधाता ने साल-दू साल रो बादे शनिचर के आपनो सीना से हेनो लगैनें होतै । कुछ देरो लेली दोनों के मनो से एक-दूसरा लेली वैर-भाव, शंका सब मिटी गेलो छेलै । दोनों एक होय गेलो छेलै, जेना दू हुऐ के भाव कभी रहले नै रहे ।

“बैठ मरद, बैठ ।” शनिचर ने फेनू विधाता के आपनो बगलो में हाथ खींचते बैठाये लेनें छेलै आरो कहना शुरू करनें छेलै, “ते तोरा खबर होये गेलो होतौ कि हममें अखौरी काकाहौ के तैयार करी देनें छियौ, जमीन दै ले । ई बात हममें हफ्ता भरी पहिनें दीपा के घोरो पर जाय के कही ऐलो छेलियौ कि वें तोरा खबर करी दौ । तोहें ते आय कल हमरहौ से नहिंये मिलै के कसम खाय लेनें छें । मनो में कुछ समाय गेलो छौ की विधाता ?”

“है सब ते तोहें बेकार सोचै छें । एत्तो बड़ो काम माथा पर लेनें छियै । दिन-रात वही में डुबलो रहै छियौ ।” निश्छल मनो से विधाता कहनें छेलै ।

“जो वही में डुबलो रहै छें ते कोय बात नै । मजकि आरो कहीं डुबलो रहै छें आरो हमरा सिनी के भुलाय देनें छें, ते ई अच्छा नै ।” आपनो हथेली पर खैनी रगड़ते चौरासी खैनी के कुछ जोरो से दाबते हुऐ कहनें छेलै, जेकरा सुनियो के सब्भे अनसुनी करी देनें छेलै—जेना वै बातों में कोय गंभीर बात नै छिपलो रहे । खाली रामलोचन ने एकबार जरूरे कहनें छेलै, “विधाता, जरा चौरासियो के बातों पर ध्यान दिऐ । अरे, चौकड़ी में बैठी के जवान भेलें, ओकरौ ते आपनो जवानी के मजा दें ।” रामलोचन के बातों पर कोय बतकही नै करै छै, केन्हें कि ऊ जल्दिये आपनो ताव में आवी जाय छै । सब दोस्त ओकरा से हड़कले रहै छै । मतरकि रामलोचन के व्यंग्य बोल सुनी के शनिचर भड़की गेलै आरो बोललै, “यहे रँ तोरो सिनी के बोली-चाली रहलो ते विधाता के आबे बाते छोड़, हम्मू ऐवो-जैवो बंद करवौ । की बोलें छें—नापी-तौली के बोललो करें । यही बोली के कारणे हम्मुओ जाय छी । बोलै छें तोरा सिनी आरो लोगे कहै छै—शनिचरा के प्रभाव छेकै । खाली घसोटी-घसीटी के बी० ए० पास करला से सब कुछ नै होय जाय छै रामलोचन ।”

“देखें, ज्यादा टनटनाव मैं शनिचर । हममें एखनी जरा टा बोललियै तें वेद बाँचे लागलैं आरो जखनी आपने महुआ पीवी के लंकाकाण्ड बाँचे छेलैं, तखनी ।”

“अरे छोड़ें रामलोचन, एक ते तोहें रामलोचन, ओकरो बाद रावनों हेनो गुस्साहा होय गेलैं ।” विधाता माहौल के शांत करै के ख्यालो से कहलकै ।

“नै-नै, रामलोचन के अभी बोले दें विधाता । अबकी दुर्गापूजा के नाटको में एकरा पाट रावने के मिलै वाला छै । एखनिये से रिहलसल करतै, तब नी..... ।” आपनो तलहथी से मूड़ी टेकने पट्ट लेटलो ढीवा नें कहलकै आरो सब्भे एक्के साथ हाँसी पड़लै ।

विधाता कहने छेलै, “है होलै नी प्रेमो के बात ।”

“अच्छा, छोड़ ई सब बात के । तोहें आवै के कारण बताव । हममें समझै छियै—तोहें यहै कहै ले ऐलो होवैं कि विद्यापीठ के काम हरगौरी का वाला जमीनों पर जल्ले जल्दी हुए, शुरू करवाय देलो जाय । यहै नी ?..... ते एकरा में की छै.....एखनी ते बारिस शुरूवे भेलो छै । खेती-बारी शुरू होय में आरो दस-बीस रोज देर होय के मानिये के चलै.....खेती-बारी शुरू होय गेला के बाद ते मोर-मजूर मिलनाहौ एकदम्मे कठिन । हों एखनी गामों के मजूर के ये कामों में भिड़ाय देलो जैते ते हममें समझै छियै कि खेती-बारी शुरू होतें-होतें तोरो छप्पर-छौनी आरो दीवाल वाला काम नहियो होतौ ते रोपनी के बाद दस-बारह दिनों के भीतरे होन्है-होना छै । कमरूद्दीन, रवि आरनी के की विचार छै । वसन्तका आरो कमरूद्दीन ते खैर.....तोरो जे इच्छा, वही हुनको इच्छा ।”

“देख शनिचर, जहाँ तौय कमरूद्दीन, गंगा आरो वसन्त का के बात छै, वै सिनी से ई सम्बन्धों में कोय बात मैं होलो छै । मजकि रवि के आबै यहै इच्छा छै कि विद्यापीठ चानने पट्टी में बने, ये लेली ऊ चार दिन पहनें भागलपुर चल्लो गेलो छै । वहाँ जिलाधिकारी से जमीन पर विद्यापीठ खोलै संबंधी बात-विचार करतै । बात ते हम्मू करे सकै छेलियै, मतरकि जिलाधिकारी के पी0 ए0 रवि के दूर के सम्बन्धी छेकै, से काम आरो आसानी से होय जाय के आशा छै ।”

“के रवि ?.....रवि चक्रवर्ती ? की रवि सिन्हा ?”

“रवि चक्रवर्ती ।”

“ते तोरो वास्तें रविये खास आरो कमरूद्दीन, गंगा, खुशी आरनी कोय नैं । ओकरो सिनी के विचार ते लेतियै, आखिर वै सिनी भी की चाहै छै ।”

“हे बात केकरौ सें नैं छुपलो छै कि रवि, गंगा, कमरुद्दीन आरनी में कोय भेद नैं छै । कोय एकें बोली देलकै, सबके बात छेकै । यहाँ लेली वै सिनी सें आभी कोय बात नैं करने छियै । काम होय जैतै ते बताय देवै ।”

“आबें तोरा सिनी के जे मरजी । हममें ते ई समझलियै कि कमरुद्दीन हरगौरी का के जमीन हासिल करै में कहीं हमरूहै नैं भांगटो मानतें रहे, यै लेली अखौरी का के सामना गिड़गिड़ावौ ले पड़लै । वै में भी तोरो आशा, किंछा के बात छै, नैं ते शनिचर केकरो आगू घिघनै ले नैं जाय छै.....जों रविया आकि तोरुहो हेने विचार छेलौ ते पहनें कही देतियैं..... ।”

“देख शनिचर, पहिले सें हेनो कोय बात नैं छेलै । जमीन पावै में भांगटो देखिये के ऊ जग्घो निश्चित करलो गेलै । आरो आबें ते हेनो लागै छै कि यही फैसला आखरी बनी के रही जैतै.....शनिचर, जों विद्यापीठ खुलना छै ते चानने पट्टी में खुलतै, हमरो यहें इच्छा बनी गेलो छै ।”

“देखें रे, तोहें विद्यापीठ मशानी में बैठावें कि जंगलो में, हमरा जरूरे वैं में मास्टर राखी लिए ।” एकोसी होय के आबें ताँय लेटलो एकबारगिये उठी के बैठतें हुए धीरेन्द्र कहलकै ।

“कैन्हें ? आबें पुरोहिताय में मोन नैं लागै छै ? की आरती में आबें पैसा नैं आवें लागलो छै ?” विधाता हँसतें होलो कहने छेलै ।

“पैसा ते आविये जाय छै । मतरकि आबें है पुरोहिताय में गौरव नैं रही गेलौ । पूजा-पाठ करैलकौ, पंडित बुलैलको ते जेना पंडिते पर कृपा करी रहलो रहे.....फेनू की बतैयो पिछलका महिना के बात । चेतू काका के यहाँ पूजा छेलै—सतनारायण प्रभु के । हमरा बोलैलकै ते बोलैवे करलकै, मतरकि आबें की कहियो विधाता—ओकरो बेटा विशेषर काँही सें ऐलै । गोड़ देखी के समझी गेलियै कि ऊ नशा में छै । हमरा पूजा पर बैठलो देखलकै ते लागलै बक्के, “पंडित को कौन घर में बुलाया । हम्मू पंडित है । कौन बोला है कि खाली पंडिते ब्रह्मा जी के मूँ से जनमा है, हम्मू जनमा है ।”.....तखिनको दृश्य की कहियो विधाता । सीधा-सादा चेतू काका, कभियो ओकरा ऐंगना सें खींची के बाहर करै ले चाहै, कभियो हमरो गोड़ पकड़ी के कहै, “पंडी जी, विशेषर के बातों के कभियो बुरा नैं मानियो । जे-जे मंडली सें सीखी के आवै छै, बोलै छै । पीला के बाद ते एकदम्में मतछिमतो होय जाय छै ।” लगे चेतूका विशेषरो के गोड़ पकड़ी समझावै, “बेटा, तोरो ते जन्म होने होलो छै, जेना सबके होय छै । होश में आवें बेटा, नाम हिनिस्ताय नैं करावों, आबें की बतैयो विधाता, हममें जानै छियै कि चेतू काका जे टा बोली रहलो छेलै, ऊ सब्भे कुछ साफ मनो सें, मतरकि

तखनी हमरोँ हाल केन्होँ होय गेलोँ होतै, आबेँ तोरा सिनी सोचेँ पारैँ । आरो तखनिये हम्में सोची लेलेँ छेलियै भाय, है रँ पुरहैतगिरी नै करना छैदेख विधाता, तोहें विद्यापीठ खोलवें तेँ तोहें वै में प्रिंसिपल रहें-न-रहें, हमरा मास्टर वै में जरूरे राखी लियें ।” कहतें-कहतें धीरेन्द्र लागलै जेना रूआंसा होय जैतै ।

“तेँ एकरा में व्याकुल होय के की बात छै धीरो । तोरोँ मास्टरी वै विद्यापीठ में एखनिये सें निश्चित । की विधाता ?” शनिचर नें हक दिखैतें कहनें छेलै ।

“मरदे, तोहें बोली देलैं, आबेँ वै में दुसरोँ बात कहाँ रहलै ।”

“अच्छा यही बातों पर मंगवैय्यो ? लेवें ? मरदे आबेँ तेँ तोहें ठिक्के संत-महात्मा बनी गेलोँ छैं । बोल मंगवैय्यो ? हमरो मोन छै ।” शनिचर नें फेनू एकदम आपनोँ होतें कहनें छेलै । मजकि विधातां साफ इनकार करी देनें छेलै, “शनिचर जेकरा सें परहेज करी लेलियै, करी लेलियै—वैसेँ आबेँ मोहे की ? मोह वास्तें तेँ ढेरे सामना में पड़लोँ छै । आदमी, समाज, जल, जंगल, जानवर सें जों हमरोँ मोह होय जाय नी तेँदुनियाँ के बात छोड़—ई गाँव आकि टोलाहै केँ अच्छा बनाना शुरू करी दियै नी, तेँ एक दिन ई दुनियाहौ आपने-आप स्वर्ग बनी जाय । दिक्कत तेँ ई छै शनिचर, कि लोगें आपना केँ, आपनोँ टोलोँ-गाँव छोड़ी केँ देश-दुनियाँ सुधारै पर भिड़लोँ होलोँ छै । जेकरोँ घोर अन्हार रहेँ, ओकरोँ दुनिया केँ रौशन करवोँ बस ढोंग छेकै-ढोंग ।”

“छोड़ भाय, नै लेवें तेँ आबेँ माथोँ माँटी नै करें । आरो सब सुनाव ।”

“शनिचर, हम्में एगो खास कामोँ सें तोरोँ पास ऐलोँ छियौ ।”

“बोल.....अच्छा चल, खेतोँ दिश सें घूमी आवै छियै । ढेर दिन होय्यो गेलै तोरोँ साथें घुमलोँ ।” शनिचर विधाता केँ लेलेँ एक ओर सीधियाय गेलै—धीरेन्द्र, प्रफुल्ल, चौरासी आरनी केँ वांहीं छोड़तें हुएँ ।

“बस यहै बात शनिचर के अच्छा नै लागै छै । कुछ देर पहिनेँ विधाता के एन्टी छेलै आरो एखनी देखवे करलैं । हमरा सिनी केँ हेनोँ छोड़ी गेलै, जेना हमरहै सिनी एन्टी रहौँ ।” ढीबा, जे अब तांय चुप्पे छेलै, आँख-मूँ नचैतें हुएँ कहलकै,

“देख ढीबा, आपनौ शनिचर छेकै नेता । आरो नेता के चाल-चलन इस्थिर होतै तेँ चलतै ? अरे नेता तेँ बदरकटुवोँ रौद होय छै । छायाहौ में देह जराय वाला ।” धीरेन्द्र आहिस्ता सें फुसकलें छेलै ।

“की बोललैं धीरो—शनिचर माने बदरकटुवोँ रौद.....अरे मरदे, अनिरुधे हेनोँ, शनिचरों की हमरासिनी केँ कुछ बुझै छै । पर करियै की । हमरा

सिनी तेँ लत्तर वाला गाछ, नै केकरोँ संग, तेँ झरबेरिये-बबूले संग । खाड़ोँ तेँ
होन्है छै.....ही..ही...ही ।.....हे.....हे.....हे.....हे । हो.....हो.....
हो.....हो.....हो । एक्के साथें सब्बे ठठाय पड़लै ।

६

केकर्हौ विश्वास नैं छेलै कि अबकी बारिश एत्तेँ जल्दी गिरी पड़तै ।
अखाड़ के पहिले दिनोँ सें मेघ बरसवोँ जे शुरू भेलोँ छेलै, ऊ लगातारे पड़िये
रहलोँ छेलै । एकदम सौन-भादो नाँखि । लागै छेलै, खेती-बारी के काम ई साल
जल्दिये शुरू भै जैतै, मजकि बीहन डाललोँ केना जाय । जे रँ खेतोँ में पानी
उपटी रहलोँ छेलै, बीहन बहिये जैतियै आकि गलिये जैतियै । से गाँवोँ के सब्बे
खेतियर बारिश के थमै के इन्तजारी में आपनोँ-आपनोँ घरोँ में बैठलोँ छेलै ।

विधाता के खेती केना होतै, एकरोँ भार अबकी शनिचरे पर छेलै । गाँव
सें शहर जाय वक्ती वें शनिचर सें कही देनैं छेलै, “दोस्त हमरा शहर सें लौटै में
महिनो लागी जावें पारें । यै बीचोँ में जों बारिश गिरी जाय आरो बीहन-बीचड़ोँ
डालै के काम शुरू होय जाय, तेँ हमरोँ खेतोँ के भार तोरे ऊपर रहलौ । भाइयो
के उमिर होय चललोँ छै, आबें हुनका सें खेती-बारी नैं होय छै, देखवे करै छैं
.....जमीन जग्घोँ वाला बात छेकै । कमिश्नर साहब कखनी रहतै, कखनी नैं
रहतै । कबेँ कागज तैयार करतै—है सब के जानै छै । आरो जब ताँय कागज नैं
तैयार भै जाय छै—लागै छै, दम मारी केँ वांहीं कुछ दिन रहै लेँ लागतै.....आरो
जबेँ तोहें यहाँ छैं तेँ हमरा घरोँ के चिन्ते कथी लेँ ?” शनिचर विधाता के कोय
बातोँ के विरोध नैं करेँ पारलेँ छेलै । करौ नैं पारै छेलै । पता नैं कैन्हें विधाता
के कोय बातोँ केँ टाली देवोँ ओकरा सें हुएँ नैं पारै ।

“से बात तेँ ठीक छै विधाता, मतरकि खेती-गृहस्थी के बात छेकै नी,
जरा रुकी केँ ई काम करिये लेतियैं तेँ अच्छा । किसानोँ लेँ तेँ यहें सोनो
रँ समय होय छै ।”

“शनिचर, हमरोँ लेँ आबें इस्कूल वाला सपनाहौ कम नैं छै । सच कहैं
तेँ खेती सें ज्यादा महत्वपूर्ण । तोहें मजूर लगाय दियैं । बाकी काम तेँ दीपाहौ
देखी लेतै । हम्मैं दीपाहौ केँ कही देलेँ छियै.....” ई कही विधाता गाँव छोड़ी

देनें छेलै आरो ठीक ओकरो गेला के पाँचे रोज बाद जेना हथिया-कनिया वाला बारिश शुरू भै गेलो छेलै ।

आषाढ़ के ठीक छठमो दिन के भोरहै सें जे बरसां गरजवो-पड़वो शुरू करनें छेलै ते रुकै के नामे नैं लै रहलो छेलै । तुरत-तुरत मलका-मलकवो आरो ठनका के ठनकवो सें सौंसे इलाका धड़-धड़ करी रहलो छेलै.....पलनिया वाला आपनो दुआरी पर बैठली दीपा आपनो दोनो कानो के भुरकी में अंगुरी दुकैनें कत्ते देरो सें ठनका आरो मेघो के तमाशा देखी रहलो छेलै । कै बार ओकरो नानी ओकरा सें कहनें होतै, “दीपा, खटिया भीतर करी ले बेटी, झटका सें भींगी जैवै । पहिलो बारिश छेकै । जो कहीं डसी जाय, ते सौ बलाय लानी दै छै ।” मजकि नानी के बातो पर दीपां कोय ध्याने नैं देले रहे । पैर लटकैनें खटिया पर बैठलो-बैठलो सामनाहै में झड़ी में बिलैते दूर-दूर तक के गाछ-बिरिछ के देखते रहलै.....गाछ-बिरिछ, जे मुसलाधार बारिश में पानी-पानी बनी के बही रहलो छेलै.....झम-झम-झम । कड़.....कड़.....कड़.....कड़ाक.....कड़ाकई सब सें गदगदाय के भीती के भुरभुरो मिट्टी में नुकैलो कन्नौ झिंगुर नैं आपनो मसक बाजा शुरू करी देनें छेलै । हेना में कै दिन्है सें दीपा आपना में नैं रहे पारी रहलो छै । कोय रहौ नैं पारे—ई मेघा, बरसा, ठनका हेने चीज होय छै । दुआरी पर बैठलो-बैठलो दीपा के लागै छै—ई ठनका के आवाज आरो जोत आवाज आरो जोत नैं छेकै, वो र ही जेना बरियाती-गाजा-बाजा साथें चलतो आवी रहलो छै । ठनका के जोत छिनमान जेना आतिशबाजी आरो बीहा-शादी वाला बम फूटी रहलो रहे, जे धीरे-धीरे एकदम नगीच ऐलो जैते रहे..... दीपा सचमुचे में लाजो सें एकदम सुकुड़याय के बैठी गेलो रहे । दोनो ठेहुना के बीचो में आपनो माथो गोती.....ओहारी सें गिरते लगातार बूंद आरो झिंगुर के पुकार—ओकरो मुनलो कानो के छेदी के जबे भीतर ताय जाय, तबे दीपा के लागै, जेना ऊ डोली में गुड़मुड़ियैलो बैठली छै आरो ओकरो नानी भारी कंठो सें गावी रहलो छै,

बड़ी रे जतन सें हम सिया धिया के पोसलीं

सेहो रघुवंशी लेले जाय

कौनें रँ डोलिया सें कौने रँ ओहरिया

कौनें रँ लागलै कहार

तेज हवा के झोंका सें बरसा के बूंद फुन्सी बनी-बनी दीपा के चेहरा पर बिखरी जाय छेलै आरो ओकरो स्पर्श पावी के ओकरा यही लागी उठै, जेना कानती-कपसती

नानी के लोर ओकरो देहो पर गिरी रहलो छै । तहियो भरलो गल्ला सें नानी गैतें जाय रहलो छै,

हाथी-हथसरा रोवै, घोड़ा-घोड़सरा रोवै

रानी जे रोअत रानीवास ।

दीपा के मोन—नानी रो गाँव आरो गाँव के सखी भर सें बिछोह के बात सोची के एकदम व्याकुल होय उठलै आरो ओकरो हाथ अनचोके कानो सें हटी के आगू बढ़ी जाय छै—आपनो नानी, सखी सें गल्लो मिली जाय लेली,

मिली लेहु, मिली लहु संग के सहेलिया हे

सिया बेटी जैती ससुरार

पर सामना में कोय नैं छेलै । नैं नानी, नैं सखी । कोय्यो तें नैं । तभियो ओकरो सपना कैन्हें नी टूटी रहलो छेलै । वैं जानी के तोड़ै ले नैं चाहै छेलैआपनो आँख दीपा फेनू सें मूनी लेनें छेलै आरो खनै बाद वहे आतिशबाजी, वहे बरियात, वहे नानी के कपसवो, वहे सवासिन सबके मने-मन सियारे लागलै छेलै

एक कोस गेली सिया जी, दुई कोस गेली

तेसर कोस लागलै पियास

आरो सचमुचे में दीपा के कंठ पियासो सें बेकल होय ऐलो छेलै । छटपटाय के देखलै छेलै—वहे झमझम बारिश । वहे हो-हो हवा ।

“तोहें पगलाय गेलो छैं कि दीपा ? झटकवा सें तोरो सौंसे देह भींगी गेलो छौ आरो तोरा कुछु होशे नैं । की सोचते रहै छैं, की गुनतें रहै छैं, समझनै मुश्किल ।” भीतरी सें नानी दनदनैली ऐली आरो खटिया पर सें दीपा के उठैतें कहनें छेलै, “तोरा होय की गेलो छौ आयकल, जों दुआरिये पर बैठलो रहना छौ ते कोठरी आरनी के सोर करवाय दें ।”

नानी के बात सुनी के दीपा एकदम होश में आवी गेलो छेलै । वैं नानी के बातों पर गौर करनें छेलै, “तोरा होय की गेलो छौ आयकल”—ठिक्के ते आयकल ओकरा कुछु होय गेलो छै । नैं ते दुआरिये पर कथी ले बैठलो रहै छै—केकरो बाट जोहतें रहे छै ?

“तहूँ ते नानी, हमरहै पीछू लागलो रहैं छैं । पाँच मिनिट बाहरो में बैठिये गेलिये ते की ? तोरा ते तभिये शांति, जबे कि हममें तोरो पीछू-पीछू लागलो रहैं आकि तोहें हमरो पीछू-पीछू ।.....आबे तोहीं सोचैं.....कल पानी थमतै.....फेनू बीहन गिरतै.....विधाता शनिचर दा पर भार दै गेलो छेलै आरो शनिचर दा सें भेंट नैं होय रहलो छै । ई झोड़-पानी में कोय दिखैवो नैं करै

छे जे ऊ टोला ताँय संवादो दै आवै । आबे तोंही सोचै—जे हमरा सिनी पर खेती के भार दै भागलपुर चल्लो गेलो छै, की वै बारै में सोचना हमरा सिनी के धरम में छेकै.....वहे ते सोची रहलो छेलियै ।”

“बेटी, ई धरम सोचै ले ते जिनगी पड़लो छै । आपना के बचावें—यहू धरमे छेकै ।” कहतें-कहतें नानी खटिया उठैनें सीधे घोर चली देनें छेलै । चौखटी के मोखा सें सट्टी के खाड़ो दीपां सोचै लागली—नानी है की कही देलकै, “धरम सोचै ले ते जिनगी पड़लो छै,.....की नानी हेन्हें कही देलकै, बिना कुछ सोचले ? की नानी.....नै नानी हेन्हें नै कहले होतै । कुछ मानें, कुछ रहस्य जरूरे छै ई बातों में.....ते की नानी कहीं हमरो कमजोरी ते नै पकड़ी रहलो छै.....आखिर हमें विधाता वास्तें एत्ते सोचै कैन्हें लागलो छियै.....के होय छै विधाता हमरो ? कोय ते होय गेलो छै, नै ते है रँ दीपा ओकरे बारे में सोचते कैन्हें रहे छै.....खेतें, पीतें, उठतें-बैठतें, जागतें, सोतें, पागल करी देनें छै विधातां ओकरा..... ।

“दीपा S S S.....”

“की ई.....ई.....ई.....” दीपा के चेहरा आरो बोली में अनचोके खीझ उभरी ऐलो छेलै आरो भीतर आवी के ओसरा पर बिछाय देलो गेलो खटिया पर धम्म सें गिरतें कहनें छेलै, “आबे ते संतोख होय गेलों नी कि दीपा कैदी नाँखि जेलो में बन्हलो छै.....ले हमें सुतलियौ, हमरा जिनगी भर जगाय के जरूरत नै छै ।” ई कही के दीपा खटिया पर चित्त होय गेलो छेलै । आपनो दोनो आँख मुनी लेनें छेलै । शायत पैहिलके वाला सपना आँखी में खीची लानै ले । मजकि एकबार जे सपना बिगड़ी जाय छै, ऊ की दोबारा बनैलौ सें बनी जाय छै ? सपना ते सपना छेकै.....आपनो काहीं होय छै ? ते दीपा के केना होतियै.....मजकि ऊ सपना केन्हो सुन्दर सपना छेलै ! आँखो सें केन्हें के दूर करवो मुश्किल । वैनें करवट लेलकै, नानी दिश पीठ करी के । शायत करवट लेला सें ऊ सपनाहीं करवट लै लियेनानी नै दीपा के कनखी सें देखले छेलै आरो ओसरा के पानी उफची-ऊफची के ऐंगना में फेकवो रोकी के अँचरा सें आपनो मूँ के हँसी रोकै में बेहाल होय गेलो छेलै ।

सात दिनों तौय बारिश गदगदैतें रहलै । लोगें कही रहलौं छेलै—सताहा ते देखले छेलौं, मजकि हेनो सताहा नैं, जेहनो अबकी धूप-गर्मी पड़लै, होने बरसो । निनौन पुराय देलकै बारिश नें । बाप रे बाप, है रँ के.....नानिये-दादिये के मुँहो सें सुनै छेलियै, से अबकी देखी लेलौं.....सात घरो सें तेल माँगी के दीया जरैलो गेलो छेलै, इन्दर भगवान के खुश करै लेली—तबे कांही बरसा रुकलो छेलै । कत्ते के घोर भांसी गेलो छेलै आरो कत्ते के दीवार गिरी के ऐंगन उदामो । केकरो छप्पर गिरी गेलो छेलै, ते केकरो सौंसे घरे बही गेलो छेलै । कोय हेनो घोर नैं छेलै, जेकरा हानि नैं पहुँचलो छेलै ।

मजकि ई बात के जत्ते चरचा छेलै, ओकरीं सें ज्यादा चर्चा छेलै, चानन नद्दी के उतराही दिश शीशम गाछ के ई बारिश में अलोपित होय जैवो । गाछ के अलोपित होय जाय के कारण के ले के गाँवों में दू खेमा साफ-साफ बनी गेलो छेलै । हालाँकि दोनो खेमा आमना-सामना होय्यो के एक-दूसरा सें कुछ नैं बोलै छेलै । पर एक कान सें दू कान, दू कान सें तीन । बात काँही दबलो रहै छै, आरो गाँवों में ? यहाँ ते लोगो के एकरो पता रहै छै कि फलनमां नें दिनों में एत्ते बार साँस लेलकै आरो चलनमां नें दिनों में एत्ते बार । गाँवों में ते भगवानो के नाँगटे होय के चले ले लागै छै ।

शीशम गाछ के चोरी सुनी के विधाता आरो रवि चक्रवर्ती गाँव लौटी ऐलो छेलै । जे बाहर बसी गेलो छेलै, ओकरो ते बाते अलग छेलै, मजकि जे नगीच कोय गाँव-शहरो में बसलो छेलै—ऊ सब एक दिन आगू-पीछू सें रुपसा पहुँची रहलो छेलै । आखिर आपनो गाँवो के बात छेलै । हालाँकि पहुँचै वाला आदमी में जादा हेने छेलै, जे ई सोची के ऐलो छेलै कि कटलो शीशम गाछ जो पकड़ैलै आरो ओकरो बाँट-बखरा होलै, ते कुछु-नै-कुछु एक्को पल्ला भर लकड़ी ओकरो हाथ लगवे करतै—की कम छै । सौ बरस सें जादा पुरानो गाछ छेकै । सबटा साल.....किबाड़ की बनतै, जेना लोहा रो फाटक.....कुछ हेनो लोग छेलै, जे खाली दिरिश देखै के ख्यालो सें ऐलो छेलै.....सौंसे रुपसा ई कांडो सें हठाते गनगनाय उठलो छेलै ।

शुरू-शुरू ते जे भी आवै, चानन किनारी में घंटो-घंटो पड़लो रहै । गाँवो के मरद साथे बच्यो-बुतरु के झुमार जेना बनले रहलो छेलै । पर तीने-चार रोजो के बाद यहू मेला-तमाशा धीरे-धीरे खतम हुँए लागलै । कमकाजुओ सिनी आपनो-आपनो जग्घो पकड़ी लेने छेलै । धीरे-धीरे गाँव शांत हुँए लागलो

छेलै । पर अखिनकोँ शांति पहिलका सें ज्यादा भांय-भांय करै वाला बुझावेँ लागलोँ छेलै ।

गाँव में जे भी बूढ़ो-पुरानो छेलै, हुनकासिनी में तेँ नैं, पर नया खूनोँ में हे घटना केँ ले केँ उथल-पुथल ज्यादाहे छेलै ।

कुछ लोगोँ के कहना छेलै कि गछकटाई में विधाताहे के हाथ छै, ऊ भागलपुर कथी लेँ गेलोँ छेलै, आबेँ ई बात एकदम साफ होय गेलोँ छै । ऊ भागलपुर गेलोँ छेलै—लकड़ी मिल वाला सें बात करै वास्तें । झुट्ठे सबै केँ कही देलकै कि रवि चक्रवर्ती ओकरा बोलैनेँ छै—कमिश्नर सें कही-सुनी केँ चानन के जंगल वाला खलिया जग्घोँ हासिल करै लेँ, विद्यापीठ खोलै लेँमहिना भरी लागै छै हाकिम-हुक्काम सें बात करै में ?.....अरे ऊ वहाँ जाय केँ ई इन्तजारी में छेलै कि बरसा अय्ये रहलोँ छै, कोय दिन हेनोँ झोड़-पानी पड़लै, तेँ गाछ सिनी के ठिकानोँ लगाय देलोँ जैतै.....आरो इन्दरो भगवान हेनोँ सहाय ओकरा पर भेलै कि सताहे लगाय देलकै.....आरो विधातां गाड़ी-मजूर लगाय केँ गाछ कटवाय लेलकै.....भला हौ ठनका में आरी के आवाज के सुनेँ पारतियै ?

पर ई बात कोय आपनोँ दिश सें नैं बोलै छेलै । कोय ई कहै तेँ ई कही केँ कि फलां हेनोँ कही रहलोँ छेलै, चिलां होनोँ कही रहलोँ छेलै.....कहै वाला साथे-साथ यहू कहना नैं भूलै, “होना केँ कोय कुछ बोलै, हमरा तेँ कोय घुट्टियो भरी पानी में डूबी केँ कहतै, तभियो हम्मैं विश्वास करै वाला नैं । हों ।”

पर ई बातोँ सें, कि गछकटाई विधाता करवैनेँ छै, जोँ केकरहौ शायत विधाताहौ सें ज्यादा दुख छेलै तेँ दीपा केँ । वें बार-बार विधाता केँ येँ बारे में कुछ करै लेँ कहनेँ छेलै, पर बार-बार विधाताहौं यही कही केँ टाली दै कि जहाँ पानी कम रहेँ, वहाँ कीचड़ हटाय के मानै छै—पानी आरो कदोड़ करी देवोँभीमो सें यही गलती होलोँ छेलै, आखिर में वहेँ कदोड़ पानी प्यासलोँ युधिष्ठिर वास्तें लेँ जाय लेँ लागलोँ छेलै भीम केँ । पर ई सब बातोँ सें दीपा केँ सन्तोष नैं हुऐ, जेना ई दोष विधाता पर नैं, ओकरहै पर लगैलोँ गेलोँ रहेँ । बातो सही छेलै । दीपा विधाता केँ आपना सें अलग कहाँ मानै छेलै । से ऊ सीधे अनिरुद्धोँ के नगीच पहुँची गेलोँ छेलै आरो कहनेँ छेलै, “अनिरुद्ध दा, तोंही कुछ करोँ । विधाता पर एत्तेँ बड़ोँ दोष लगैलोँ गेलोँ छै आरो तोरा सिनी कोय कुछ नैं बोलै छौ । नैं प्रसून दा बोली रहलोँ छै, नैं खुशी दा, नैं गंगा दा आरो नैं तेँ रंगीला दा.....होना केँ एक बात जानी ला—ई हेनोँ बात छेकै, जेकरा साफ करने बिना हम्मैं शांत नैं सें रहेँ पारौं । जोँ अन्याय सहै के क्षमता

तोरा सिनी केँ एतन्हें बढ़ी गेलोँ छौं, तेँ बढ़ौक । पर यहू नैं भूलियौ—ई दोष केँ हम्मैं सौँसे गाँव सें एक दीपा पर लगैलोँ अपराध नाँखि लै रहलोँ छियै आरो एक सौ हजार देवता असमर्थ हुएँ पारें, मजकि अन्याय के विरोध करै वास्तें कभी-कभी एक नारिये काफी होय जाय छै ।” आरो ई कही केँ दीपा हनहनैली अनिरुद्ध घरोँ सें निकली गेलोँ छेलै.....तखनी ओकरोँ दुःख आरो गुस्सै एत्तेँ माथोँ पर चढ़लोँ छेलै कि अनिरुद्ध ओकरा रोकोँ लेँ चाहतिथै, तैहियो ऊ नैं रुकतिथै । दुआरी सें दूर निकली गेला पर अनिरुद्ध नैं आपनोँ पत्नी सें कहलेँ छेलै, “मीरा, आबेँ तोरा की समझैय्योँ—विधाता के कोन सोभाव तोरा सें छिपलोँ छौं.....हम्मैं एक्को कदम यै मामला में उठैवै तेँ वैं यही कहतै—तोहें गाँव केँ शांत नैं रहेँ देवें । उधियैला सें छाली बरतन सें बाहर आगिन में गिरवे करेँ, छाली नैं गिरै, यै वास्तें हम्मैं कुछ बोलिये नैं रहलोँ छियै यै मामला में.....पर दीपा केँ की मालूम, ओकरा सें कम दुःख आरो गुस्सा हमरा नैं होय रहलोँ छै..... लतांतो केँ ओहै गुस्सा छै, खुशियो लाल केँ, मतरकि करहै की पारें सकें । विधाता के विधाने अलग छै.....चित्रगुप्त जी केँ दूसरा के लिखा-पढ़ी पर विश्वास नैं हुएँ पारै ।” कहतें-कहतें अनिरुद्ध के बोली थोड़ोँ तीक्खोँ होय गेलोँ छेलै ।

“हुनका विश्वास नैं छै, तेँ नैं छै । तोरा तेँ मित्र वास्तें कुछ करन्हें चाहियोँ । कहलेँ छै कथी लेँ—धीरज, धर्म, मित्र आरू नारी—आपद काल परखिये चारी । यहाँ तेँ मित्र आरो धर्म, दोनों के ही रक्षा के सवाल आवी गेलोँ छै ।” अनिरुद्धोँ के कनियैनी मीरां कहनेँ छेलै

“कहै तेँ ठिक्के छौ । देखै छियै, की करेँ पारै छियै ?”

“सबसेँ अच्छा यहै होतहौँ कि दुर्गा थानोँ में एकठो सभा बुलावोँ आरो वहीं में सब बात के खुलासा करोँ । जेकरा जे कहना छै, खुली केँ कहौ । है की—रुय्या नाँखि कनफुसकी सुलगतें रहेँ.....हम्मैं तेँ कहभौ—शनिचरो जी केँ वैं सभा में बुलावौ ।”

“यहै नैं होतहौँ हमरा सें, चाहे हमरोँ गोतिया समेत ई सौँसे पट्टी हमरोँ खिलाफ होय जाय.....तोरोँ जनानी वाला बुद्धि.....की समझवा.....है हेत्तेँ जे खेला होय रहलोँ छै—की शनिचरे बिना ?.....मीरा पाप के गोड़ सहलैला सें, पाप गोड़ोँ सें माथा पर चढ़ी आवै छै, ऊ नरम नैं पड़े छै । ओकरोँ बुद्धि उल्टे दिश चलवे करै छै । शनिचर केँ मनाय के मतलब समझलौ, ऊ आपना केँ वरियोँ समझी केँ आरो अन्याय पर उतरी जैतै.....पर सभा होतै । तोरोँ है बात हमरा जँचलोँ । तोहें एक काम करोँ । वैं सभा में जत्तेँ पुबारी-दखनवारी

आरो पछियारी-उतराही टोला के जोंर-जनानी आवे पारें, जमा करो । हम्में एखनिये कमरुद्दीन आरो खुशी सें बात करै छियै । आय बृहस्पतिवार छेकै । सभा यही एतवार के बैठतै । दुर्गेथानों में । ठीक बारह बजे दिनो सें ।” कहतें-कहतें अनिरुद्ध के बायाँ तरहत्थी में दायाँ मुट्ठी जोर सें कसी गेलो छेलै आरो दोनों ठोर दोनो दिश फैलतें हुएँ एकदम पतला होय गेलो छेलै ।

११

एतवार ऐहें रुपसाहै में नैं, आस-पास के सब्हे गाँव में खलबली रँ मची गेलो छेलै । भदरिया, टाड़ू से लैके डड़पा, कटियामों तक में यही बात के चर्चा छेलै कि आय रुपसा के दुर्गाथानों में सभा होतै । सभा में की होतै, ई बातों सें ज्यादा चर्चा यही बातों के छेलै कि वै सभा में मरदाना ते भाषण देवे करतै, दिकूपाल जी के पोती दीपाहौ सब जनाना-मरदाना के बीच बोलतै । ई बात के लैके जत्ते गामों के जत्ते लोग छेलै, ओतन्हें किसिम के बातो होय रहलौ छेलैकॉलेज में पढ़ली छै, हेने के नैं । पढ़ली छै, तब्बें नी ठठमठठ मरदों के बीच बोलै के हियाव राखै छै.....धूरो, जोर-जनानी-मौगी की बोलतै, मलकाठों में पाठाहै-बकरा कटै छै की बकरियो.....हों, मुखड़ा दिखाय वास्तें खाड़ों भै जैतै, आरो की.....अरे जानै नैं छै, जोंर-जनानी भाषण की देतै, ऊ ते सभा में भीड़ इकट्ठा करै वास्तें दीपा के भाषण करै के हल्ला करलो गेलो छै । जानै नैं छै, जहाँ दू-चार जोंर-जनानी खाड़ों भेलो, वहाँ सौ-पचास मरदाना के भीड़ बनिये जाय छै । बस यही वास्तें आरो की.....जे भी रहे, भाषण ते सुनै ले जानाहै चाहियो, आखिर ते कुछ रहस्य के बात होवे करतै, नैं ते ई बोआई-ओआई के टेम में ई सभा-सोसाईटी के की मानें.....

ठीक बारह बजे सें खेत-बहियार, पगडंडी, आरी-बारी के पार करतें जोंर-जनानी मौगी-मुंशा के ऐवो-जैवो शुरू होय गेलै । बच्चा-बुतरु औरत-मरद के साथें लागलो छेलै—कोय गोदी पर, ते कोय कंधा पर, जेना दुर्गाथानों में भगवतिये दर्शन लेली भीड़ उपटी पड़लो छेलै.....ई ते संयोगे छेलै कि तीन दिन पहिनें उखेल होय गेला के कारणे रास्ता-पैड़ा सुखलो-सुखलो रँ होय गेलो छेलै आरो दिनो ठो सैर-सपाटा लायक बनी गेलो छेलै । यहू कारण छेलै कि कै

दिनों से झकसी-बतास से उबी के जोंर-जनानी गाँव से बाहर निकली ऐलो छेलै—खुल्ला आकाश आरो धरती के आनन्द लै ले ।

सभा आपनो टैम से शुरू भेलो छेलै । शुरू में वसन्त काका के इशारा पर अनिरुद्ध आरो प्रसून ने कुछ-कुछ जमा होलो लोगो से कहलै छेलै, मतरकि भीड़े हेनो छेलै आरो शोरगुलो हेने कि लोगे ठीक-ठीक ई नै जाने पारलकै कि अनिरुद्ध आरो प्रसूने आखिर लोगो से कहलकै की ? भीड़ के लगातार बढ़ते शोर देखी के मंचो पर कमरूद्दीन खड़ा भेलै आरो मैक आपनो दिश खींची के जोंरो से कहलकै, “आपने सब भाय-बहिन, चाचा-चाची आरो बुतरू सिनी से करबद्ध प्रार्थना छै कि हुनी शांत होय जा, ताकि आपने सिनी के सामना में कुमारी दीपा आपनो बात रखे सके ।” आरो सच्चे में भीड़ में शांति फैली गेलो छेलै । जे जनानी जहाँ ठाड़ो छेलै, ऊ वाहीं बैठी गेलो छेलै । पर मरदाना सिनी दूर-दूर ठाड़े रहलै । भीड़ के शांत होतै, कमरूद्दीन ने फेनू कहना शुरू करलकै, “भाय-बहिन, चाचा-चाची, आरो गुरुजन, आयको सभा बुलाय के एक खास मकसद छै । हमने ई चाहै छियै कि आपने सिनी से दीपा बहिन कुछ कहै, हेकरा से पहने मित्र विधाता आपने सिनी से बतावे कि आखिर ई सभा बुलावे के की मकसद छै ।”

समुच्चे भीड़ के नजर, जे अभी-अभी दीपा पर टिकलो छेलै, अनचोके विधाता पर जाय टिकलै । मंचो पर खड़ा विधाता एक बार वैठा ऐलो लोगो के प्रणाम करलकै आरो मैको पर एकदम मंजलो नेताहै नाँख कहना शुरू करलकै, “हमरो पूज्य गुरु, आदरणीय बुजुर्ग सिनी आरो भाय-बहिन सहित हमरो साथी, आय तोरा सिनी के बोलाय के हमरो एगो खास मकसद छै, आरो ऊ मकसद छेकै, आपनो जंगल, आपनो शीशम-वन बचाय वास्ते एक साथ चिंतित होय के.....तोरा सिनी के मालूमे छै, आपनो चानन नदी के किनारी-किनारी जे तीन मील ताँय शीशम के जंगल फैललो होलो छै, ऊ खाली रुपसाहे गाँव के शान-प्रतिष्ठा के बात नै छेकै, मजकि है शान-प्रतिष्ठा तेँ ऊ सब गाँवो के छेकै, जे-जे नदी किनारो में बसलो छै आरो नद्दी से सटलो-सटलो आठ-दस मील के गामो के.....ई जंगल के की इतिहास छै, कोय नै कहै सके.कोय बोलै छै बहुत पुरानो जमाना में यहाँ एक ऋषि ऐलो छेलै, हुनको पीछू से दू सौ मुनी । हुनके लगैलो ई सब गाछ छेकै । कोय कहै छै—जबे चानन ई दिश होय के बहलै, तेँ एको किनारी-किनारी वनो आपने-आप उपजते चल्लो गेलै—राते-रात छोटो-छोटो गाछ बढ़ी मोटाय के जंगल बनी गेलै..... मतरकि बाबा तेँ यहँ कहै छेलै कि हजारो बरस पहिने, ई नदी के किनारी-किनारी

दूर तौंय साधु-सन्यासी के एगो बस्ती छेलै । यहाँ भक्त सिनी आवी केँ विश्राम करै छेलै, एक बार वही आश्रम में हजारों लोग जुटलै एक यज्ञ वांहीं करवाय लेँ । हुनका सिनी सेँ एक भयंकर भूल होय गेलै । ऋषि के मना करला के बादो हुनका सिनी जंगल केँ काटी-काटी यज्ञों में डालना शुरू करी देलकै—नतीजा ई होलै कि जंगल के देव गुस्साय उठलै । देवतां बहिन चानन नदी केँ कहलकै, अपराधी सिनी केँ है कुकर्म के सजा दे लेँ । बहिन चानन नदी के गोस्सा आबेँ एतन्है बढ़लै कि पानी तेँ ताड़ गाछ तक उछलेँ लागलै । सब कुकर्म करै वाला बालू तरोँ में दबी गेलै । बाद में वही सिनी गाछ रूपों में निकली ऐलै.....जत्तेँ लोग, ओत्ते कथा । मतरकि है के नैं स्वीकारतै, यही जंगलों सेँ हमरोँ पुरखां ज्ञान लेनेँ छै, यही जंगलें हमरा सिनी के जान बचैलेँ छै, सुख देलेँ छै, समृद्धि देनेँ छै । आय वही जंगल के अंग-भंग होय रहलोँ छै । ताज्जुब छै, हमरा सिनी ई तेँ जानी रहलोँ छियै कि गाछ लगातार कटी रहलोँ छै, मजकि नैं तेँ गाछ काटे वाला के पता छै, नैं तेँ हमरा सिनी जानै लेँ चाहै छियै.....हमरोँ गामों के जंगल कटी रहलोँ छै आरो ई गामों के साथेँ-साथ जों आसो-पास के सब्भे गाँव खामोश छै तेँ यहें समझै में आवै छै कि ई कामों में हमरो बीचों के लोग मौजूद छै..... जरा सोचौ, हमरोँ चुप्पी सेँ कल जंगल एकदम खतम नैं होय जाय वाला छै की? कल ई इलाका के सुख-सौन्दर्य-समृद्धि के आधार की होतै, जों ई जंगल कटी जैतै.हमरा ई नैं भूलना चाहियोँ कि एकरा सेँ हमरोँ हवा, पानी आरो आकाशे शुद्ध नैं होय छै, हमरा सिनी रँ कत्तेँ-कत्तेँ गामों के आधा-सेँ-अधिक घरों के चुल्हा उपासे रही जैतै, जबेँ ई जंगल खतम भै जैतै.....आयकोँ सभा बुलाय के यही खास मकसद छै कि हमरा सिनी मिली केँ है जंगल के टहनियो तक कटै सेँ बचाय लेँ तैयार होय जांव । जों तैयार होय जैवौ, तेँ है बात जानी लेँ कि ई जंगल के एक गाछ की, एक्को टहनी तौंय नैं कटतै । तोरा सिनी नैं जानतेँ होभौ, उड़ीसा में कपिलाक्ष नामक इलाका छै । लम्बा-लम्बा गाछों सेँ भरलोँ जंगल । धीरेँ-धीरेँ जंगलचोर के नजर वै वनोँ पर गेलै । आबेँ की छेलै, आस-पास जिला के लकड़ी-व्यापारी के चालीस-पचास आदमी बैलगाड़ी पर गाछ काटे के औजार लेँ केँ आवै आरो रातो-रात गाछ सिनी जंगल के बीचों सेँ काटी केँ ले जाय । आखिर उड़ीसाहै के डेकानाल जिला के वनवासी सिनी एकजूट भै गेलै एकरोँ विरोध में । शुरू में वनवासी सिनी नैं गाछ नैं काटे वास्तेँ जंगलचोर सिनी केँ डरैलकै, धमकैलकै, ओकर्हौ पर जबेँ जंगल काटे वालां परहेज नैं करलकै, तबेँ वनवासी सिनी उन्नीस सौ बेरासी इसवी के नवम्बर महिना में ऊ दुराचारी सिनी केँ घेरी, जों न रँ दंडित करलकै, ओकरोँ कथा पुरानोँ नैं भेलोँ

छै । साल भरी सें जादा नैं भेलो होतै.....आय हमरो सिनी के गामो के जंगल धीरे-धीरे घटी रहलो छै । आस-पास के लकड़ी-मिलो में हमरो जंगल कटी रहलो छै । के हमरो जंगल के काटी रहलो छै ? के कटवाय रहलो छै ? सब कुछ जानै ले हमराहौ सिनी के डेकानाल वनवासी हेनो संगठित होय ले लागतै, संगठित करै ले लागतै, नैं ते जेना सौंसे देश के घन्नो-घन्नो जंगल कटी गेलै, होन्हें हमरो यहू छोदो रैं के जंगल कटी जैतै । सब कुछ जानो । जानै छौ कि दक्षिण भारत के बड़ो-बड़ो जंगल कटी गेलै, कैन्हें कि ई देशो में सालाना पच्चीस-तीस लाख टन के बराबर कागज बनै छै । ई कागज आवै छै कहाँ सें ? जंगल के गाछो सें । गाछ कटी रहलो छै । दक्षिण भारत आरो उत्तरी भारत के कागज-मिल के मालिक के नजर आबै हमरो बिहार, बंगाल, आसाम पर छै, कैन्हें कि जे भी जंगल बचलो छै, यही पूर्वी भारत में । मध्यप्रदेश में आबै हौ जंगल कहाँ रहलै । देखतै-देखतै बिहार, बंगाल, आसामो बंजर होय जैतै, राजस्थाने रैंभट्टी जलतै ते जंगल कटतै, कागज बनतै ते जंगल कटतै, रेल बिछतै ते ओकरो पटरी के फिसप्लेट ले जंगल कटतै । कल-कारखाना खुलतै ते जंगल कटतै, खान खुदतै ते जंगल कटतै आरो खानो के छत के थिर करतै ते जंगल कटतै । आरो नैं ते नै, कोय नया आबादी बसाना छौ ते वहु में जंगल कटतैई बात शायत तोरा सिनी के नैं मालूम होतहैं—जबे उन्नीस सौ अनठौन में पूर्वी पाकिस्तान सें शरणार्थी के झुमार भारत ऐलो छेलै, तबे मध्यप्रदेश आरो उड़ीसा के जंगले काटी के ऊ शरणार्थी सिनी के बसाय के काम शुरू भेलो छेलै । हेना में बोलो, आपनो देश में कांही छोदो रैं के जंगल बनलो रहे पारे ? राजनेता कहै छै—खान खुदतै, लोहा-इसपात बनतै, पर है खान खुदाय में हमरो बेशकीमती गाछ, जड़ी-बूटी के जंगल कटी रहलो छै, ओकरो की होतै ?..... हमरो जंगल कटला सें जे दुर्लभ-दुर्लभ जंगली पशु-पक्षी खतम भै रहलो छै, ओकरो की होतै । जो है रैं जंगल कटते रहतै, ते एक दिन सिंह, बाघ, हाथी के दर्शन दुर्लभ होय जैतै, यहाँ पर जे हमरो बुजुर्ग सिनी उपस्थित छै, हुनकासिनी के है बात मालूम होतै कि यही चानन नदी के किनारी-किनारी फैललो बँसबिट्टी छेलै । आय ऊ नैं छै । कहाँ गेलै ऊ बाँस-वन ? कोय जानै छौ ? ई बात खाली हमरे गामो के नैं छेकै, सौंसे देश के बाँसवन धीरे-धीरे मिल में पेरैलो जाय रहलो छै । बाँस लुदगी बनी रहलो छै, गत्ता बनी रहलो छै । कल ताँय बिहार में कत्ते-कत्ते जग्घो में बाँसतरी छेलै, आय दू-चार टा कहीं बाँस दिखाय जांव ते यही बस.....कैन्हें कि सौंसे देश सें धीरे-धीरे बाँस खतम भै रहलो छै । कुछ बाँसतरी बची गेलो छै ते बंगाल में । वहु सें कागज-गत्ता ले बाँस

मिल में चूर होय रहलो छै.....मिल-मालिक आबे तोरो घरों के आस-पास के बँसबिट्टी के खरीदी रहलो छौं, तोरा ई नै मालूम छौं । खाली मुट्ठी भर लाभ वास्तें, बड़ो-सँ-बड़ो जंगल, नै खाली हमरो वन-संरक्षके कटवाय रहलो छै, मजकि सरकारो.....आय वहे आफत हमरा सिनी के जंगलों पर आवी गेलो छै । पिछला चार-पाँच साल के भीतरे पचास सें जादा पेड़ कटी चुकलो छै.....है बात छिपलो नै रहतै कि तनी टा लोभ वास्तें, यै पापों के विरोध नै करै में के-के शामिल छै । पर ई ते बादको बात छेकै.....आय जे हम्मैं आपनैं सिनी के यहाँ बुलैने छियै, ओकरो मकसद छेकै—आपनैं सिनी के कटतें जाय रहलो जंगल के प्रति सावधान करवो आरो जों हमरा सिनी सावधान नै होलियै, ते ई जंगल की, एक दिन हमरा सिनी के ऐंगन के तुलसी-चौरा के तुलसी गाछो तक कटी जैतै ।”

आखरी पंक्ति कहतें-कहतें विधाता के दोनो हाथ जुड़ी गेलो छेलै । जुड़लो हाथों सें भाषण के अंत समझी के जनसमूह के बीचों सें ताली के हेने गड़गड़ाहट उठलो छेलै, जेना समुद्र में अनचोके ज्वार-भाटा होय गेलो रहे आरो ओकरो आवाज सें सौसे वातावरण गूँजी गेलो रहे । ओकरो प्रतिध्वनि जेना खतम होय के नामे नै लै रहलो छेलै । पता नै कखनी तौय लोगें मंत्रमुग्ध होले ताली ठोंकते रही जैतियै, जों दीपा मैको के आगू नै आवी गेलो होतियै ।

कारो-कारो साड़ी-बुलाउज, जै पर महीन मोटो जरी के काम करलो छेलै । सचमुचे में वै पहनावा में दपदप करती दीपा के मैको पर ऐवो नैं सबके हाथो पर जेना ब्रेक लगाय देनै रहै । सबके मुँहो पर जेना एक्के प्रश्न चुप छेलै—एतना सब बात कही देला के बाद बचिये की गेलो छै, जे आबे दीपा कहतै ? पत्थर नाँखि इस्थिर, सब के आँख दीपा के चेहरा पर आवी के गँधी गेलो छेलै, जेना कोय शक्तिशाली चुम्बक आस-पास के लोहा के कण के खींची लेले रहे.....मंचो पर दीपा एकदम शहरुआ लड़की के भेष-भूषा में ऐलो छेलै, मतरकि हाव-भाव सें आपनो गाँव वाली । खाड़ी होय सें पहनें वें आपनो सौसे देह साड़ी सें ढकी लेने छेलै आरो सभा के प्रणाम करै वक्ती आपनो मूड़ियो झुकाय ले नैं भूललो छेलै, आरो यही क्रम में वैनैं आपनो अंग-प्रत्यंगो के चोर आँखी सें देखी लेने छेलै, सब अंग ढकलो ते छै । लोगो के जे शंका छेलै, आखिर आबे दीपा बोलतै की ? सब ते विधाता कहिये देलकै, सचमुचे में दीपों वहीं सें कहना शुरू करलकै, “आबे कहै ले कुछ नैं बचलो छै, सार-सार सब निचोड़ी के कही देलो गेलो छै.....तहू पर हमरा जे कहना छै, हौ ई कि चानन के किनारी-किनारी जत्ते पेड़ कटी गेलो छै, ओत्ते नया पेड़ हमरा सिनी वहाँ

लगावों । ओल्ले नैं, ओकरा सें सौ गुना जादा । हमरा सिनी में सें एक आदमी जों एक गाछ लगैतै, तेँ सोचौ कि कत्तेँ गाछ लगी जैतै.....गुरु रविन्द्रनाथ ठाकुर शांतिनिकेतन में सौन महिना के बाइस तारीख केँ एकटा समारोह करै छेलात । वै समारोह में फूलों के एक पालकी में एक छोटी रैं के गाछ बिठाय केँ लानलों जाय आरो बड़ी आनन्द, धूम-धाम सें ओकरा कहीं रोपी देलों जाय छेलै । ई वृक्ष-उत्सव केँ बाबा आमटे नें आगू बढ़ैलकै । हजारो-हजार कॉलेज के लड़का-लड़की पालकी में बालतरू लाने आरो मीलहैं गाछ लगैतें चलै । उन्नीस सौ बेरासी में मध्य प्रदेश के तीन सौ पचास कॉलेजों के हजार लड़का-लड़की मिली केँ एक लाख गाछ लगाय लेँ साईकिल सें यात्रा करनें छेलै.....ई तेँ बहुत बड़ो बात भेलै । हमरा सिनी कम-सें-कम आपनो-आपनो घरों के आगू-पीछू के अलावा ई चानन नद्दी के किनारा में एक-एक गाछ जरूरे रोपौं, ई हमरोँ चाचा-चाची, बाबा-दादी, भाय-बहिन सब्बे सें निवेदन छै । खास करी केँ येँ कामोँ में हमरोँ भाय-बहिन आगू बढ़ैक, हमरोँ ई भीतरिया मोँन छेकै.....मरदाना केँ सौ काम रहै छै, सौ गो चिन्ता । जनानी घरों में रहै छै, घरों के काम सें मुक्ति मिलहैं हमरोँ बहिन-भाभी, जे भी छै, ऊ गाछ के रक्षा लेँ समय दियै पारै.....यहाँ पर ऐली हम्मैं आपनोँ चाची, दादी, बहिन आरो भाभी केँ खास करी केँ आपने देश रोँ एक घटना सुनाय लेँ चाहै छियै । ढेर साल अभी नैं होलो छै । उत्तर प्रदेश के अल्मोड़ा जिला के बात छेकै । वही जिला में खीराकोट नाम के एक गाँव छै, जहाँ एक कम्पनी नें खड़िया पत्थर के खुदाय शुरू करलकै तेँ गाछो सिनी कटना शुरू होय गेलै । देखतहैं-देखतहैं खेत खड़िया पत्थर के टुकड़ा सें भरेँ लागलै । येँ पर ऊ गामोँ के जोर-जनानी संगठित होय केँ ऊ कम्पनी के एत्तेँ जमी केँ विरोध करलकै कि कम्पनी केँ आपनोँ काम रोकै लेँ पड़लै । बादोँ में वहाँकरे जनानी सिनी कटलोँ गाछी के जग्घा में नया गाछ लगैलकै, जेकरोँ कारण वहाँ हरा-भरा जंगल के जनम फेनू हुएँ सकलै.....तेँ हमरा बस यही कहना छै, कि जे जंगल हमरोँ पास छै, ओकरा कोय्यो कीमतोँ पर बचाना छै, लब्बो रोपना छैजंगल नैं कटेँ, येँ लेली बहुत जल्दिये ओकरोँ आस-पास आश्रम हेनोँ कोय संस्था खोलै के बातो सोचलोँ जाय रहलो छै, ताकि लोगोँ के कल्याणो हुएँ आरो जंगलो के रक्षा । हमरा पूरा विश्वास छै कि हमरा सिनी केँ येँ सभा रोँ आशीर्वाद आरो सहयोग, साथे-साथ मिलतै.....।”

सचमुच में दीपा नें आपनोँ बातों सें विधाता के बनैलोँ रंग केँ आरो गाढ़ोँ करी देनें छेलै—हेनोँ गाढ़ोँ कि चढ़ै ने दूजोँ रंग । खुद विधाता केँ एकरोँ विश्वास नैं छेलै कि दीपा हेनोँ निर्भय होय केँ, एत्तेँ भीड़ोँ के बीच, एत्तेँ

बुद्धिमानी आरो ज्ञानों के बात करे पारतै ।

पर कैन्हें नी करे पारतै । गाँव छोड़ी के दस-दस बरस शहरों में रहली छै । वहीं सँ स्कूल-कॉलेज के कत्ते परीक्षा पास करने छै.....तेँ यै में अचरजे की, जों दीपा ने सभा पर विधाता के चढ़ैलों रंग के आरो गाढ़ो करी देने छैले । चार दिन पहिनें, हों चारे दिन पहिनें, जमीनों पर जेना कि चारो दिश पानिये-पानी बहते नजर आवी रहलो छैले, होने सभा के टुटला पर आदमी चारो दिश पसरलो जाय रहलो छैले, ठीक बारिस के पानिये रँ । केहनों-केहनों साड़ी में, कुरता में, फ्रॉक में, दुपट्टा में, कमीज-कुरता में, जेना लागी रहलो छैले—धरती पर पनसोखा आकाश सँ उतरी के पसरी गेलो रहे । मंचो पर ठाड़ो रही गेलो विधाता, दीपा, कमरुद्दीन, अनिरुद्ध, प्रसून आरनी भीड़ के टुकटुक बच्चे नाँखि अचरज आरो आनन्द सँ देखी रहलो छैले । देखतैं रही गेलै, तब ताँय, जब ताँय कि आँखी के सामना सँ ऊ जनसमूह अलोपित नै होय गेलो छैले ।

१२

“धीरो, सभा में मौगी-मरद के हौ भीड़ । जवान छोड़ा-छोड़ी, अधवैसू बूढ़ो के हौ बाढ़ हम्म सँ सब भूली जाँव, मजकि मंचो पर हौ दिन बेल-बूटा वाली कारो-कारो साड़ी में जे रँ दीपा फवी रहलो छैले, ऊ हमरो आँखी में घुमते रहतौ.....हम्म कुलु बोलै छियै तेँ शनिचर डाँटी दै छै, यही ले नै बोलै छियै, मजकि कुलु कहें, विधाता छै किस्मत के विधाता । है जे शनिचर के आकाशो में ग्रहण लागी गेलो छै नी, एकरो कारणो यहै छै कि चाँद-सूरज सामना आवी गेलो छै । दीपा आरो विधाता के एक जग्यो में होवो ही शनिचर के शनिचर के फेरा लगाय देने छै.....खैर जावें दे ई सब बातों के.....एखनी शनिचर, परफुलवा, विपना के आवै में देरी छौ आरो ई जग्यो एकदम्में सुनसान छौ.....तोहें कहलें छेलें नी—जोन दिन कांही सुनसान मिलतौ, ऊ मंत्र बताय देवौ । आय तोहें ऊ मंत्र बताय दे । हम्म आपनो काम में जों सफल होलियौ तेँ जानी ले, ऊ तोरो भौजाय तेँ बनिये जैतौ, हम्म तोरो जिनगी भर के गुलाम—मंतर सिखाव, आयको खैवो-पीवो के खरचा हमरो तरफ सँ, बस ।” ढीवा नै धीरेन्द्र के दोनों हाथ पकड़लें बड़ी गिड़गिड़ैलो सुरो में कहलकै ।

“देख ढीवा, वचन देले छियौ, ये लेली बताय रहलो छियौ, मतरकि है केकरो बतैय्ये नै, विद्या ते जैवे करतौ, गुरू-आदेश के उल्लंघन करला सें औरदौ जैतौ । आबे कान लगाय के मंत्र सुन—ओं क्लीं कामेश्वर रूप आनन आनय वसतां क्लीं.....आरो हों; है मंतर-सिद्धि वास्ते तोरा कदम्बे फूल के माला पर जाप करै ले लागतौ, आरो हों, यहें मंतर सें एक हजार होमो करै ले लागतौ.....यही मंतर पढ़ी के जबें तोंहें कदम्ब के एक फूल सांवली के दे देभें, ते बस समझी ले, ऊ जिनगी भर वास्ते तोरो गुलाम बनी जैतौ ।” धीरेन्द्रें फुसफुसैते रैं सब समझैले छेलै ।

शुरू-शुरू में विद्या पावे के क्रम में जे चमक ढीवा के चेहरा पर दिखी रहलो छेलै, ऊ तुरन्ते खतमो होते दिखलै । बड़ी मरुवैलो सुरो में वें कहलकै, “तोंही बोलें, आबे एखनी कदम्ब के फूल कहाँ सें लानवै, महिना भरी ते देर जरुरे भै जैतै । कोय हेनो रस्ता बताव कि कल के बदला आइये सें जाप शुरू करी दियै ।”

“एक रस्ता आरो छौ ।”

“की ? जल्दी बताव ।” ढीवा के बोली में बड़ी व्यग्रता छेलै ।

“औल-बौल नैं हुएँ । स्थिर सें सुन.....पैहिने ते ई मंतर याद रख—ओं धिरि-धिरि काम देवाय तस्मै स्वाहा—याद भेलौ ?”

“हों—ओं धिरि-धिरि काम देवाय तस्मै स्वाहा ।”

“हों । आबे आगू सुन । यही मंतर पढ़ी के कबूतर के एगो पंख मोँद में पिसी के तोरा साँवली के खिलाय दै ले लागतौ । फेनू ते समझें, ऊ तोरो किंछा के विपरीत जावै नैं पारे । आरो जों यहू नैं हुएँ पारौ ते एक काम करियें—मरद के खोपड़ी हासिल करी, वहीं में काजल बनाय के केन्हें ओकरो आँखी में लगाय दियें, फेनू ते तोहरो चाहल्लै पर ऊ तोरा सें अलग नैं हुएँ पारे ।”

“सच ? सच कहै छैं ? ई मंतर कभियो बेकार नैं जावे पारे ?” जेना ढीवा के केन्हौ विश्वास नैं हुएँ पारी रहलो छेलै कि हेनो सस्ता विधि सें कोय युवती केकरो गुलाम बनी जावे पारे ? वें फेनू आपनो विश्वास ले पूछलकै—“की ठिक्के कहै छैं धीरू आकि हमरा फुसलाय रहलो छैं ।” कहतें-कहतें ढीवा के मुँहो पर हजार-हजार भाव उतरी ऐलो छेलै ।

“ढीवा, जे मंतर आरो विधि बताय देलियौ, ओकरा सें खाली साँवलिये के की, पचास-पचास के मोहित करी के राखै पारें । ई धीरेन्द्र शर्मा के मंत्र छेकै, खाली जाबै नैं पारे ।”

“की ढीवा, ई कथी के खुशी चेहरा पर छै, कहीं कुछ मिली गेलो छै की ।” नैं जानौ कखनी शनिचर पीछू सें हुब सना आवी के ऊ दोनो के लगीच खाड़ो भै गेलो छेलै । बेनियो राम साथें छेलै । जेकरो आवाज सुनहैं ढीवा आरो धीरो दोनो हड़बड़ाय गेलो छेलै, जेना आपनो घरो के सामना कोय हठाते पर पुरुख खाड़ो देखी के जनानी हड़बड़ाय उठे । हालाँकि डोर ते दोनो के यही बातों के छेलै कि वें गुप्त विद्या नैं सुनी लेले रहे, पर बात के बदलतें आपनो हड़बड़ैवो छुपाय वास्तें ही दोनों एक्के साथें बोली पड़लै, “धुर मरदे, चोरो हेनो आवी के टोकै छैं । प्राणे निकली जाय ।” फेनू प्रसंग के एकदम सें बदली दै के ख्यालो सें ढीवा कहनें छेलै, “है महासभा के बाद आबे की सोचले छैं शनिचर ? साथे-साथ बैठी के निश्चिन्तो सें यहू बताव कि हमरा सिनी के की करना छै ।”

“है तोहें केना सोची लेलैं कि रुपसा में एक्के साथ दस गाँव उमड़ी पड़लै आरो हममें कुछु सोचले नैं होवै ।” शनिचरा बेनी के बैठतें आरो आपनो बैठतें हुएँ कहना जारी रखलकै, “जबे बेराजनीति के आदमी विधाता एत्ते बड़ो राजनीति करे पारे, भले कमरुद्दिनमे के चलतें, ते शनिचर ते राजनीतिये के आदमी छेकै.....अबकी ते ही राजनीति करना छै कि विधाता के जिनगी भर वास्तें सोचै ले होतै ।”

“जरा हम्मू सुनियै—ऊ राजनीति छेकै की ?” धीरो आरो ढीवा एक्के साथ संभली के बैठतें हुएँ पूछलकै ।

“देखें ढीवा, हमरो वास्तें ऊ सभा के कोय माने नैं छै । मतलब हमरा एक्के बातों सें छै, कि जो चानन के ऊ हिस्सा में विद्यापीठ खुली जाय छै, ते है सोची ले कि रातो वहाँ पहरदारी लागले रहतौ, है कहें कि लगैलो जैतै, आरो फेनू विधाता-दीपा के भाषण ते सुनभे करलैं कि जंगल काटैवाला केना पकड़लो गेलै । दोनों के भाषण के संकेत हममें नी समझै छियै.....पर विधाता के है मालूम नैं छेलै कि ओकरे भाषण शनिचर वास्तें रास्तो बनाय रहलो छै ।” ई कहतें-कहतें शनिचर जोर-जोर सें हाँसी पड़लै । कुछु देर ताँय ऊ हाँसते रहलो छेलै, ठीक होने, जेहनो कि ऊ भीष्म या रावण के अभिनय में मंचो पर हाँसते ऐलो छेलै । फेनू अनचोके आपनो हँसी के रोकतें हुएँ कहना शुरू करनें छेलै, “ढीवा, याद छै, विधाता की बोललो छेलै—जंगल केन्हें कटी रहलो छै ? यै लेली कि शरणार्थी बसैलो जाय रहलो छै । बस समझी ले विधाता के सब चाल तोड़ी दैके यही होतै एक महामंत्र ! इन्द्रजाल !! महाजाल !!! ओकरे अस्त्र सें ओकरे व्यूह खत्म ।” शनिचर फेनू ठहाका लगैनें छेलै ।

“हम्मैं तोरोँ बात नैं समझै पारलियौ ।” ढीवां आचरजोँ सें कहनें छेलै ।

“समझवैं कहाँ सें ढीवा । जिनगी भर तेँ रहलैं मोटोँ बुद्धि के जातोँ साथेंजे जात राजनीति करलकै, पढ़ी-लिखी केँ पंडित भेलै, ओकरा तेँ गालिये देतें कटलौ समय । बुद्धि कहाँ सें ऐतौ । आय शनिचर केँ है जादव-पट्टी, कादर-पट्टी, कोयरी-पट्टी, साहू-पट्टी सें जादा मान-प्रतिष्ठा बभन-पट्टी आरो कैथ-पट्टी आरनी में छै । कैन्हें ? कथी लेँ ? आय शनिचर गाली दै केँ नैं, संगति करी केँ सब्भे गुण लै लेनें छै.....अरे आदमी दोस्तियो करै छै तेँ बराबरिये सें.....अच्छा संगति में रहला आरो सिखल्लैं सें विद्या-बुद्धि बढ़ै छै नूनूमजकि राजनीति वास्तें ई सब बातों केँ भूली जाय लेँ पड़ै छै । दलदल सें उठी आपन्हैं जे पथलोँ पर आवी खाड़ोँ भै गेलोँ छैं, तेँ वही पर सब्भे केँ नैं उठाय लेँ, जैसें कि पथले दलदल में धंसी जाय । की समझलैं ?”

“सुन शनिचर, ढीवा केँ कुछ समझना होय छै तेँ आपनोँ बुद्धि सें । वें कोय वाभन आरो कैथोँ के बुद्धि सें नैं समझै छै.....आपनोँ हाथ जगन्नाथ ।” शनिचर के बातों सें ढीवा केँ ठिक्के गोस्सा आवी गेलोँ छेलै । “अरे तोहैं तेँ गोस्साय गेलैं ढीवा । मतरकि यै में गोस्साय के कोय बाते नैं छैसंगति करतियैं, तबें नी जानतियैं कि विद्या सीखै लेँ जात-गोत्र बदली केँ कर्णो परशुराम लुग गेलोँ छेलै, आरो देवता के पुरोहित वृहस्पति के पुत्र कच-तांग, नाम बदली केँ दानव पंडित शुक्राचार्य के पास, तबें यहू जानी ले ढीवा, छल सें विद्या पैला के कारण कर्ण आरो कच दोनो शापित होय छै, मतरकि यही लेँ दोनो चटियाँ गुरु केँ गरियावै आकि मूड़ी नैं उतारी दै छै.....हमरोँ बातों पर घरों में जाय केँ ठीक सें सोचियैं.....की धीरो, तोहें कुछ नैं बोलै छैं बे ?” आपनोँ चेहरा आरो बोली में गंभीरता लानतें शनिचरां कहनें छेलै ।

“तोहें तेँ ऐल्लै उस्सट रैं के बात छेड़ी देलैं कि मूडे बिगाड़ी केँ राखी देलैंमानलियौ कि तोरोँ बातों में दम छौ, मतरकि बेमौका के बेबात केकर्है अच्छा नैं लागै छै, नैं लागेँ पारेँ ।” धीरेन्द्र नैं शनिचर आरो ढीवा के बीच जेना बीच-बचाव करतें हुएँ कहनें छेलै, “आरो एकरा में मुँह फुलाय के तेँ कोय बाते नैं छेलै कि तोहें मुँह फुलाय लेलैं ढीवा.....अरे, आदमी तेँ एत्तेँ भयभीत रहेँ लागलोँ छै कि आन लोगो सें कांही कुछ नैं बोलै छै । आबेँ दोस्तो-मोहिन के बीच खुली केँ नैं बोलतै, तेँ कहाँ बोलतै, तोहीं बोलैं ?.....है फुलटुस्सा रैं करभैं तेँ कुरुक्षेत्र में साथ की देवें मरदै ।”

धीरेन्द्र के बातों सें ढीवा के घाव शायत भरी गेलोँ छेलै । भरिये गेलोँ

होतै, नैं ते आपनो मुँहो पर हँसी लानतें हुएँ वै नैं कहतियै, “वहे ते हम्मू कहै ले चाहै छेलियै धीरो, कि कुरुक्षेत्र लड़े वास्तें की सोचनें छें ? कि कुरुक्षेत्र आभी दूरे छै, यै ते पहिनें सें गीता बाँचवो शुरू करी देलकै ।”

“अरे तखनी कुरुक्षेत्र एक बार होलो छेलै, यै लेली गीता एक्के बार कहलो गेलै । एखनी डेगे-डेग पर कुरुक्षेत्र छै, यै लेली डेगे-डेग पर गीता पढ़ै ले लागै छै । आवे तोरो रँ के अर्जुन जखनी-जखनी निराश होतै, तखनी-तखनी हमरा गीता पढ़ै ले लागे ।” शनिच्चर बोललो छेलै ।

बात कन्ने-से-कन्ने चल्तो गेलो छेलै, मतरकि सब्भे मिली के वातावरण एकदम हौलको करी देने छेलै । एत्ते हौलको कि ढीवां फेनू बात शुरू करने छेलै, “ते बोल, ऊ महासभा के बाद आवे की सोचनें छै—करै ले ?” “है होलै नी ।” शनिचर पालथी मारी के बैठी गेलै आरो आपनो मूड़ी आजू-बाजू घुमाय-उमाय के कहे लागलै, “हम्में महामंत्र के बात करी रहलो छेलियौ । ऊ महामंत्र की छेकै, सुन—विधाता कहने छेलै कि जंगल काटी के शरणार्थी बसैलो जाय रहलो छै ? कहैं—हों ।”

सब्भे एक्के साथ कहने छेलै, “हों ।”

“आरो कहने छेलै कि यै सें जंगल कटी रहलो छै । जंगल पर आफत आवी रहलो छै ? कहैं—हों ।”

“हों ।” सबनें फेनू सें एक बार कहने छेलै ।

“बस ढीवा, हमरो राजनीति यहीं सें शुरू होतै । तोरा सिनी गाँव-गाँव जो, वहाँ ताँय जो, जहाँकरो आदमी सभा में नैं ऐलो छेलै आरो वहाँकरो हेनो लोगो के पकड़, जेकरा राजनीति करै के हूब छै, साथे-साथ वै सिनी के पहिलें, जेकरा रहै के घोर-द्वार नैं छै, ऊ बेघर सिनी के कहैं कि ओकरा सिनी के चानन के जंगल वाला हिस्सा में घोर देलो जैतै । गाछ काटी के ओकरा बसाय के बात सोचलो जाय रहलो छै, लकड़ी के घोर बनतै ओकरो सिनी के । मतरकि सावधान, यै में हमरो नाम काँही सें नैं आवे ।”

“मतरकि एकरा सें होतै की ? मानी ले हेनो होय्ये गेलै ते एकरा में हमरा सिनी के की लाभ होतै ?” धीरो टोकने छेलै ।

“अरे बुद्ध, ऊ बेघर सिनी ते वहाँ बसै के हल्ला करतै, नारा लगैतै, जुलूस निकालतै, एस0 डी0 ओ, बी0 डी0 ओ0 के घेराव करतै । सरकारो के यै सिनी के आगू झुकै ले पड़तै । फेनू यै सिनी के घरो ले दू-चार गाछ कटतै आरो दस गाछ तोरा सिनी ले । की समझलैं ?” शनिचरा के आँखी में कहतें-कहतें एकदम्में बाघ-सिंह वाला चमक आवी गेलो छेलै ।

“मानी लेलियौ शनिचर तोरो बुद्धि के ।” ढीवां कहलकै ।

“आबे आरो आगू सुन नी.....जों मानी ले, सरकार वै बेघर सिनी के सामना में नहियो झुकै छै, तेँ वाद-विवाद तेँ बढ़िये जैतै आरो जबेँ वाद-विवाद बढ़ी जैतै, तबेँ विधाता के विद्यापीठ केना खुलतै.....सब ठप्प । नैं विद्यापीठ खुलतै, नैं बेघर बसतै । जबेँ वहाँ कोय नैं होतै तेँ हमरो सिनी के कामोँ में कोय बाधा केना पड़तै ? बोल केना पड़तै ।” किरियैलोँ आँखी सें शनिचर नैं कहनेँ छेलै, “हेना कोशिश हेकरे ज्यादा कर कि बेघर सिनी बसी जाय । फेनू तेँ वहीं सिनी कुच्छू पैसा में जंगल काटी-काटी केँ ‘जग्घा’ पर पहुँचाय ऐतै । आखिर ओकरौ तेँ रहना छै ।”

“बस-बस । होय गेलै शनिचर, होय गेलै । आगू कुछु नैं बोल । आय तेँ पंडित धीरेन्द्र शर्मा जी सें हमरा खाली यही पूछना छै कि आय कोन राशि के प्रवेश भेलोँ छै, जे एक्के साथ दू-दू सिद्धि के लाभ होलै ।”

पर शनिचर आपनोँ भविष्य में एतन्है डुबलोँ छेलै कि ढीवा के दू सिद्धि वाला बाते नैं सुनलकै । सच पूछोँ तेँ आबेँ कोय एक-दुसरा केँ सुनै के तेँ बाते दूर, यहो शायत नैं जानी रहलोँ छेलै कि आमना-सामना में के छै । बेनी तेँ शुरुवे सें नैं बोली रहलोँ छेलै, जेना—जे होय गेलोँ छै, जे होय रहलोँ छै आरो जे होतै, सब ओकरे इशारा पर होलोँ छै, होय रहलोँ छै आरो होतै । खाली बीचोँ-बीचोँ में बैठली चिड़िया के डैना नौँख आपनोँ दोनोँ हाथ ऊपर-नीचे करेँ लागै छेलै आरो आपनोँ दोनो बंद ठोरो केँ तीरी केँ हाँसी दै ।

बेघर, शरणार्थी, हड़ताल, जुलूस, धरना—सबके माथोँ में रही-रही केँ घूमी रहलोँ छेलै । सब्भे के कानोँ में गाछ कटै के आवाज आवी रहलोँ छेलै—खरर-खर, खरर-खर आरो सब बेसुध होलोँ जाय रहलोँ छेलै, जेना संगीत-पारखी के सामना में कोय सिद्ध गायक नैं देश राग छेड़ी देनेँ रहेँ आरो सुनवैय्या केँ आपना केँ संभारना मुश्किल होय गेलोँ छेलै । हों, वै बेसुधी में शनिचर नैं एतना टा जरूरे कहनेँ छेलै, “आबेँ शनिचर केँ एक्के काम, केन्हों केँ कमरूद्दीन सें मन हटाय केँ लतांत आरो खुशी केँ आपनोँ पक्ष में करी लेना—जात पहनेँ जात के होतै कि परजात के ? खून कत्तो पतला होतै तेँ पानी सें गाढ़े रहतै । विधाता वास्तें कमरूद्दीन सभा करेँ पारेँ तेँ वैँ हमरोँ वास्तें महासभा करतै” आरो ओकरोँ चेहरा पर एगो विचित्र रहस्यपूर्ण मुस्कान फैली गेलोँ छेलै ।

आधो भादो जाय रहलो छै । खेती-बारी सें सौसैं गाँव निश्चिन्त होय गेलो छै । अबकी विधाता के खेतो में धान के घास गन-गन करी रहलो छै । आरी में हिन्न-हुन्न घूमतें विधाता सोची रहलो छै, ई शनिच्चर के हाथो में जादू छै, जेकरा छूवी दे, वही सोना बनी जाय । अबकी वैं खेती के भार शनिच्चर पर सौंपी गेलो छैले । ऐला पर मालूम होलो छैले कि आपनो रोपनी सें पहनें हमरे खेतो में रोपनी करवैनें छैले.....सब गुण छै, पर ओकरा होय की गेलो छै । राजनीति करतै । बोले छै, “हमरा नेता बनना छै । है बैलगाड़ी सें चलतें-चलतें कुल्हो भसकी गेलो छै, आबे हेलीकॉप्टर-हवाई जहाज पर चलै के इच्छा छै । आरो यै लेली पैसा चाहियो । पैसे सें चुनाव जीते पारे आरो पैसा की मेहनत सें टपकै छै । पैसा ले ऊ सब करै ले लागै छै जेकरा हमरो पुरखा करै ले हमेशे मना करले ऐलो छै.....सबै जानै छै, शनिच्चर के माथो में जे एक बार अटी गेलो, बस वही टा करवे करतै । कै बार हममें दीपाहौ के भेजी के ओकरा समझाय के कोशिश करने छियै, मतरकि होले की । बड़ी जिद्दी छै । यही जिदपनो के कारण ते वैं एम0 ए0 के पढ़ाय छोड़ी के गाँव पकड़ी लेलकै आरो गाँव पकड़ी लेलकै ते गाँव के कौने नै समझैनें होतै, पर वैं केकरो बात मानले छैले की ? ते आबे हमरो कहला सें की मानतै.....पर यहू बात छै शनिच्चर कि हममें ऊ जंगल नै कटै ले देभौ, हममें कटी जय्यौ ते कटी जैय्यौ । अबकी तोहरे वाला जिद हमू पकड़ी लेने छियौ.....होना के हममें यहू जानै छियै कि जंगल कटला सें तोरा की लाभ होतौ । लाभ जेकरा होतै, ऊ ते आरो कोय छेकै । हममें नै जानै छियै कि भैरो का, सोराजी का आरो गोपी का चुप कैन्हें छै । शनिच्चर, दू आना लाभ मिलतौ ते चौदह आना हुन्नै बंदरबांट होतौ । हों सौसे बदनामी शनिच्चर खाली तोरै मिलै वाला छै । पाप के भागीदारी में बाँट नै होतौ, हौ तोरहै ले ले लागतौ—विधाता के मनो में ढेर सिनी बात उठी रहलो छैले ।

कल्हे के बात छेकै । विधाता के याद आवै छै.....ऊ खेते दिश आवी रहलो छैले, रास्ते में शनिच्चर मिली गेलो छैले । नजर पड़तै, मलकी के नगीच आवी गेलो छैले । “धान की रँ के छै ? खेतो में पानी छै की नै ? खाद डालनें छै की नै ?” पचास गो शनिचरें सवाल करने छैले आरो सबके संतोष वाला उत्तर पावी के कहनें छैले, “चल ई अच्छा करलैं.....अरे खेतिये नी हमरो सिनी के रीढ़ । ई टुटलौ कि रीढ़ टुटलौ ।” हम्मी बात बदली के पूछनें छेलियै, “जंगल-गाछ के बचाव बारे में कुच्छ सोचै छैं कि नै शनीचर ।” यै पर वैं की रँ

तुनकी के कहनें छेलै, “ई सब फालतू बातों से हमरा कुछ लेना-देना नै.....
 .तोहें जंगल बचाव, हुन्नें हजारो आदमी जंगल काटी के बसे के बात सोची रहलौ
 छै.....सरकार से लड़तै, वोन बचावे वाला से लड़तै; तबे हम्में केकरा-केकरा
 वास्ते लड़वै । तोहीं बोल । तोहें हमरो मित्र छेकें आरो बेघर वाला सिनी हमरा
 वोट दै वाला । हम्में देखभै ते दोनों के । पर एक बात ते हम्में मानवे करै छियै
 कि आदमी से बढ़ी के जंगल-पतार नै हुऐं पारे.....आरो एक बात विधाता,
 यै मामला में तोहें हमरा से भविष्य में बात नहिये करियें ते ठीक । एक बात आरो
 कहै छियौ, तोरा जे जंगल-झाड़ लगवाना छौ, लगवावें, मतरकि है सब कामो में
 दीपा के कथी ले घसीटै छै.....दीपा के बीचों में आय-जाय से, के एक बार
 हम्में जे बात तोरा से खोली के कहै ले चाहै छियौ, ऊ कहना-करना बड़ी मुश्किल
 बनाय दै छै, भले तोरो काम जे आसान होय जाव ।.....अच्छा होतौ विधाता
 कि तोहें आपनो है रँ के कामो में दीपा के नै घसीटै ।”

आरो नै जानौ कखनी, विधाता के मनो पर उतरी आवै छै दीपा.....
 ...दीपा.....दीपा—सचमुचे में ते दीपा नै ओकरो जिनगी के कत्ते आसान
 बनाय देनै छै । रूखे नाँखि हौलको.....कुछुवे साल भर पहिने ते ऐलो छै
 दीपा शहरो से आरो यही बीचों में ओकरो मनो में कत्ते-कत्ते बात ऐते
 रहलौ छै—है करी दै के, हौ करी दै के । विधाता सोचै छै—दीपा सच्चे दीपा छेकै,
 तभिये ते ओकरो नाम दीपा छेकै । ओकरो पास जैहें हमरो जिनगी के सब्भे
 अन्धकार आपने-आप छटे लागै छै.....ऊ आगू बढ़ै के बात सोचै छै आरो
 दीपा दीप बनी दूर ताँय रास्ता के इंजोर करी दै छै.....शनिच्चर नै ठिक्के ते
 कहलकै कि दीपा हमरो मुश्किल के आसान करी दै छै.....विधाता के लागै
 छै, जेना दीपा के बिना ओकरो कोय वजूदे नै रहै छै.....दीपा विधाता के
 आकाश दै छै—उड़ै ले, ओकरा जमीन दै छै—दौड़ै ले.....आरो दीपा के
 आँखी में कभी-कभी ऊ केन्हो बेसुधी उतरी आवै छै, जे देखतैं हमरो चेतना
 अलोपित हुऐं लागै छै.....दीपा हमरो जीवन के उमंगे नै, शांतियो छेकै.....

विधाता के हठाते पौरको साल के बात याद आवी गेलै—ठीक यही रँ
 भादो के दिन छेलै.....मवेशी से कोय चास नै चरवाय दे, यही सोची ऊ खेतों
 दिश निकली गेलो छेलै.....यही समैयो होतै.....बारिश पड़ी के उखेल
 होय गेलो छेलै.....आकाश एकदम काँचे रँ साफ.....सिर-सिर हवा से
 सौंसे अंग गेंदा-गुलाब बनी-बनी जाय छेलै.....दीपा ठीक यही खेतों के ऊ
 कोना पर बैठली छेलैगीत गावै में लीन । हम्में कल्ले-कल्ले ओकरो पीछू
 आवी के बैठी गेलो छेलियै । दीपा गैले चल्लो जाय रहलो छेलै,

आमैं वन बोलै छै कारी कोयलिया, बीजू वन बोलै छै मोर
 बाबा-वन बोलै छै पातर पियवा, जियरा सालै छै मोर
 तखनी ठिक्के तेँ हम्में कत्तेँ बेसुध होय गेलोँ छेलियै, जेना आमोँ के वोँन में
 कोयल बार-बार कुहु-कुहु करैँ लागलोँ छेलै आरो हम्में बेचैन होय गेलोँ छेलियै,
 ठीक कोय बच्चे नाँखि । दीपा के सुरोँ सें ? की गीत सें ? की गीत के भाव सें ?
हम्में गौर सें दीपा केँ देखनेँ छेलियै, कांही हमरोँ आवै के जानकारी तेँ
 नैं होय गेलोँ छै ओकरा ? नैं, ऊ तेँ आपने धुनोँ में डुबलोँ छेलै.....प्रश्न
 करै में, फेनू ओकरोँ उत्तर दै में,

कोनी वन बोलै छै कारी रे कोयलिया, कोनी वन बोलै छै मोर
 हे कोनी वन बोलै छै पातर पियवा, जियरा सालै छै मोर
 तखनी हमरोँ मनोँ में यहें होलोँ छेलै, जेना ओकरोँ कानी में बोली दियै, दसो
 अंगुरी सें ओकरोँ आँखें मुंदतें—तोरे पीछू बोलै छीं.....पर की सोची केँ हम्में
 ई नैं बोलै पारलेँ छेलियै.....हमरोँ बढ़लोँ हाथ अनचोके रुकी गेलोँ छेलै
कांहीं दीपा हमरा बैठतें देखी तेँ नैं लेलेँ छेलै आरो हमरोँ उपस्थिति केँ
 जानियो अनठियैलेँ होलोँ छेलै ? आरो की वै हमरोँ मनोँ के भाव पढ़ी लेनेँ
 छेलै । नैं तेँ कैहिनेँ तुरन्ते गैलेँ छेलै,

कोन रस माँगै छै काली कोयलिया, कौनेँ रस माँगै छै मोर
 कौन रस माँगै छै पातर पियवा, जियरा सालै छै मोर
 आम-रस माँगै छै काली कोयलिया, मेघरस माँगै छै मोर
 जवानी-रस माँगै छै पातर पियवा, जियरा सालै छै मोर
जवानी-रस माँगै छै पातर पियवा.....की दीपा ई हमरे लेँ गैलेँ छेलै ?
 कहलेँ छेलै ?.....केन्होँ गुदगुदाय गेलोँ छेलै ओकरोँ सौँसे ठो अंग—विधाता
 ऊ गुदगुदी जेना अभियो आपनोँ देहोँ में नुकैनेँ राखलेँ छै । वै आँख मुनी केँ
 ऊ गुदगुदी, ऊ सिहरन केँ याद करै छै आरो हठाते नीचें सें लै केँ ऊपर ताँय
 सिहरेँ लागै छै । एकरस बहतें हवा के झोकोँ सें जेना धान उब-डुब करतें रहेँ,
 दीपा के बात याद करी विधाता के वही हाल होय गेलोँ छै । आरो फेनू विधाता
 अनचोके बड़ी विह्वल होय जाय छै, एकदम्मे बेचैन, जेना झरबेरी के झाँटोँ लगी
 गेलोँ रहेँ । जेना बाँधोँ के किनारी काटी केँ राखलोँ गेलोँ बबूली के डारी
 सिनी पर ऊ चलतें-चलतें गिरी गेलोँ रहेँ.....विधाता यहू पीर सहेँ पारै छै,
 मजकि दीपा संग बिना ओकरोँ जिनगी जे रँ हैरैलोँ-हैरैलोँ होतै, ऊ तेँ एकदम्मे
 असह्य छै ।

आरो फेनू विधाता केँ खयाल ऐलै.....ठीक आय सें पाँचवे रोज

राधाष्टमी के दीपा शहर चल्लो जैती.....बी0 ए0 के आखरी साल छेकै । कहलें तेँ यही छै कि—परीक्षा खतम होय के देरी भर छै, हम्मैं रिजल्ट के आसरा में एक्को पल वहाँ नैं ठहरेँ पारौं । परीक्षा भले दै लेँ हम्मैं वहाँ जाय रहलोँ छी, मतरकि हमरोँ रिजल्ट तेँ हमरोँ गामे छेकै—आखिर है कहै के की मतलब हुऐँ पारेँ दीपा के.....एकरोँ मानेँ तेँ यहू हुऐँ पारेँ कि दीपाहीं हमरोँ साथें ई निश्चय करी लेनेँ छै कि दोनों के भाग्य एक्के घरों में छै । एकरोँ आरो की मतलब हुऐँ पारेँ ?.....हों एकटा मतलब आरो निकाललोँ जावेँ सकै छै कि परीक्षा देला के बाद हमरोँ संकल्प के पूर्ति में ओकरोँ अडिग सहयोग..... मजकि नैं, जों यही कहै लेँ दीपा चाहतिये तेँ ई बात सोझे-सोझे कहलोँ जावेँ सकै छेलै, एत्तेँ लक्षणा-व्यंजना में बोलै के की जरूरत छेलै ?.....ई बात तेँ नैं हमरा सेँ छुपलोँ छै, नैं दीपा सेँ कि हमरा दोनो एक-दूसरा केँ कत्तेँ चाहै छियै, तबेँ ओकरोँ रिजल्ट वाला बात के दोसरोँ-तीसरोँ मानेँ लगाना की.....आरो ई सोचन्हें विधाता एकाएक जहाँ-के-तहाँ ठाड़ोँ भै गेलै, जेना गर्मी सेँ बेकल कोय आदमी के माथा पर वर्षा के धार छूटी पड़लोँ रहेँ आरो ऊ आपनोँ देह-हाथ एकदम थिर करी रुकी गेलोँ रहेँ.....भीगेँ लागलोँ रहेँ आपनोँ दोनों आँख मूनी केँ । अमृत केँ जेना रोम-रोम सेँ पीवी लै लेँ चाहतें रहेँ । विधाता केँ जेना कोय बातों के सुधे नैं रही गेलोँ रहेँ ।

चर्र चों S S S, चर्र चों S S S । खुशी लाल के गाड़ी छेलै । गाड़ियो खुशिये लाल हाँकी रहलोँ छेलै.....चर्र चों SSS, चर्र चों SSS.....आरो आँख बन्द करनेँ खाड़ोँ विधाता केँ काँही कोय आवाज नैं सुनाय पड़ी रहलोँ छै, जबेँकि खुशीलाल के गाड़िये गाँव भरी में कुछ है रं के छै, जेकरोँ पहिया रोँ आवाज मील भरी दूरहौ सेँ पहचानलोँ जावेँ सकै छै ।

“विधाता ।” खुशी लाल के एक जोरदार आवाज नैं विधाता केँ आकाश सेँ जमीन पर लानी देनेँ छेलै । आपनोँ मूड़ी घुमाय केँ वैनैं आँख बाँधी दिश करलकै तेँ देखलकै, खुशी लाल रास जोरोँ सेँ खीची बैलोँ केँ रोकी रहलोँ छेलै आरो गाड़ी कर्र SSSS के आवाजोँ के साथें रुकी गेलोँ छेलै ।

“विधाता, तोरा दीपां तुरत बुलैनेँ छौ.....भागलपुरोँ सेँ ओकरोँ कोय सम्बन्धी ऐलोँ छै, ओकरे साथ शहर चल्लो जैती । कल्हे विहानी । हठाते ई प्रोग्राम बनी गेलै । कहनेँ छौ, जहाँ हुऐँ, तुरत भेजी दै लेँ.....से तेँ हम्मी पहुँचाय ऐतियै, मजकि बाबा भारती ऐलोँ होलोँ छै.....आबेँ इस्कूलिया जिनगी के साथी, केना केँ लै लेँ नैं जैय्यै, तोंही बोल.....सड़क के हौ पार पहुँचतें-पहुँचतें तेँ रात गिरेँ लागतै । हम्मैं चलै छियौ भाय । मतरकि तोहें दीपा

सैं जरूरे मिली लियैं, बड़ी निहोरा करी के हमरा सैं कहनें छौ.....हट, हट, हट ।” खुशीलाल नैं बैलो के पंजराठी पर आपनो एड़ी सैं गुदगुदी लगैलकै आरो पैनो सैं बैलो के धौनो के हुरकुचवो शुरुओ नैं करले छेलै कि गाड़ी सरपट बांधी पर दौड़े लागलै ।

“तोहें एक्को मिनिट यहाँ रुकियैं नैं, तुरत जाय के मिली लियैं ।” जैतें-जैतें खुशीलाल हकाय के सुरु में कही गेलो छेलै ।

.....नैं दीपा नैं । हममें तोरा सैं नैं मिले पारों.....पग-पग पर साथ चलैवाला के नजरी सैं दूर होतें देखे के सामरथ हमरा में नैं छै । यही सैं ते लोगें हमरा सिहो के खाल में हिरण कहै छै । हौ हिरण, जे बन्दूक के आवाजे सैं बेहोश होय जाय.....हममें आपना के संभालै नैं पारभों, केन्हौ के.....ई सब जानतहों कि ई बिछोह महिनो भरी के नैं छेकै.....फेनू दिवस जात नहीं लागहुं बारा.....हों सब कुछ जानतहों, मन मने होय छै—आपनो-आपनो मोन; मन के गति सैं बन्हलो.....जा दीपा, हममें तोरो लौटी आवै के इन्तजार में रहवों । यही ठाँ सैं उगते-डुबतें भगवान के साथे-साथ, ताकि ई सुरुज साक्षी रहे ।” विधाता ऊ अनजान में बोली गेलो छेलै आरो शायत हामी लै वास्तें ही विधाता सुरुज दिश नजर उठैने छेलै, पर वहाँ पर सुरुज नैं, सुरुज के लाली भर दूर-दूर तौय पसरलो छेलै, जेना कोय ओढ़िया-ओढ़िया भरी सिन्दूर छिड़काय के आपनो मांग लाल करी लेले छेलै ? कि केकरो खून होय गेलो छेलै ? विधाता मनझमान होय आपनो गोड़ घरो दिश बढैने छेलै, मतरकि ओकरो गोड़ ते एकदम थुम होय गेलो छेलै । केन्हों के ऊ घसीटलें-घसीटलें आगू बढलो छेलै ।

दीपा बड़ी उदासी आरो असमंजस के बीच डूबतें-उतरैतें एकदम भोररिये गाँव छोड़ी देने छेलै । फरचो होय सैं पहिने । विधाता नैं ऐलो छेलै । ई बात दीपाहों जानै छेलै कि जाय वक्ती विधाता विदाय दै ले आव्हे नैं पारे—कहियो नैं आरो केकरो ले नैं, तबे ओकरे वास्तें केना ऐतियै । तैहियो दीपा के यहें विश्वास छेलै कि ऊ केकरो ले कहियो विदाय दै ले भले नैं ऐलो रहे, मतरकि हमरा ले जरूरे ऐतै, आरो जबे विधाता दीपाहौ वक्ती नैं ऐलो छेलै ते दीपा

काका के गाड़ी से बाँका इलाज वास्ते भेजी दियै, भेजिये देवै, अभी ते हमरो देवे वाम छै ।” विधाता आपनो दोस्तो से बातों के क्रम में ई टा आखरी में जरूरे कहै । यही कारण छेलै कि ओकरो दोस्त जबे भी मिली जाय ते यहे कहै—“अरे भाय के उमिरो ते अस्सी के पार जाय रहलो छौ, एत्ते दुख में रहभैं ते तहूं जेभे ।” ई बहाना से विधाता के राहत मिली गेलो छेलै ।

अभ्यास आदमी के सब स्थिति ले अभ्यस्त बनाय दै छै । जो दीपा ई बात जानै छेलै कि विधाता विदा वक्ती नै आवे पारे, ते विधाताहौ ई बात जानै छेलै कि दीपा परीक्षा खतम होहैं नै आवे पारे । आव्हौ केना पारे ? खाली परीक्षे के बात ते छै नै । घोर-गृहस्थी, लोर-जोर, सोर-संबंधियो के मनो ते जोगना छै । आरो यहे जोगे में यहे साल भरी के दौरान विधाता देखने छै कि दीपा जबे-जबे भी कहने छै, “बस दुए रोज में लौटी ऐवै” तबे-तबे ऊ पाँच-दस रोज बादे लौटलो छै । आरो अबकी ते परीक्षे दस-पन्द्रह रोजों तक चलतै....

महिना से ऊपरे बीते लागलो होतै । दीपा के लौटे के बात ते दूर, ओकरो कोय चिट्ठियो नै एलो छेलै । पन्द्रह-बीस रोज तक विधाता चिट्ठिये फेरो में दीपा के घोर जैते-ऐते रहलो छेलै । कैक दिन ते ऊ आपन्है डाकघर पहुंची जाय । डाक बँटवो करै छै ते तीन बजे दिन के बादे आरो एत्ते समय तांय विधाता के इन्तजार करते रहवो बस के बात नहियो रहतै, ऊ रहै ।

विधाता के यही मनस्थिति देखी के चौरासी आरो खखरी खूब सक्रिय होय गेलो छेलै । दसे रोज के भीतर ओकरा दोनों के हुलिये बदली गेलो छेलै । शनिचरे नाँखि खादी के खलता आरो पैजामा—दोनों के नेता के आदमी बनाय देले छेलै । बोलियो-चाली में जेना हठाते परिवर्तन आवी गेलो छेलै । रुकी-रुकी बोलै, जेना बातों के कीमत होय छै, यै लेली ऊ सब जे-से केना बोलतियै आकि फेनू एकदम शुद्ध-शुद्ध बोलै के क्रम में वाक्य मनेमन पहलें सिहारतें रहे । जे भी हुएँ, आवे चौरासी आरो खखरी के बोल-चाल जेना एकदम बदली गेलो छेलै । कोय कहै—मुखिया के चुनाव हुए वाला छै नी, पक्षों में लोगो के पटियैतै, यही लेली है हुलिया बनैले छै ।” कोय कहै, “अबकी यहू सब मुखिया-चुनाव में खाड़ो भेतै ।” गाँव-गाँव बुली-बुली लोगों से दोनों मिली रहलो छै । लोगों कनफूस करै, “अरे नै जानै छैं, ई दोनों घोंघा आरो शनिच्चर जे एकरो सिनी के शंख छेकै, ओकरै देखी के ई धरान धरले छै ।” कोय कुछ, ते कोय कुछ । मतरकि है सब बातों से दोनों पर कोय असर पड़ैवाला नै छेलै ।

दोनों गाँव-गाँव घूमी के गरीब-गुरबा के चानन-पट्टी में गाछ काटी-उटी के बसी जाय ले उकसैले छेलै, ई कही-कही कि सरकार तोरो सिनी के पक्षों

में तेँ छेवे करीं, गाँमों के ताकतो तोरे पक्षों में छौं । मजकि गाछ काटी केँ बसै के नामों पर कोय्यो तैयार नैं भेलों छेलै, “बाप रे बाप, ऊ गाछ थोड़े छेकै, साधु-मुनि के जटा छेकै, हुनके सिनी के धोड़, हाथ-गोड़ । गाछ काटी केँ के पाप लिएँ ।”.....मुखिया वास्तें शनिच्चर खाड़ों होय रहलौ छेलै । गामों के हाकिम बनतै शनिच्चर, तबेँ देखना छै—के ओकरोँ विरोधों में सभा-मिटिंग करै छै आरो कौनै ओकरा कोय काम करै सें रोकै लै छै.....शनिच्चर पक्षों के भैरो चौधरी लोगों केँ कही रहलौ छै, “शनिच्चर, जों मुखिया भेलौं तेँ गाँव स्वर्ग बनी जैतै—स्वर्ग ।” मजकि दुसरोँ पक्षों के लोगों के यही कहना छेलै, “मुखिया होय के देर भर छै, लोगों के साँसो लेभौ दूभर करी देतौ ।” यही लेली दखिनवारी पट्टी सें यहू आवाज उठी रहलौ छेलै कि मुखिया-चुनाव में विधाता केँ खाड़ों करलौ जाय.....विधातौ मुखिया पदों वास्तें खाड़ों भै रहलौ छै ।”

शनिच्चर यै बातों केँ लै केँ सीधे कै बार विधाता सें मिलियो चुकलौ छेलै, ‘देख भाय, जों तोरा मुखिया बनै के किंछा छौ, तेँ हम्मैं आपनोँ मोह तजै छियौ । एक्के बातों वास्तें दू दोस्त लड़े, हमरोँ नीति के विरुद्ध छेकै । फेनू वहाँ, जहाँ तोहीं छैं ।” विधाताहौं ओकरा सें साफ-साफ कहनेँ छेलै, “ई अफवाह छेकै, तोहें सोचलैं केना कि हम्मैं तोरोँ खिलाफ कुछ सोच्छौ पारौं, करै के बात तेँ दूर ।” मजकि विधाता के बातों पर शनिच्चर पक्षों के लोग नैं मुश्किले सें विश्वास करनेँ छेलै । खखरी-ढीवां केँ तेँ साफ कहनेँ छेलै, “शनिच्चर ई युद्ध छेकै आरो युद्ध में झूठ-साँच कुछ नैं होय छै । सब झूठ, नैं तेँ सब साँच.....की मालूम विधाता भीतरे-भीतर आपनोँ रास्ता बनाय रहलौ रहें आरो तोहें निश्चिन्त होय केँ सुतले रही जो—खराहें नाँख ।”

“खखरी ठिक्के कहै छै ।” बहुत तरह सें सोच-विचार करी केँ शनिचरौं मनेमन राय बनैलेँ छेलै, “आबेँ आदमी हरिश्चन्द्र तेँ नहिये नी रही गेलौ छै कि जे बोलें वही करें । आबेँ आदमी पर विश्वास करी लेवोँ होने मुखता छेकै, जेना कंगनवाला बाघोँ पर विश्वास करी पंडितें जान गवैलेँ छेलै ।”

यहें कारण छेलै कि एक दिन गाँव में जबेँ विन्डोवे नाँख ई कानाफुसी उठलै कि ढीवां आपनोँ टोला के नाक-आँख नीचेँ करी देलकै आरो एकरा में शह छेलै विधाता के, तबेँ शनिच्चर पक्ष-विपक्ष में कुछ बोलै के बदला गुम्मी साधी लेलेँ छेलै । बातो कोनो साधारण होतियै, तेँ होतियै.....बात ई छेलै कि ऊ दिन घोर अमावश्या के पक्ष छेलै—एकदम गुज-गुज अन्हार । निरयासी के देखलौ सें आपनोँ हाथ नैं सूझें । भाखर के बेटी साँवली सँझवाती बेला के बाद बाँधी दिश असकरी जाय रहलौ छेलै कि पाकड़ गाछ के पीछू नुकलौ ढीवा हठाते

निकली ऐलो छै । साँवली के कस्सी के पकड़ला के बाद आपनो बायां हाथ से ओकरो मुँह टटोरी के, दायां हाथ से, छिछैन्नी गंधवाला मोँद केरो बड़ो रँ झिन्नुक सौंसे साँवली के मुँहो में घुसाय देले छै, आरो खलिया झिन्नुक लेने वहाँ से सरपट भागी गेलो छै, खेतो के बीच-बीच गिरते-बजड़ते । पहने ते साँवली डरो से देर तौय थरथरैते रहलै । फेनू ई सोची के कि चोर-बदमास दोबारा नै कहीं से.....से ऊ भागै के बदला पूरे जी-जान से चिकरना शुरू करी देलकै, “चोर ! चोर ! चोर !” देखतै-देखतै बीसो टार्च के रौशनी चारो टोला से झकझकावे लागलो छै । फेनू देखतै-देखतै बान्हो पर पाँचो सौ आदमी टूटी पड़लो छै.....साँवली ने मोँद से लेधरैलो मुँहो के अँचरा से पोछी लेने छै“अरे ई ते भाखर के बेटी छै.....है रात-बेरात भला असकरी आवै के हिन्ने की जरूरत ?.....आबे असकरी दिशा-मैदान जाय के समय रहलै ?.....तोहो देखलै बेटी कि ऊ कन्ने भागलै ?” खंतेसर ने आपनो तीन सेलवाला टार्च के रौशनी से चारो दिश के झकझकैते पूछलकै ।

“हुन्ने, हौ दिश” साँवली बतैने छै ।

“हौ दिश.....हौ दिश ते पूबारी टोला पड़ै छै । विधाता के टोलाई खेतो ते विधाताहे के छै.....आयकल आपनो खेतो पर विधाता छोड़ी के आरो कोय ते रहवो नै करै छै । भोरे से लै के भर शाम तौय.....।” आरो फेनू फरचो होते-न-होते विन्डोवो उठिये ते गेलो छै.....“विधाता भाखर के बेटी साथे राती बदमाशी करै ले चाहै छै.....अन्हरिया के मजा लूटै ले चाहै छै.....अरे हिन्ने नी साधु बनी गेलो छै, एकरो संगतियो ते होने रहलो छै.....गाँमो में केकरा नै ई मालूम छै, कि विधाता खाली नामे ले छै, ओकरो सब संगतिया ते दारू-ताड़ी के प्रेमी, आय साधु कत्तो बनौ, चोर चोरी से गेलै ते हेरो-फेरी से गेलै.....बेचारी साँवली बची गेलै, नै ते काहूँ मूँ दिखाय लायक नै रही जैतियै ।” विन्डोवो एकबारगिये जमीन से सरँगो तौय उठलो छै । सब्भे ई बातों के सुनले छै । मतरकि है सिनी बात के विन्डोवो, कौन टोला से उठलै ? केकरहौ मालूम नै हुऐ पारलै.....कमरूद्दीन के देहो के ते जेना सौंसे खून मगज पर चढ़ी गेलो छै । कौन टोला में नै जाय के ई बात कहै वाला के करेजो नापै के बात कहले होतै । पर कोय सामना में नै ऐलो छै । एकदम चुपचाप । शक जाय छै ते रही-रही के शनिचरे पर । पर वे हेनो नीच बात नै बोले पारे । हों हुऐ सकै छै, केकरहौ से ई बात उड़वैले रहे । कोय अचरज नै । हुऐ-न-हुऐ मुखिया-चुनाव से पहिने विधाता के बदनाम करै वास्ते कहीं वे ई ढेंस विधाता पर लगवैने रहे.....जो विधाता चुनाव लड़वो करे

ते ई घटना के बाद ओकरा वोट के देतै ?.....” से बिना आव-ताव देखले खुशी लाल आरो प्रसून लतांत के लेने-देने जोगी, शनिच्चर के दुआरी पर पहुँची गेलो छेलै । लतांत वाकिफ छै, खुशीलाल आरो योगी के गोस्सा से, काँही गोस्सा में अनर्गल नै होय जाय, से लतातै बात शुरू करने छेलै, “शनिच्चर तोहें सब बात सुनले होभैं ।

“हों, सुनलियै । आबे एत्ते बड़ो गाँव छै रुपसा । कन्ने से की बात उठै छै, कन्ने खतम होय जाय छै, है के पता लगावे पारै.....पहिने तोरा सिनी बैठ ते ।”

“हम्में सिनी यहाँ बैठे ले ऐलो छियै की ?” जोगी के आवाज में गोस्सा के अंश छेलै, अरे हम्में ते ई जानै लेली ऐलो छियै कि केकरो बित्ता भरी के करेजो रातो-रात कोस भरी के होय गेलो छेलै, जौने विधाता पर हेनो आरोप लगाय के साहस करलकै ।”

“अनिरुद्धें भेजलो छै तोरा तीनो के की ?”

“हों, अनिरुद्धें भेजले छै ।” लतान्ते कहने छेलै ।

“कैन्हें, ऊ नै आवे पारै छेलै ?”

“ऊ ते हौ करेजा वाला के पता लगले पर ऐतै । एखनी नै ।” जोगी के बोली एकदम कठोर होय गेलो छेलै ।

“तबे ते ठिकके छै । सी0 बी0 आई0 से जाँच करावै.....खैर छोड़ें ई सब बातों के । अबकी हम्में मुखिया-चुनाव में खाड़ो भेलो छियै । खाड़ो होय के ते बबुआन टोला से चेतो सिंह, कैथटोली से रतन सिन्हा आरो बभनटोली से बांके पांडे भी खाड़ो होलो छै । सब्भे आपनो-आपनो जातो के वोट देतै । ई ते बोल-तोरा सिनी के वोट हमरा मिलतै की नै ? एकटा जाति के सभो बुलैने छियै । आबे तोरा तीनों सोचतें होवै कि वोट-वाट में जात-पात शनिच्चर की बोलै छै । कोय है बात सुनतै ते की बोलतै.....अरे की बोलतै । जाति-महासभा कहिया नै छेलै, अरे नेहरुवो जी के समय में ब्राह्मण-महासभा, चन्द्रवंशी-महासभा, कायस्थ-महासभा, सूर्यवंशी-महासभा, ब्रह्मर्षि-महासभा छेलै । वैश्य-महासभा, कुरमी-महासभा देखी-सुनी के केकरो चूतड़ कथी ले फाटै छै । सब्भे के राजे करना छै ई देशों में, लोकतंत्र कहिया रहलो छै, जे आय होय जैतै । माथा पर से खाली टोपी ते हटावै, सब के नीचे ओकरो जात लिखलो छै । है जे उजरो, कारो, पीरो, लाल, हरा टोपी छेकै, ऊ खाली देखशोभा”

सब्भे के चुप देखी शनिचरे झट आगू बात बढैने छेलै,

“देखें जोगी । कैथटोली छै की नै छै ?”

“छै”

“ग्वरटोली छै की नैं छै ?”

“छै”

“कदरसी छै की नैं छै”

“छै”

“आरो बभन टोली छै की नैं छै”

“वहो छै”

“हम्में पूछै छियौ, जबे कुम्हर टोली छेवे करै, राजपूत पट्टी छेवे करै, डोमसी छेवे करै, चमरटोली छेवे करै, ते सब जातो के आपनो-आपनो संगठन जों बनै छै ते केकरो केन्हें कुच्छू फाटै छै आरो कथी ले । पट्टी रहतै ते पार्टियो रहतै । दल आरो पार्टी खतम करै ले चाहै छैं, ते पहिलें कदरसी कैथटोली के बीच बसाव आरो बभनटोली के डोमासी बीच । होतौ ? ई नैं होतौ ते संगठन बनवे करतौ । अरे शहरो में की नैं होय रहलो छै, बोल !”

“हम्में गाँव के बात करै छियौ । जबे बात गामो के हुए ते गामे के बात करें । गाँव के शहर में, शहर के गाँव में नैं घुसियाव” खुशीलाल नैं आपनो ठोर सीएँ नैं पारलो छेलै, ऊ आरो कुछ बोलै वाला छेलै, मजकि ओकरा रोकतें हुए लतातें कहने छेलै, “तोरो बात ते ठीक छै, मजकि पाप के पुण्य समझी, यै लेली नैं ढोले जावे सके कि ऊ पाप हमरो पूर्वज नैं ढोले छै । गू, गुए छेकै, गोड़ सें लगावे कि कपारो सें; की होय छै ।” लतातें ई कही के आपनो मंसा साफ करी देने छेलै । आगू के बात खुशीलाल नैं पूरा करतें कहले छेलै, “ई ते हमरासिनी विधाता साथें आगू तै करबै कि की करना छै ।”

खुशी के बात सुनहैं शनिच्चर के मूड बदली गेलो छेलै । वैं वहे मूडो में कहलकै, “हम्में ते नैं पुलिस के आदमी आरो नैं मुखिया, कि कुच्छू तोरो सिनी के मदद करे पारों । हों मुखिया-चुनाव हमरो पच्छो में भेलौ ते ई मदद जरूरे करवाय देवौ ।” फेनू ऊ रुकी के कहने छेलै, “ई बात अनिरुद्ध साथें विधातौ के कही दियै.....जो, कत्ते देर खाड़ो रहवे । गोड़ दुखी जैतौ । फेनू कोस भरी कलेजो वाला के ते खोजना छै, गोड़ के थके सें बचैय्ये ले लाजे । पता नैं ऊ कोस भरी कलेजावाला कहाँ रहे । रहे की नैं रहे ।” कहतें-कहतें शनिच्चर एकदम ठहाका मारी के हाँसी पड़लो छेलै ।

जोगी, प्रसून आरो खुशी लाल लौटी ऐलो छेलै, बिना कुच्छू बोलले । एकदम गुमसुम उदास मनो सें, जेना तीनो आखरियो बाजी हारी गेलो रहे आरो पासा पर सें बड़ा अपमानित होय के उठै ले पड़लो रहे ।

दीपा के शहर गेला के बाद से होन्हौ के विधाता लोगो से कटले-कटले रहे छेलै । साँवली के घटना आरो अफवाह ने ते ओकरा आपने गामो में एकदममें परदेशी बनाय के राखी देने छेलै । है कहो कि बोलनै-बाजना छोड़ी देले छेलै । कोय बहुत टोकै ते बस जरा टा मुस्की दै । यहे बहुत आरो आगू बढ़ी जाय । हों, ई बातों से ओकरो दोस्त सिनी जरूर चिन्तित रहे । कहै, “है रँ ते विधाता एकदममे पागल होय जैतै.....भारी चोट पहुँचलो छै साँवली वाला बातों से । मीरा भाभियों ते ओकरा कत्ते समझैने छै—जेना बुतरू के समझैते रहै—मंदिर-देवता पर काग-चील आसन-निष्ठा करले फुरै छै, ते कोन मंदिर अपवित्र होय जाय छै आरो कोन देवता अछूत ?.....डरो से नै बोलै ते नै बोलै, है ते सब्भे के मालूम छै कि ऊ छौड़ी के केकरा से परेम-पाती छै आरो कौने शहद-लेमनचूस चटैने छै.....तोहें ते बेकारे साथ-संगत तजी के मौनी बाबा बनलो फिरै छौयै से ते उत्पाती के आरो बोलै के मौका मिलतै.....लोगें यहे नी कहतै, दोषी छै ते बोलतै की ?” मजकि मीरा भाभियो के कोय बातो के असर वै पर नै पड़लो छेलै । पहाड़ पर जेना बरसा के पानी पड़ी के सीधे नीचें ससरी गेलो रहै ।

ऊ दिन से ठिक्के टोला-टोला में काना-फूसी शुरू भै गेलो छेलै, जबे गाँववाला के ई पता चललै कि विधाता महीनो वास्ते गामो से बाहर चल्लो गेलो छै । नै ते अनिरुद्ध, खुशी आरो जोगी के ई बात के मानै ले कोय मोर-मरद तैयार छेलै कि विधाता वृक्ष संबंधी नया ज्ञान हासिल करै ले बाहर गेलो छै, आरो नै ते विसपुरियावाली मीरा के कोय बातों के गाँमो के कोय्यो जोर-जनानिये । टोला-टोला के बूढ़ी-जवान मौगी में बस एक्के रँ काना-फूसी चले लागलो छेलै, “कै दिनो ताँय आपनो कारो मुँह ढाँपी के गामो में नुकैले रहतियै, से शहर भागी गेलै, झरकलो मूँ झांपलै निक्को.....अरे साँवली के की, कहूँ-न-कहूँ, ठेड़ो मिलिये जैतै, बेटी आरो धरती कहीं परतियो रहलो छै की ? की कहीं रानियो-पानियो छुतावै छै । मतरकि विधाता आपनो देखौ.....अरे, अमीरो के बिगड़लो गाँव आरो बापो के बिगड़लो नाँव कहीं सुधरै छै, जे विधाता सुधरी जैतियै.....कहाँ गाँव के सब मुख जोर-जनानी के सुधारै के बात करै छेलै आरो कहाँ साँवलिये के मूँ कारो करै ले तड़-फड़.....राम कहो, ई ते ठीक समय पर सबके पता लागी गेलै, सुअरी के गू—नै नीपे लायक, नै ते पोतै लायकई ते एक दिन होनै छेलै । कलाली में बैठी-बैठी के गीत गावै वाला ई

नैं करतियै तेँ की करतियै, कालकोँ लठैत, आयकोँ डकैत.....ई तेँ सब्भे केँ मालूम छै भोतरी माय, एकरा में अचरज की करभौ.....ई तेँ कहौ ठीक कि पहिनेँ पापोँ के भेद खुली गेलै आरो ऊ गामोँ सें चली देलकै, नैं तेँ एक्के नैरानोँ, लेतियै सौँसे घरेनोँ ।” जत्तेँ जनानी ओत्ते रँ के बात गाँव-गाँव में चलेँ लागलोँ छेलै ।

पर गाँव-टोला में हेनो घोर कम नैं छेलै, जहाँ विधाता के पक्षों में बात उठै, “विधाता मुँहजोर नैं छै, तहीं सें नी । कदुआ पर तेँ सितुओ चीखोँ होय छै, नैं तेँ हौ परफुलवा, शनिचरा हेनोँ छोड़ा विधाता सामना में की छै.....विध गतौ के दोष छै, पंचैत में बात रखतियै तेँ सब पोल खुली जैतियै, तबेँ की करभौ—बरे बुढ़लेल्होँ तेँ दहेज के लेतै.....अरे बनैला पर बरियो में भी टांग होय छै.....एखनी देखौ, की रँ शनिचरौ के दुश्मनो शनिचरे के पक्षों में बोलै छै, तेँ जेकरोँ मड़वा, तेकरे गीत, यही नी.....तेँ एक दिन सब भेद खुलवे करतै, काठोँ के हड़िया एक्के बार.....देखियौ नी कुटनी घोर चल्लोँ जैतै, सास-पुतहू एक्के होतै.....देखनै तेँ छै कि कत्तेँ दिन भला लोग जाड़ा सें मरै छै आरो गीदड़ें बाँधै छै गाँती ।”

विधाता पक्षों के जोर-जनानी के भीड़ विसपुरिया सवासिन मीराहै कन जादा लागै छै, न तेँ साँझै-बिहाने वसन्त काका के चौपालों पर । बसन्त काका के दुआरी पर बैठैवाला बैठकी में सब रँ के बात होय छै—विधाता के दोष सें लै केँ ओकरोँ चिन्ता-चिन्तन तक—गाछ-बिरिछ आरो गामोँ केँ बचाय के चिन्तामहिने भरी बाद गामोँ के मुखिया-चुनाव.....टोला-टोला के फूट.....अबकी तेँ बबुआन टोलों, बभन टोली, कुरमी टोला, जादव टोला, सब्भे टोला सें आदमी खाड़ोँ होलोँ छै, मुखिया वास्तें । के जीततै, कहना मुश्किल छै । हवा तेँ यही छै कि वोट आपने-आपने जातोँ के लोंगे देतै.....तबेँ तेँ जे जात के लोग सबसँ जादा छै, वही जीततै.....बसन्त काका कहै छै—हद होय गेलै, अबकी मुखिया वही जात के आदमी बनतै, जेकरोँ जनसंख्या बढी-चढी केँ छै, अबकी आदमी केँ नैं, जातोँ केँ वोट पड़तै.....अच्छे होलै, जे विधाता खाड़ोँ नैं भेलै, नैं तेँ ओकरोँ गोतियो मिलाय बीस घोर सें की होतियै.....नैं-नैं, एक अच्छा आदमी लेँ एक जात, एक टोला नैं—सौँसे गाँव, सौँसे दुनिया होय छै....दुख तेँ यही छै कि अच्छा आदमी कोय खतरा उठाय लेँ कम तैयार होय छै, साधु-सन्यासी बनी जाय छै, नैं तेँ ई दुनिया एत्तेँ खराब नैं होतियै, जत्तेँ होय गेलोँ छै.....विधाता लेँ एक जरा बात कोय की उठाय देलकै कि ऊ गामे छोड़ी केँ चललोँ गेलै.....गाछोँ के ढेर सिनी बात जानै लेँ, सच बात तेँ

यही छेकै कि एत्ते बड़ों दोष के विधाता सहै नैं पारलकै.....आखिर ई गामों के की होलो जाय रहलो छै.....विधाता के गाँव से नैं जाना चाहियो, कभियो नैं, कोय कीमतो पर नैं.....ओकरो जाय के मतलब छेकै कि ओकरा हमरहौ सिनी पर भरोसा नैं रही गेलै.....से बात नैं छै, ओकरो दिमाग, योजना, आरो बात के ठीक से कोय समझैवाला छै ते दीपा आरो दीपा परीक्षा दै ले शहर चल्ली गेलो छै । तोहें देखियौ, दीपा के लौटतैं-लौटतैं विधाताहौ गाँव लौटी ऐतै । लब्बों-लब्बों ज्ञान पावी आरो तबे देखियौ—है जे विन्डोवों विधाता के विपच्छों में बही रहलो छै नी, वही ओकरो ले शीतल बयार बनी जैतै । दोनो के आवै ले ते दौ.....वसन्त काका, विधाता जत्ते गुमसुम रहै वाला रहौ, संकल्पो के बड़ी पकिया आदमी छेकै । एकदम बापो के पानी लै के जनमलो छै.....दूसरो दलसिंह बाबु ।” जत्ते लोग, ओत्ते बात । मजकि एतना बात ते जरुरे छेलै कि सबके ई बुझावै कि कोय गाँव से चल्लो गेलो छै—अनचोके गाँव के एकदम सूनों करी के । ऊ रहै छेलै ते कम-से-कम साँझ के संगीतमय जरुरे करी दै । चाहे खेत से लौटतैं रहे कि नदी दिश से, विधाता के वही जानलो-पहचानलो गीत जरुरे बारी-बहियारी पार करी के टोला-टोला में पसरी जाय,

मैय्यो तोरा बरजो गे लिलिया बापो तोरा समझावौ रे जान
जान छोड़ी रे देहें, मोहना करो संगतियो रे जान
आबे शाम होहें सब्भे के कान के एक्के भ्रम हुए लागै छै, जेना
बान्ही-बहियारी के रास्ता से चल्लो आवी रहलो विधाता के सुर गूजे लागलो
छै आरो सुनवैय्या के मुँहों से अनचोके बोल फुटी पड़ै छै,
जनमो मोरा जैतै गे मैय्यो, परनमो मोरा जैतै रे जान
जान तैहियो नैं छोड़वै मोहना करो पीरितियो रे जान ।

दीपा आपनो जिनगी में कभियो एत्ते खुशी के अनुभव नैं करले होतै,
जेन्हो आय । ओकरा हेने बुझाय रहलो छेलै, जेना ऊ खुददे सरोवर बनी गेलो
रहै, जेकरो किनारी में बैठी दीपा कंकड़ मारी-मारी पानी के थिर नैं हुए दै ।

एक भँवर अभी खतम होते-होते बचै कि वैँ दुसरो कंकड़ी मारी दै आरो फेनू वही, होने भँवर । ठीक वहे रँ होय गेलो छै दीपा, विधाता के चिट्ठी पावी....
.....बार-बार ओकरा कुछ भ्रम होय जाय छै आरो वैँ बार-बार चिट्ठी के बायाँ दिश लिखलो स्थान के पढ़ै छै । हों हजारियेबाग सँ लिखलो गेलो छै । एक पल वास्तें ऊ आँख मुनी कुछ सोचै छै, फेनू लिफाफा खोली उकड़ू बैठी के पढ़वो शुरू करी दै छै,

2-10-

दीपा

ई चिट्ठी हम्मैं आठ रोज पहिनें लिखतियौं, हजारीबाग पहुँचतैं । मतरकि यहें गुनै में चिट्ठी नैं लिखे पारलियौं कि आखिर तोरो नाम के आगू कौन विशेषण लिखौं, प्यारी, सुकुमारी, साथी, की-की ? फेनू नाम के नीचें की लिखौं स्नेह, आशीष, प्यार, की-की ? यहें फैसला नैं लिऐ पारै में आठ रोज उधेड़बुन में गुजरी गेलै । आरो आय बिना कोय विशेषणे के तोरा चिट्ठी लिखी रहलो छियौं, तोरा जे अच्छा लागौं, आपने सँ आगू-पीछू विशेषण जोड़ी लियाई हमरो चुप्पी के आवाज दै नाँखि होतै ।

तोहें गाँव के छोड़ी देलौ । हों, एकरा छोड़वे कहतै, पन्द्रह रोज के बात कही के डेड़हो महीना सँ जादा गायब होय जैवो—की कहलो जैतै ?..... पहिलो दाफी जानलियै कि भीड़ों में रहतैं औ आदमी कभी-कभी आपनो एक साथी बिना कत्तें असकल्लो होय जाय छै.....आरो फेनू हम्मैं भीड़ों सँ भागी ऐलौं, यहाँ हजारीबाग । सोचले ते यहें छेलियै कि तोरूहौ यहाँ आवै ले खबर करी दीयौं.....जंगल घूमी-घूमी, जंगल के व्यथा-हास सुनना छै.....हम्मैं तभियो ई बात जानै छेलियै आरो आय ते ई बात मालूमे होय रहलो छै कि तोरो बगैर है गाछो-बिरिछ आपनो सुख-दुख के कथो मौन खोली के नैं कहै वाला छै । बस ओकरो मौन सँ ही हम्मैं जे कुछ समझे पारी रहलो छियै, वही बहुतआरो चलतें-चलतें वहाँ भी पहुँची जाय छियै, जे जंगलविहीन बनी गेलो छैदीपा, तोहें हमरो साथ होतियौ ते देखतियौ—आपनो पठारी इलाका के फैललो जंगल के दुर्दशा । जेना कसाय नैं बकरी-पाठी के देहो सँ खलरी उतारै छै, होने के गाछ सिनी उतारी के पहाड़-पठार के नांगटो करी देने छै । गंजा सिरो पर कुछ बाल नाँखि कुछ गाछ । एकरा सँ जादा कुछ नैं कहलो जावै सके आरो कांही-कांही लगैलो नया-नया गाछ, जानै छै केन्हो लागै छै, जेन्हो मुड़ैलो माथो सँ नीचें कपारो पर सुनहरो रँगो के रोंआ सिनी आरो वहू है नवजात गाछी पर तनलो जंगलखोर के औजार.....यहाँ आवी के देखवौ गाड़ी के

गाड़ी, सवो गाछ के लहास ढोतें—सड़को पर जैतौ । जगह-जगह जंगल काटै के कारखाना आरो कारखाना में गाछों के क्षत-विक्षत लाशों के पहाड़.....केकरो आँखों में आंसू नैं । केकरो कोय ममता नैं.....सलाम साहब नैं आपनो गाड़ी सें हमरा बिहार-बंगाल के उजाड़ जंगल के देखेनं छेलै.....बस सड़क के किनारी-किनारी कुछ पेड़ आरो दूर-दूर ताँय कटलो पेड़ के जंगल, जेना आँखी के किनारी-किनारी पिपनी बची गेलो रहे, मतरकि भौंह नोची देलो गेलो रहे । भयानक लागै छै नी, सौन्दर्यहीन ? होने आबे लागे लागलो छै ई बिहार-बंगाल के उजाड़ जंगल.....यातायात के व्यवस्थों जंगल के की कम नष्ट करी रहलो छै ? एक सड़क जखनी दूर के शहर सें जोड़े ले बने छै, तखनी जानै छौ, कत्ते बड़ो जंगल बीचे-बीचे खतम होतै रहै छै । ई देखना छौं तें ई आपनो इलाका आवी के देखौ.....समझै में नैं आवै छै, जखनी ओतना बड़ो-बड़ो बांध बनैलो गेलो होतै, तखनी कत्ते-कत्ते बड़ो जंगल खतम होय गेलो होतै । लाखो पेड़ एकरो पेटो में तें गेले होतै; फेनू आबादी के बसावै में जंगल के सीना छीललो गेलो होतै । हरा-भरा जंगल के है उजाड़ प्रदेश हेने होय गेलो छै कि देखतैं आँख डबडबाय जैथौं । राँची-हजारीबाग के ई पठार, जे कभियो जेठो में हिमालय प्रदेश के आनन्द देतै होतै, आबे तें शिशिर के हकारो देतै मौसम में भी जाड़ा के अनुभव नैं भै रहलो छै, यहे कारण छै कि यहाँकरो लोगो में शायत शीतलता के अभाव बने लागलो छै.....धूल, धुआँ, धूप नैं आदमी में गुस्सा, बौखलाहट, आतंक, हत्या के भाव भरे लागलो छै.....आय यहाँ आदमी में असन्तोष छै—कभियो नैं खतम होय वाला असन्तोष । की यहाँकरो लोग कभियो ई सोचे पारतै, आखिर ओकरो असन्तोष के पीछू के कारण की छेकै ? आय यहाँ आदमी के पास एत्ते सुख-समृद्धि होला के बादो शांति नैं छै, घुटन छै, ईर्ष्या छै, अपनत्व नैं छै । हमरा ताज्जुब लागै छै, भूमि सें भूमि के अलग करै वास्तें यहाँकरो लोग जुलूस निकाली रहलो छै, सड़क बंद करी रहलो छै, हत्यो करी रहलो छै, मतरकि ओकरो जंगल कटी रहलो छै, ओकरो हृदय निकाललो जाय रहलो छै, जेकरा सें ऊ जिन्दा छै, ई बातों के केकरौ चिन्ता नैं छै । यहाँकरो नेतां समृद्धि के मूल स्रोत के प्रति लोगो के उदासीन करी के स्थिति के भयावहता सें ऊ सब के उदासीन करी देने छै आरो आपनो व्यक्तिगत लाभ-क्षेम वास्तें यहाँकरो संस्कृति, यहाँकरो भौगोलिक पहचान खतम करी रहलो छै । आबे समझै में आवै छै कि मजाके-मजाक में कहलो गेलो वसन्त का के बातों में कत्ते दुख, कत्ते व्यंग्य छेलै—भोला नैं विराजतै झारखंड में, बसतै आबे झरिया-खान में ना ।

अभी ते दू-तीन महीना हेने यायावरी करै के मोँन छै । फेनू एक संगठन बनाय के वन-संरक्षण वास्ते कुछ करै के मौन छै । घरों के कुछ चिन्ता नै छै । काका परिवार सहित चम्पारण से आवी गेलो छेलै, जखनी हम्मैं घोर छोड़लें छेलियै । हुनी धनकटनिये तक नै, चैताहो अबकी कटैय्ये के जैतै । जों ई बीचों में तोहें गाँव लौटी जा ते गाँव भरी के संवाद जरूरे दिहौ । जब ताँय दोसरो पता नै भेजी दियौ, हमरो पता छेकै—विधाता, मारफत, अमरेश चन्द्र घोष/बरकाकाना, हजारीबाग, बिहार ।

तोहें कहै छेलौ नी कि रुपसा भरी में हमरो घरों के ऐंगन हेनो केकरो बड़ो ऐंगन नै छै, आय वही ऐंगन भर तोरा हमरो प्यार ।

विधाता

१७

दीपा के पत्र विधाता लेली
अभिन्न

1-11-

तोरो चिट्ठी बीस रोजों के बाद घुमते-घुमते कल जयपुर में मिललौ । असल में परीक्षा खतम होला के बाद सब लड़की टूर के प्रोग्राम बनैलके आरो हमरासिनी आपनो प्रोफेसर प्रियव्रत पातंजलि साथें जयपुर चल्लो ऐलियै । यहाँ हमरा सिनी प्रोफेसर साहब के दोस्त सदाशिव झुनझुनवाला के हवेली में ठहरलो छियै, तोहें जों पता से चिट्ठी देले छेलौ, फूफा ऊ पता काटी के चिट्ठी हमरा ई पता पर भेजी देले छेलै.....तोहें गामो से बाहर छो, एको जानकारी हमरा कमरुद्दीन दां चिट्ठी से देने छेलै । हमरो पता तोरा हुनके से मिललो होथो, ढेर इन्तजार के बादो तोरो नै ऐला पर हम्मैं आपनो पता ऐते-ऐते हुनके पास छोड़ी ऐलो छेलियै । खैर.....तोहें आयकल हजारीबाग में छो, ई हम्मैं तोरो चिट्ठिये से जाने पारलौ । तोहें चिट्ठी के ओरिये में हमरा से कुछ पूछले छौ आरो फेनू चिट्ठी के आखरी में जवाबो दै देले छौ, जेकरा एत्ते-एत्ते प्यार दै ले कोय तैयार रहे, ते पावैवाला अभिन्न ही हुऐ पारे ? ऐंगन भरी ते की, तोरो एक मुट्ठी प्यार ही हमरो ई जिनगी वास्ते कम नै छै । ओत्ते-ओत्ते सौभाग्य आखिर हम्मैं आपनो कोन अंचरा में बान्ही राखवै ?

तोहें सोचते होवौ, हम्मैं झुट्टी छियै । बोललो छेलियै, पनरहे दिनों में आवी जैबै आरो दुओ महीना बीतै पर छै । कत्ते विवश होय गेलो छेलियै हम्मैं, तोहें नैं जानभौ । प्रोफेसर साहब के पत्नी प्रभा दी जिद् पर अड़ी गेलै, 'दीपा नैं जैतै ते हम्मू नैं जैवै' । आबे प्रभा दी नैं जैतियै ते प्रोफेसर साहबो नैं जैतियै आरो जों हुनी नैं जैतियै ते सब लड़की के किंछा टुटतियै । ओत्ते-ओत्ते आदमी के निराश करना की ठीक होतियै ? हमरा यहाँ आवै ले लागलै । एकरो जानकारी हम्मैं नानियो के भेजी देले छेलियै, तोरा बताय दै ले ।

यहाँ सब खुश छै, बहुत खुश । हमरौ खुश रहै ले लागै छै । जेन्हो देश, तेन्हो भेष । पर मन तोरे साथ छौ—आबे वहाँकरो जंगल में भटकते । तोरो साथ ।

.....होना के, यहाँ जाड़ा उतरल्लै—कोन-कोन देशों सें उड़ी-उड़ी के कोन-कोन रँ के चिड़ियाँ आवी रहलो छै । जंगल-झील, ऊ चिड़ियाँ सिनी सें भरे लागलो छै आरो देश भरी सें ऐलो देखवैयो सिनी के भीड़ जुटी गेलो छै.....स्वर्ग बनी रहलो छै एखनी आपनो देश के ई माँटी । लेकिन हमरा ले जेहना सब सूना ।

होन्हौ के राजस्थान बड़ी शुष्क स्थान छै । एकाध मौसम के हटाय दौ आरो दू-चार जग्घो के, ते बड़ी उजाड़ प्रान्त ही लागै छै राजस्थान,

सोनो लेने पिहु गया, सूनो कर गयो देश

सोनो मिला न, पिहु मिला, चाँदी हो गयो केश

ई जेना सौंसे ठो राजस्थान के ही दर्द छेकै । नैं जानौ कोन कवि नैं ई प्रान्त के समुच्चा दर्द के एक दोहा में बान्ही के राखी देने छै । दूर-दूर ताँय रेगिस्तान-रेगिस्तान । एक बून्द ले व्याकुल धरती । हरियाली के कांही ठौर-ठिकानो नैं.....एकरो छाती में सुरँग बनैलो जाय रहलो छै—खनिज-सम्पत्ति के निकालै ले । हम्मैं नैं समझे पारी रहलो छियै कि जबे खूब गर्मी अन्धड़-विन्डोबो बहते होतै, ते ई मीरा आरो महाराणा प्रताप के भूमि के दुख कत्ते बढ़ी जैते होतै । जोधपुर, जयपुर, उदयपुर में पत्थर-खदान आरो बाड़मेर में खड़िया पत्थर के खदाने सिनी सें ते ई सब जग्घो के बचलो-खुचलो हरियाली मिटी रहलो छै.....तोहें यहें बातों सें अनुमान लगावै सकै छै कि राजस्थान में खनन वास्ते पट्टा पर जे जमीन देलो गेलो छेलै, वै में खाली उन्नीस सौ सत्तर सें छियत्तर के बीचों में छियासी प्रतिशत के वृद्धि भै गेलो छै । सुरसा के मूँ बढ़ले जाय रहलो छै आरो सरकार-संसार के लोभो ओतन्हें । आय राजस्थान सें पचासो रँ के खनिज खोदी के निकाललो जाय रहलो छै.....एक दिन एकरो की

परिणाम होते, सरकार के ई बातों से कोय मतलब नै छै.....पर्यावरण ते एहें खराब होलो जाय रहलो छै कि बतान्हें मुश्किल.....लोग मीरा आरो महाराणा के भूमि छोड़ी-छोड़ी व्यापार आरो नौकरी के खोज में देश के दुसरो-दुसरो हिस्सा में बसी गेलो छै, शायत घूरी के देखौ ले आवै छै की नै, रही-रही ठोरो पर यही पंक्ति घूरी आवै छै,

सोनो लेने पिहु गया सूनो कर गया देश

की सचमुच में पिया लौटी के ऐतै ? ई धरती के मोन हरियैतै ? के कहे पारे । मतरकि ई जग्घो से जबे आपनो गाँव लौटवै ते एक बहुत बड़ो संकल्प ले के । जानै छौ, बीकानेर में एक गाँव छै—मीनासर । यहाँ राखी-बंधन के दिन खाली बहिनिये भाय के राखी नै बांधै छै, भैय्यो भाय के बांधै छै । जानै छौ कथी ले ? ताकि एक-दुसरा के रक्षा के साथे-साथ पर्यावरण आरो चारागाह के रक्षा मिली-जुली के करे सकै । ई गाँववासी हर महिना के बारह तारीख के दिन भरी के काम-काजो के बाद रात के रामराज चौक पर जुटे छै आरो मशाल-जुलूस के शक्ल में मुरली मनोहर-मंदिर तक जाय छै । रास्ते में गोचर-रक्षा के नाराहो दुहरैते जाय छै, लोगें यहू बतलैलकै कि हर साल राखी-बंधन रो दिन मीनासर में एकरे एगो वार्षिक समारोह मनैलो जाय छै । भोरे-भोर लोग गोचर के पौधशाला में काम करै छै आरो शाम सात बजे सौंसे गाँव में गोचर-रक्षा के स्मृति में पाँच मिनट ताँय ताली के आवाज गूँजते रहै छै । गाँववासी गोचर आरो पर्यावरण के रक्षा लेली दीये नै जलावै छै, मजकि गंगाजल में दूध मिलाय के मीलो-मील ताँय फैललो गोचर के सब्भे रँ के बाधा से मुक्ति लेली रेखा से घेरै छै, की हमरा दोनों मिली के आपनो गाँव में हेने संकल्प वास्ते आपनो गाँववासी के तैयार नै करे पारो । तोरा जानी के अचरज होतौ कि एत्ते बड़ो आन्दोलन के खड़ा करैवाला मीनासर के एक किसान छेलै । साठ साल के किसान नारायण माली.....हुनका पता चललै कि दस-बारह किलोमीटर दूर फलाना जग्घो में लिगनाइट से चलैवाला बिजली-घर खुलै वाला छै, यहीं से ओकरो रास्ता में पड़ैवाला मीनासर के गोचर के कीमत कुछे सालो में करोड़ो के भै जैतै आरो यही लेली ऊ गोचर पर अधिकार जमाय के ख्यालो से एक मातवरें वै पर बाड़ा लगाना शुरू करले छै । पन्द्रह हजार सफेदा के गाछो लगवाय के योजना शुरू करी देलकै, ताकि गाछ बढ़हैं गोचर पर ऊ मातवर के अधिकार बनी जाय । ई बात नारायण माली के समझते देर नै लागलो छेलै । हुनी लोगो के एकरो विरुद्ध तैयार करना शुरू करलकै । गाँववासी शुरू-शुरू में ध्यान नै दे, पर बादो में बड़के सिनी लोग नारायण माली के साथ होय गेलै । ग्यारह अगस्त उन्नीस सौ चौरासी के

मुरली मनोहर-मंदिर में ही सब लोग इकट्ठा होलै आरो सोलह अगस्त चौरासी के ई जनान्दोलन के समक्ष पुलिस आरो प्रशासन के झुकै ले पड़लै छेलै । सफेदा के गाछ उखाड़ी के फेंकी देलै गेलै छेलै.....ऊ दिन राखी-बंधन के दिन छेलै, यही सँ राखी भाय-बहिन के रक्षा साथे-साथ पर्यावरण आरो गोचर-रक्षा के भी दिन बनी गेलै । हममें मीनासर जाय के ऊ अद्भुत लोगो सँ मिललियै, जौनें खाली छौ दिनों में एत्ते बड़ो इतिहास गढ़ी देनै छेलै.....हमरो वास्ते ते राजस्थान के ई यात्रा जेना संकल्प के यात्रा बनी गेली छै । कभी कौन संकल्प करी बैठै छियै, कभी कौन आरो कभी कौन । तोरो साथ आरो विश्वास नै हमरा कहो कत्ते बौराय देलै छै । मतरकि खाली संकल्पे सँ की होतै, ई संकल्प के तोरो वाला कर्म चाहियो, बिना कर्म के इच्छा की ? हर बार हमरा यहँ लागलौ छै कि तोहें हमरो इच्छा के पूर्णता छेकौ । यहीं सँ सोचें पारो कि तोहें हमरा ले कत्ते जरूरी छौ । की तहँ हेने नै महसूस करै छौ ?

तोर्हे
दीपा

१८

विधाता आपनो आँख मुनी लै छै आरो आपनो सबटा ध्यान वही रूप-स्वरूप पर केन्द्रित करी के ओकरा सम्पूर्ण रूप सँ देखै ले चाहै छै । अजगुत रूप छै, पराग के वस्त्र पिन्हनै, दखनाही हवा के चाल में कोय दस कदम ओकरे दिश आवी के रुकी जाय छै । जूड़ा में माधवी के फूल गुँथलो, कखनियो फुल्लो कचनार के पीछू छुपी जाय छै । वही सँ आवाज आवै छै कोकिल के पंचम राग । विधाता आरो ध्यान लगाय के पहचानै के कोशिश करै छै, आखिर ई आवाज केकरो छेकै । कोयल के ? ते ऊ सुन्दरी कहाँ गेलै जे अभी-अभी ओकरो दिश बढ़ी रहलौ छेलै । की वही कचनारी के पीछू छुपी गेली छै । विधाता आँख खोली के देखै छै, वहाँ कचनार के गाछ नै छै, एगो चन्दन के गाछ छै । एकदम महमह । ओकरा लागै छै, जेना चन्दन के सौंसे गंध ओकरो रोआं-रोआं में समैलो जाय रहलौ छै.....वै फेनू आँख फाड़ी के निरयासै छै । अजगुत, एकदम अजगुत । ऊ चन्दन की भेलै । वहाँ ते लाल, नीला आरो सोनाली रँग के अशोक गाछ उगी

ऐलोँ छै । कामदेव के तीन अचूक वाण, तीन लोक के बान्हैवाला.....नैं ओकरा भ्रम नैं होय रहलोँ छै, आखिर ऊ गाछ की भेलै । विधाता आँख मुनी लै छै । वही चंदन के खुशबू, एकदम नगीच । नगीच सें नगीच । फेनू ओकरो लागै छै, ऊ खुद्दे चन्दन के गाछ बनी गेलोँ छै । ओकरोँ कानी में सुग्गा, मैना, पपीहा, हारिल के आवाज गूँजै छै आरो ओकरा लागतें रहै छै, जेना कोय कानोँ में 'हुआ' कही केँ खिलखिलाय केँ हाँसी पड़लोँ छै—बिना रुकले । एक साँस, कत्तें देर । के छेकै ई, है रँ हाँसैवाली ? ई तेँ दीपा छेकै । अरे दीपा ! दीपा !! दीपा !!!

आय सें नैं, पाँच रोजोँ सें विधाता के हेने लागी रहलोँ छै । हेने लागै छै । हेनोँ सपना आखिर कैन्हें । कभियो तेँ हेनोँ सपना नैं आवै छेलै । ई वृक्ष, ई फूल, ई पंक्षी, कभियो तेँ आँखी में है रँ नैं नाँचै छेलै.....मतरकि नैं, दीपा भले चन्दन, पपीहा, कचनार रहेँ, ओकरा तेँ बस यही सें मतलब होना चाहियोँ कि हमरोँ ई गाँव, हमरोँ ई समाज, हमरोँ ई देश—वहेँ सुगंध, रूप, रस संगीत सें भरेँ सकेँ—जे चीजोँ सें दीपां विधाता के जिनगी केँ भरी देलेँ छै । मतरकि दीपा बिना की है हुएँ पारतै । हरगिज नैं । यही लेँ हर वक्त विधाता के मन दीपा के साथ चाहै छै, दीपा संग डेग-डेग चलै छै । जेना दीपे विधाता के आँख, दिमाग, हाथ, पाँव, हृदय रहेँ—ओकरोँ वास्तें स्वर्ग । ओकरा सें बढ़ी केँ कोय नैं । विधाता सोचै छै, ओकरा है की होय गेलोँ छै, जेना कोय जादू के डोरी सें बन्हाय केँ रही गेलोँ रहेँ ।

१६

दीपा आरो विधाता के निकली गेला के बाद, रुपसा गाँव के जना भाग्ये भंगटी गेलोँ रहेँ । सबके मुहोँ पर घुमाय-फिराय केँ एक्के बात.....एत्तेँ बड़ोँ आबादी के एत्तेँ बड़ोँ गाँव में मुट्ठी भरी लोगें एत्तेँ बड़ोँ कुचक्र रची रहलोँ छै आरो हमरा सिनी चुप छियै.....बैर भाव के करेँ ? यही डरें नी ? पर कल जखनी यही मुट्ठी भरी लोगें सौंसे रुपसा केँ मुकियैतै, तखनी ? तखनी तेँ आपनो घरो में शरण नैं मिलै वाला छै, हों.....हमरा सब मालूम छै । हमरै नैं, केकरा ई मालूम नैं हुएँ लागलोँ छै कि शनिचरा के कान्हा पर बन्दूक राखी केँ के नुकी-छिपी गोली छोड़ी रहलोँ छै.....दिखाय पड़ी रहलोँ छै खाली

शनिच्चर । केकरी आँख छै ते देखौ, शनिचर के पीछू-पीछू छुपलो सोराजी चौधरी, भैरो चौधरी, सुधीर घोष आरो अरविन्द दत्ता के । अरे मुँहो पर करखी लेपी लेला सें नाक-ठोर-मूँ नैं बदली जाय छै.....शनिचर के की । अरे ई सिनी ते छौड़ा-नौड़ा छेकै । एकदम कच्चा माँटी । थोपी-थोपी के जोंन रूप दै दौ, वही बनी जैहैं । पर जेकरो वयस होय चललै, ओकरा की चाहियो ?.....तबे दस ठो गाँव के छौड़ा के बरगलाय के जोंन चाल आनन्दी बाबू, बिरजू का, चमोकन चौधरी आरो सनातनी मेहता चली रहलो छै, ओकरा हम्मैं जीते जी नैं हुऐ ले देवै.....रुपसा रो आपनो संस्कृति रहलो छै, आपनो कहानी । ई इलाकै भरी के नैं, सौंसे देश के ही यें पढ़लो-लिखलो आदमी देने छै, ओकरा हेन्हें के धूल में थोड़े मिलै ले देवै.....सोचै छै, आग लगाय देवै, अरे एकरो पहिलें हम्मैं घोर-घोर, गल्ली-गल्ली में नद्दी बहाय देवै नद्दी, आरो तबे देखवै कि ई सिनी गाँव में केना के आग लगाय छै.....लंका बनाय ले चाहै छै आरो यहाँकरो लोगो के राकस । नैं होतै, नैं.....तबे आग लगौं पारै, जों विभीषण घरे में बैठलो-बैठलो राम-नाम जपतें रहतै । सब विभीषण के चौक-चौराहा पर आवै ले लागे । विरोध करै ले, लड़ै ले, केन्हें कि अबकि राक्षस हनुमान के भेषो में आपने सोना के लंका में आग लगाय ले तैयार छैई रवि चक्रवर्ती, गंगा राव, जोगी, खुशीलाल आकि प्रसून लताते सें ही की होयवाला छै; अकवाली सिंह, भुमेश्वर पांडे, दर्शन ओझा, हाकिम यादव, सब के सामना आवै ले लागतै । ई गाँव के मरजाद के सवाल छेकै, गाँव के मरजाद, माय के मरजाद छेकै, जेकरा जोगना गाँव भरी के कर्तव्य बनै छै । ई एक आदमी के सवाल नैं छेकै”.....बरसो पहिलें मुखियागिरी छोड़ै वाला शिवचरण पांडे वसन्त चौधरी के साथ लेने, आय बीस रोजो सें रुपसा गाँव के टोला-टोला जाय के सबसैं यही कहले फुरी रहलो छै ।

कोय दबलो आरो कोय मुँह खोली के शिवचरण पांडे के पक्षो में छै । खेत-खलिहान आरो चौपाल में आवे एक्के चर्चा चलै छेलै.....गाँव के कोय जों गाँव लेली घाती बनी जाय छै, ते ओकरो साथें सबके कुलघाती नैं बनै ले देलो जैतै.....अरे शनिचर ते खाली गुरो के मुँह छेकै । पीव कहाँ-कहाँ छुपलो छै, ऊ ते हम्मैं नी जानै छियै.....शनिच्चर नेक बात मानतियै ते हमरै सिनी मुखिया चुनी लेतियै । पर रावणो के विभीषणे के बात सुहैलो छै । ओकरो सभा में जेन्हो-जेन्हो राकस जुटलो छै, वैं रावण रो दसो मुड़ी कटवाय के रहतै । राजनीति में पारंगत होलै सें की, जबे आपनो बुद्धिये नैं । रावणें ते वेद पढ़लो पंडित छेलै । जे बुद्धि टोला-टोला के पढ़लका बाबू नैं लगैने छै, ऊ

फलीभूत नैं हुवै वाला छै, हों.....एक दीपा नैं छै, यही नी.....चौधरी घरों के पुतोहू आरो गाँव भरी के बेटी, मीरा बेटी गाँव-गाँव घूमी केँ जोर-जनानी केँ तैयार करी रहलौ छै—गंगा पार के सवासिन छेकी, साँच वास्ते जानो केँ कुछ नैं बुझै वाली..... आखिर परिवारों के गुण तेँ मनोँ पर पड़नै छै । की-की रँ विधाता के पक्ष लै-लै केँ बोली रहलौ छै, जेना अपने टा दियोर रहेखबर मिललौ छै कि विधातौ दस-बीस रोजों में गाँव पहुँचै वाला छै । अनिरुद्धें चिट्ठी लिखनें छै.....कहै छै हजारीबाग में कोय संगठन बनैलेँ छै विधातां । यहू मालूम होलौ छै जबेँ कोय गाछ काटै छै तेँ ओकरोँ संगठन के लोग गाछी सें चिपकी जाय छै । कहै छै पहलें हमरा काटोँ, तबेँ गाछ । कहै छै नी, होनहार विरवान के होत चिकने पात.....बच्चे सें गाछ-बिरिछ के प्रति विधाता केँ कत्तेँ मोह रहलौ छै । आपने बारी के झबरलौँ आमी के गाछ केँ जबेँ दलसिंह बाबूँ कटवाय देनें छेलै, तेँ यही विधातां तीन रोज खैवों-पीवों छोड़ी देनें छेलै । केकरो मनैला सें नैं मानै, जेना देवता रुसी गेलौँ रहे हो बाबू.....आय वही विधाता केँ देखौ—गाछी सें सट्टी जाय छै, गर्दन कटै तेँ कटै, गाछ नैं कटैतै..आखिर बीर षष्ठी के दिन जनम होलौँ छै नी.....दिन-नक्षत्र के असर तेँ जन्मोँ पर पड़वे नी करै छै.....देखौँ आभी मुखिया के चुनावों में ढेर दिन छै, मुखिया के होतै, के नैं आरो एखनिये सें घरउजाड़ू सिनी के गाल देखौ, केन्होँ बाजी रहलौँ छै.....जंगल में बेघर सबका लबबों घर उठेगा, पुराना गाछ गिरेगा । सफेदा लगेगा.....हिनका सिनी सफेदा नैं, गाँवभरी के मुंहोँ पर चूना लगाय लेँ चाहै छै, चूना । हों ।

२०

धीरें-धीरें तीन कोना गाँमोँ के एकमत हुएँ लागलौँ छै । मुखिया सुखिया के बात तेँ जावें दौ, गाछ के एक डार कटलै तेँ कटवैय्या के हाथ-गोड़ काटी केँ राखी देलौँ जैतै.....ई बात के भनक शनिचरौ के कानो तक पहुंचलौँ छै आरो ई बातों के बड़ी गुस्सा छै कि जे बात एखनी नैं बोलै के छेलै, वही सिनी बात ओकरे आदमी बोलना शुरू करी देनें छेलै.....गाँव में एत्तेँ बड़ों मत ओकरोँ विरुद्ध देखतै-देखतै बनी गेलै, हेन्हें ? ई सब भैरो का, गोपी

का, आरनी के सुआरथ सें.....शनिचरा मनेमन सोचै छै, पर बोलै छै कुछुवे नैं, कैन्हें कि ओकरा मालूम छै—चुनाव में जों जीत के आस छै तेँ हिनकै सिनी के कारण, नैं तेँ हमरे गोतिया में कै ठो छै, जे हमरा वोट मनो सें दै वाला छै ? जे देतै डरहे सें आकि लाभे सोची केँतहियो शनिचरें दबले जुबान सें सही, सोराजी चौधरी आरो गोपी घोष केँ कही ऐलोँ छै, “कोय हेनोँ बात एखनी नैं बोलाय जाय कि हमरोँ जड़े कटी जाय । तोरासिनी के की बिगड़तौँ । पानी रँ बहैलोँ अब तक हमरोँ बीसो हजार टका, ठिक्के में पानी में बही जैतोँ ।”

गाँव के नया माहोल सें कहीं शनिचर घबड़ावेँ नैं, यही लेँ पहिलोँ दाफी गोपी घोष आरो शेखावत सिंह नैं गाँव के गल्ली-कुच्ची में बच्चा-बुतरू सें नारा लगवैनें छै, “शनिचर चाचा मत घबड़ाना, तुम्हारे पीछे सारा जमाना..... शनिचर चाचा से जो टकराएगा, चूर-चूर हो जायेगा.....कैसे रुपसा सुखिया हो ? जब शनिचर चाचा मुखिया हो ।”.....एकवाली यादव नैं यै नारा पर आपनोँ गोस्सा झाड़तें शनिचर-पक्षोँ के आदमी केँ खुल्लम-खुल्ला सुनैतें कहलें फुरै छै—“लेमनचूस दै केँ नारा लगवैला सें की होय जाय छै । आबेँ तेँ टाकाहो खोलला पर ओकरोँ असर घंटे भरी रहै छै, ई तेँ लेमनचुसे छेकै । एकवाली यादव के जीत्तोँ रहतैं नैं गोपी के कोय चाल चलैवाला छै, नैं सोराजी के, नैं शनिचर के ।”

कोय मुँह पर बोलै-नैं-बोलै, भैरो चौधरी के पक्षोँ के सब्भे आदमी यहें बोली रहलोँ छेलै, “अरे समझै नैं छौ, ई विधाता के पक्षोँ में यै लेली बोली रहलोँ छै कि शनिचर बदला में हम्मैं मुखिया बनौँ ।” पर अकवाली यादव तेँ ई सरकारी पंचायत के खुद्दे विरोधी छेकै । कहै छै, “अरे गाँव के पाँच-छोँ बुजुर्ग जे पंचायत करतें ऐलोँ छै, ओकरा सें बड़ोँ ईमानदार हुएँ पारेँ ई सरकारी पंचायत । जबेँ सरकारिये होय गेलै तेँ ईमानदार की.....है सब जे मुखिया-सरपंच बनै छै, सब गाँव केँ खोटी-खोटी खाय लेँसब कान खोली केँ सुनी लौ, ई गाँव केकरो कमैलोँ सम्पत नैं छेकै कि उलाय-पकाय केँ निगली जैतै, हों । विधातौ आवी रहलोँ छै.....सौँसे गाँव के प्रमुख आदमी बैठौ आरो तसपिया करौ..... हमरोँ गाँव के पंचायत होन्हैं चलतै, जेना पुरखा चलैनें ऐलोँ छै, नैं कि भंगेड़ी-गंजेड़ी आकि पियक्कड़ के इशारा पर ?”

सब्भैं कहै छै, “एकवाली यादव के मिजाज सें गाँव भरी परिचित छै । एकवाली यादव एकबोली यादव छेकै ।” एकबार जे बात बोली देलकै, ऊ सोचोँ ब्रह्म के लकीर, ब्रह्मों नैं मेंटेँ पारेँ । सब केँ शंका छै कि मुखिया के चुनाव हुएँ पारतै कि नैं । मरड़ घरोँ के लोग कुछुवे नैं बोली रहलोँ छै । एत्तेँ बड़ोँ चुनाव

होय रहलौ छै । मरड़ घरौ के लोगौ के बोलना जरूरी—पक्षौ में बोलौ कि विपक्षौ में । हालांकि दुसाध टोली के एकेक लोग एकबाली यादव के साथ छै । जेकरा देखौ वही बोलै छै.....आखिर है चानन-पट्टी में एत्ते सिनी गुलगुलिया लोगौ के बसाय के की मतलब ? सब के मालूम छै । चुनाव में भाँगटो लानै ले आनलो गेलो छै, हों भाँगटो.....यै सिनी है में सफेदा रोपी रहलो छै, ई सफेदा नैं, विष रोपी रहलो छै.....ई इडियो-बीडियो के की हक छै कि हमरो घरौ में रोपे, विष । मरड़ घर बोलें नैं बोलें, एकबाली काका बोली रहलो छै, ते हमरासिनी मुड़ियो कटाय देवै ई गाँव के रक्षा ले.....

निरगुनिया पंडित अलगे सबसँ कहलें फुरै छै, “ई दुसाध टोला के बात छेकौ भाय, एकबार उमताय गेलौ ते बस समझें—दुःसाध, जेकरा वश में करना, साधना एकदम मुश्किल, तबे शनिचरा आरो परफुलवा की करे पारतौ । दोनो लंगोटिया माथो धुनी मरतौ”

गाँव में रँग-बिरँग के आदमी के आना-जाना शुरू भै गेलो छेलै । कोय गोड़ सँ लैके माथो ताँय खादी में, ते कोय फुलपैट-कमीज में । कोय माथो पर गमछा बान्हलें, ते कोय खाली गंजी आरो पैट पिन्हले । रुपसा में है सब आदमी कभियो नैं देखलो गेलो छेलै, नैं एत्ते-एत्ते रँ के फटफटिया—दिनो में बीस-पच्चीस बार ऐतें-जैतें रहै छै । गाँव के बूढ़ी-पुरानी के एक्के अचरज छै, “माय गे माय, एत्ते ते है श्रेसरो मशीन नैं आवाज करै छै, जत्ते ई फटफटिया । धरती पर चलै वाला ई हवाई जहाज छेकै, हवाई जहाज । कखनी हूरी के चली दे । चलै छै ते पांच-छो ठो एक्के साथ, जेना छोटो-मोटो रेल रहे ।” फटफटिया के घनघनैवो शुरू हुऐ कि गाँव के सब बच्चा-बुतरू रास्ता पर आवी के ठाड़ो आरो गुजरला पर तीन मिनट ताँय धूले झाड़तें रही जाय । हेनो ।

२१

धाक धिनक धिन, धाक धिनक धिन

धिनक धिन, धिनक धिन, धिनक धिन

दुर्गाथानो में बिना होली के होली मनैलो जाय रहलो छै । पचास-पचपन के भैरो चौधरी, सोराजी चौधरी, काली दत्ता, निताय मंडल, सुधीर घोष के दगदग

उजरोँ खादी के कुरता-पजामा लाल-गुलाबी रँगोँ सें सरावोर छै । दूरे में खाड़ोँ गामोँ के पचासो बच्चा-बुतरू अचरज के आँखोँ से घूरी रहलो छै । आखिर है केन्होँ होली छेकै ? गाँव में काँही होली नैं मनैलो जाय रहलो छै आरो यहाँ होली, “अरे खाली धिनक धिन, धिनक धिन होतै कि एकाध होरियो ?” सोराजी चौधरी नैं आपनो हाथ केँ एकदम आगू बढ़ैतें कहलकै । मिरबा के चेहरा पर रोमांच के कम्पन ढोलक पर पड़लो थाप सें कहीं जादा होय रहलो छेलै ।

‘अभी होरी केना होतै चौधरी का, होली तेँ अभी महिना भरी दूर छै । इखनिये सें होली शुरू करी देला सें होली बासी नैं भै जैतै ।’ रामलोचन आपनो बात खतम करतें-करतें एक बार फेनू ढोल पर आपनो हाथोँ के घोड़ा सरपट दौड़ावेँ लागलो छेलै,

धाक धिनक धिन, धाक धिनक धिन
धिनक धिन, धिनक धिन, धिनक धिन

जखनी रामलोचन के हाथ ढोलक पर उछली-कूदी रहलो छेलै, तखनी ओकरो मूड़ी नीचू-ऊपर दायोँ-बायोँ हेने होय रहलो छेलै, जेना ढोलक नैं, वामर के झपट्टा पर भगत का भाव ऐतें रहे । फेनू हठाते थाप रोकतें होलेँ चौरासी सें पूछलकै, “अरे आभी ताँय शनिचर नैं ऐलो छै ?”

“की बोलै छैं ? भांग तेँ नैं खाय लेलेँ छैं । आबेँ शनिचर मुखिया होतै । तोहें की सोचै छैं, तोहें जखनी जे दारू-ताड़ी, गांजा-भांग के बैठकी लगैवें, वही में शनिचर जी आवी बैठतै । आबेँ ऊ दिन भूलें । आय शनिचर जी के घरों पर जलसा होतै, कलेँ सोर-सिपाही, बड़ोँ-बड़ोक्का लोग ऐतै-जैतै, मुखिया पदों लेँ खाड़ोँ होय वास्तें बधाय दैलेँ.....अरे हमरा सिनी आपनो मित्र के होय वाला जीत पर ढोलक बजावें, बस यहें बहुत” आरो चौरासी ने बिना ताल-लय वाला दोनों हाथों सें ढोलक के दोनो दिश जोरोँ-जोरोँ सें पीटी देलकै ।

“मजकि सुनै छियै सब्भे टोलो में हेने लोग जादा छै, जे शनिचर जी के मुखिया वाला बात सें खुश नैं छै, खुद शनिचर जी के टोले में हेनोँ लोगोँ के कमी नैं छै । भोरे-भोरे रामधारी मरड़ ऐलो छेलै । कही रहलो छेलै, “शनिचर शनिचर सें शनि मुखिया केन्हें नी बनी जाव, हमरोँ लेँ तेँ वहा शनिचरा छेकै, वहै परफुलवा, सोरजिया, गोपिया आरो भैरवा के पालतू । वें जलसा में मुर्गा बनावोँ कि खस्सी आरो ऊ भोज में दारोगा आवोँ कि मंत्री, हमरोँ घोंर-घराना वै में नैं जावैवाला छै, हों.....अरे ई बात के नैं जानी रहलो छै कि कैथ-टोली, बभन-टोली, बबुआन-टोली आरो गुअर-टोली में जे-जे मुखिया-चुनाव लेँ खाड़ोँ होलो छै, सब शनिचर के आदमी छेकै । जबेँ चुनाव के दिन ऐतै तेँ रातो-रात सब शनिचर

के पक्षों में बोले लगतै । डराय, धमकाय, मनाय के आपनो-आपनो टोला के बहुत वोट दिलवाय देतै आरो शनिचर मुखिया बनी जैतै । ई चुनाव नैं भेलै, धोखाधड़ी भेलै आरो जे चुनाव भय-आतंक सें हुऐ छै, ओकरा में नैं आदमी शांति महसूस करै पारै, नैं जीतैवाला ही आदमी के विश्वास जीतै पारै ।” कहै वक्ती निताय मंडल के जी, नैं जानौं कैन्हें होय गेलो छेलै ।

“धुर, छोड़ै है सब बातों के । हौ, सब्भें जानै छै, शनिचर केना चुनाव जीततै, ते की कोय मुखियागिरी छिनियो लेतै पाँच सालो वास्तें । आबे पाँच साल हमरा सिनी के मौज-मस्ती करै के समय ऐलो छै । की ढीबा ? यही बातों पर दै ढोलक थाप ।” आरो एक बार फेनू चौरासीं जोर सें दोनो आँख मुनी ढोलक के तड़ातड़ा पीटी देलकै ।

“धुर, तोहें ढोलक फोड़वै की मरदे । बजाय-उजाय के लुर ते छी नैं, खाली ढम-ढम करै छें ।” रामलोचन चौरासी के दोनो हाथ झटकतें कहलकै ते चौरासी के चेहरा थोड़ो उतरी गेलै ।

“अरे ढोलके नी फुटतै, किस्मत ते नैं नी । आबे ते किस्मते के रस्सी कसै के दिन ऐलो छै, ढोलक के नैं.....अच्छा एक बात ते बताव, हौ बेघर सिनी बसावै के बात कत्ते दूर आगू बढ़लो छै ।” बात के बदलतें सोराजी चौधरी नैं चौरासी सें पूछलकै ।

“होय रहलो छै, होय रहलो छैदू दिन पहिनें शनिचर सें पूछले छेलियै ते वै कहनें छेलै, ‘चौरासी, ई छोटो-छोटो कामो वास्तें आबे हमरा सें नैं पूछलो कर.....बस समझी ले, हममें मुखिया होलियौ आरो तोरा सिनी सरपंच । जे मोन हुवौ करियें ।’ एकरा सें सब्भे बात साफे छै ।” चौरासी भावविभोर मनो सें ढोलक पर दायो हाथ सें एक जोरदार चोट देतें कहनें छेलै । वैसें रामलोचन बातों के खयाले करी के ढोलक पर एक्के दिश आरो एक्के बार चोट करनें छेलै, तहियो मिरबा के चेहरा तनै सें रुकलो नैं छेलै आरो वैनें ढोलक के खड़ा करी अलग राखी देनें छेलै । वहाँ सें बच्चा-बुतरू हटी गेलो छेलै कि आबे ढोलक-ढुलक नैं बाजै वाला छै । पर ई सब बातों पर कुछवे ध्यान नैं दै के चौरासीं सोराजी चौधरी सें कहनें छेलै, “मतरकि एक बात हमरा समझै में नैं आवै छै सोराजी काका । आखिर शनिचर विधाता के बारे में कैन्हें खोज-खबर लै रहलो छै । कहीं मुखिया बनला के बाद ओकरो मोन ते नैं बदली जैतै चौधरी का ? कोय ठीक, नांगटे चानन नदी में दोनो नहैलो पाठा छेकै ।” कहतें-कहतें चौरासी के मुँहो पर हवाई उड़ै लागलो छेलै, मतरकि सोराजी चौधरी ओकरो चिंता के उड़ैतें, जेना हाथ के पंजा सें चिड़िया के उड़वै के

कोशिश हुए, कहलकै, “एकदम नैं, अरे ई सब एकदम नैं छेकै, विधाता के खोज-खबर लेवो, राजनीति वाला बात-चीत छेकै । नैं समझवैं भतीजा लाल । राजनीति में कत्ते दिमाग चलाय ले लागै छै.....फेनू विधाता कहाँ छै, कहिया ऐतै, ई सब के जानै छै । ओकरो ऐतें-ऐतें ते चानन-पट्टी बेघर सिनी शरणार्थी सें आवाद होय जैतै, हा, हा, हा, हा, हा, हा, हा ।” सोराजी चौधरी के ठहाका उठी के होन्है धीरे-धीरे नीचे होलो गेलो छेलै, जेना हरमुनियम में भरलो हवा के कोय पटरी दावी के निकाली देले रहे—अवरोही आवाज आरोही होतें हुए ।

“अरे यही बातों पर आबे देखैं ।” अभी तौय चुप्पे बैठलो काली दत्ता खड़ा ढोलक के आपनो जाँघो के नीचे दबैलकै आरो आवाज करे लागलै

धाक धिनक धिन, धाक धिनक धिन

धिनक धिनक धिन, धिनक धिनक धिन

आरो सब्भे मस्ती में एक सुरो सें बोली उठलै,

कहो कि सरे र.....र कहो कि सर.....र.....र

र.....र.....र.....र.....र.....र.....र

२२

विधाता रो आवै भर के देर छेलै, गाँव में फेनू सें पहले वाला माहौल आवे लागलो छेलै । रवि चक्रवर्ती, कमरूद्दीन, एकबाली यादव, रंगीला मंडल, लतांत, योगी आरनी के मनोबल बढ़ी गेलो छेलै । है कहना ते एकदम गलत होतै कि गामो के नब्ज एकदम सुधार पर आवी गेलो छेलै, ऊ ते आबे शायत हुवौ नैं पारै छेलै, मतरकि नारा, कनफुसकी, सरेआम उलटा-सीधा बोलवो जरूरे रुकी गेलो रहै ।

गाँव में उतरतैं विधाता गाँव के हवा-पानी के सूँधी-साँधी सब बातों के जानी लेले छेलै । ऊ भोरे-भोर, जखनी गाड़ी सें उतरलो छेलै, आपनो घोर जाय सें पहिने ऊ मीरा भाभिये सें मिललो छेलै । अनिरुद्ध सें जादा मीरा भाभी ही गाँव आरो गाँव के एकेक आदमी के बारे में एक सांसो में सुनाय गेलो छेलै । विधाता एक-एक बात के सुनने छेलै आरो वही सब पर गुनतें-छिगुनतें घोर आवी

गेलों छेलै । घरों में ऊ घंटो भरी सें बेसी नैं ठहरलों होतै । काका, काकी, भाभी, भैया—सबतें ठीक छेलै । फेनू की । घंटा भरी के बादे ऊ जे घरों सें निकललों छेलै तेँ आय ताय शायते घंटा-दू घंटा सें बेसी आपनो घरों में सुस्तैलों होतै । केकरौ कन खाना, केकरहौ कन सुती रहना—यहेँ तेँ विधाता के जीवन बनी गेलों छेलै । विधाता जानै छै, जों केन्हें केँ शनिचर केँ ठीक रास्ता पर लानी देलों जाय, तेँ सब मामला आपनेआप सुधरी जैतै, फेनू केकरौ सुधारै के कोय जरूरते नैं । मतरकि शनिचर केँ रास्ता पर लाना कि एतन्है आसान छै ? ऊ आपनो रास्ता छोड़ी केँ जोंन-जोंन रास्ता होतें भंगटी गेलों छै, वहाँ सें ओकरा लौटाना कत्ते बड़ो मुश्किल बात छै—ई विधाता केँ मालूम छै । ठीक बात छेकै, कि शनिचर अभियो ओकरो होने मित्र छेकै, मतरकि खाली मित्रहें वास्तें वैं आपनो सब कुछ की छोड़ी देतै, जेकरो लेँ वैं विधाता साथें अनिरुद्ध, गंगा, खुशी आरो लतांतो हेनो दोस्तो सें अपरिचय बनाय लेलेँ छै....पर चुप्पी सें तेँ समस्या सुधारै वाला नैं छै ? ई सब तेँ गाँव केँ नरक बनाय के तैयारी छेकै....आरो यही सब सोची केँ विधातां दिनों में एक-दू बार तेँ जरूरे शनिचर के घरों पर होय आवै छै । ई अलग बात छेकै कि शनिचर ओकरा शायते मिलै छै । मिलवो करै छै तेँ बहुत जरूरी के काम बताय केँ ऊ निकली जाय छै । शनिचरो केँ खूब मालूम छै कि विधाता आखिर केन्हें ओकरो घरों पर आना-जाना तेज करी देनै छै ? वैं मने-मन सोचै छै, “कुछु हुएँ, वैं भैरो, सोराजी, गोपी काका आरनी के साथ नैं छोड़ै सकै छै.....आखिर हमरो एक्के तेँ इच्छा छै, मुखिया बनी केँ मोन मोताबिक हुकुम चलाय के आरो हमरा ई पदो पर लानै लेँ भैरो का आरनी की-की नैं करी रहलों छै । हम्मं करिये की रहलों छियै ? सब तिकड़म आरो शकुनी के चाल तेँ हुनके सिनी के.....ई मुखिया के चुनाव की छेकै ? कुरुक्षेत्र । आरो ई कुरुक्षेत्र के तेँ हिनके सिनी सेना आरो सेनापति । हम्मं तेँ खाली युधिष्ठिर.....असकल्ला युधिष्ठिर करतै की ?.....नैं-नैं हम्मं विधाता के कहला पर आपनो सेना-सेनापति केँ नैं छोड़ै पारों । ई विधाता हमरा पास आवी केँ कुरुक्षेत्र कमजोर करै लेँ चाहै छै, ई नैं हुवै वाला छै.....ई रुपसा के मुखिया बनतै तेँ शनिचर.....शनिचर के सिवा कोय नैं बने पारें.....ई गाँववाला हमरा तड़पिया-गंजक्कड़ समझै छै, यही नी ! एकदिन हमरो मंडली में दस सेर चीनी वास्तें बैठतै, तखनी.....शनिचर केँ पूरा विश्वास छै, अबकि ऊ मुखिया बनिये केँ रहतै आरो मुखिया बनैलेँ गोपी का, भैरो का, हेनो आदमी के जरूरत छै, जे मिनिट में राम्हौ के मनो में सीता लेँ शंका पैदा करी दें । नैं, ऊ ई बारे में विधाता सें गप करै नैं पारें ।” से ऊ विधाता केँ दूरहेँ सें देखथें

कोय दिश चली दै छै । तहियो विधाता केँ एक्के जिद छै, ओकरा आपनोँ बातों में आनै के । ऊ ओकरोँ घोर आकि ओकरोँ अड्डा पर जैवे करतै । ई बात केँ ले केँ खुशी, जोगी, रवि आरनी खुश छै, है केन्होँ केँ नैं कहलोँ जावेँ सकेँ । यें सिनी कै बार खुली केँ कहलेँ छै कि आखिर है रँ ओकरोँ खुशामद करला सें तेँ अच्छो आदमी के मनोबल गिरै छै, शनिचर के प्रभाव तेँ बढ़िये रहलोँ छै । खुशी बोलै, “तोहें जे मूड़ी झुकाय रहलोँ छैं, तेँ की मूड़ी झुकाय के अरथ समझै के मूड़ियो ओकरोँ पास छै ?.....चीटी के पंख निकललोँ छै तेँ वैं आपनेँ केँ चील बूझै लागलोँ छै, बूझै दें, है समझवे नैं करी रहलोँ छै कि ओकरोँ आखरी दिन आवी रहलोँ छै....शनिचर सें शनिचर बाबू कहावै लागलोँ छै तेँ ओकरोँ माथोँ ठिकानोँ पर रहेँ भला, मतरकि है ओकरा मालूमे नैं छै—ओकरा बाबू कहवैय्या सिनी के कर्म केन्होँ प्रसिद्ध रहलोँ छै.....” पर ई सब बातों के असर विधाता पर नैं छेलै । ओकरोँ तेँ एक्के कोशिश छै कि केन्होँ केँ शनिचर केँ सही रास्ता पर लै आवै । यही सें तेँ रातो-बेरात ऊ शनिचर के घरों पर पहुँची जाय छै ।

२३

विधाता केँ है रँ शनिचर के घोर ऐवोँ-जैवोँ भैरो चौधरी, काली दत्ता, निताय मंडल आरनियो केँ आबेँ कम नैं खटकी रहलोँ छै । कै बार यै सिनी शनिचर सें यै मामला में खुली केँ पूछलेँ छै, “आखिर विधाता केँ है रँ घुरी-घुरी केँ तोरहेँ लुग आवै के की मतलब ? जों तोरा ओकरे साथ देना छै, तेँ फेनू हमरा सिनी केँ बीचोँ में फसैला सें की ? एक तोरा लेँ, खाली तोरहेँ लेँ हमरा सिनी गाँववाला के नजरी में गाय कटवैय्या रँ बनी गेलोँ छी.....आरो कहीं है तेँ नैं कि तोहें हुन्ने.....?” शनिचरहौँ साफ-साफ निताय मंडल, सोराजी चौधरी आरो काली दत्ता केँ कही देनैं छै, “विधाता आरो जे रहेँ-सेँ-रहेँ, ऊ एक जुबान के मर्द छेकै । जे वचन दै देलकै, दै देलकै, आबेँ सारहो पर सें नैं हटै वाला ।” एत्तेँ बड़ोँ बात कही देला के बाद सोराजी, निताय आरनी केँ विश्वास होय गेलोँ रहेँ, है बात बिल्कुल नैं छेलै, पर मनोँ के शंका केँ केन्होँ शनिचर के सामना में उजागरो नैं हुऐ लेँ देलेँ छेलै ।

चाहे काली दत्ता भैरो चौधरी सें मिलै कि भैरो चौधरी निताय मंडल सें, मिलतैं कहै, “ई बात हमरो बुद्धि में केन्हों नैं अटै छै कि जों शनिचर के विधाता सें कुच्छ भीतरिया बात नैं छै, ते ओकरा आपनो दरवाजा पर आवै सें साफ-साफ मना केन्हें नी करी दै छै ? काहीं ऊ दूमुंही साँप नाँखि दोनो दिश काटै ले ते नैं सोची रहलो छै ?”

“अरे नैं समझै छैं, आखिर छेकै ते दोनो एक्के चंडाल-चौकड़ी के पट्टा, आय नी है ससुरमुँहो बनवो छेकै । सूना में यै ले मिलतै होतै कि दोनो आपनो-आपनो कहानी केन्हो के बचैले राखियो.....ही, ही, ही.....आरो यहू बात छै कि हमरा सिनी के ओकरा सिनी के मिलवो-जुलवो सें की लेना । महीना डेढ़ महीना भरी के ते खेला छेकै । हुन्नें मुखिया-चुनाव होतै आरो हिन्नें ही, ही, ही, ही ।”

“देख निताय, हमरा एकरो इन्तजारो नैं करना छै कि शनिचर मुखिया बनतै । एकरो की गारंटी छै कि शनिचर मुखिया बनवे करतै, अरे मुखिया-चुनाव होली के दस रोज बाद छै आरो होली आय सें पन्द्रहवें रोज पर छै । हमरा सिनी के वही लगारी जे करना छै, करी लेना छै । नै ते पाँचो दस गाछ ।”

“है विचार एकदम ठीक । मानी ले चुनाव में शनिचर हारी जाय छै ते ओकरो बाद वन की, बेनाठी तक काटवो मुश्किल समझें आरो विधाता के ऐला के बाद ते गाँव के रवैयो बदली रहलो छै, वै सें की कहलो जावे सकै छै कि शनिचर मुखिया बनिये जैतै । शनिचरा ठिक्के में शनिचर बाबू होय्ये जैतै । देखै नैं छैं, की रँ है दसो ठो छौड़वा-विधतवा, अनिरुधवा, खुशिया, प्रसूनमा, कमरुद्दिनमा, जोगिया, गंगवा, रविया, आरनी जन्ने मोन, तन्ने खाड़ो होय जाय छै आरो करे लागलो नौटंकी । कहै छै नुक्कड़ नाटक छेकै ।”

“धुर नुक्कड़ नैं, है लुक्कड़ नाटक छेकै । जहाँ विधतवा आरो अनिरुधवा हेनो दस ठो लुक्कड़-नुक्कड़ पर जुटलो, देह-हाथ चमकैलको—वहीं लुक्कड़ आरो नुक्कड़ नाटक.....ही.....ही.....ही.....ही.....हा.....हा..... हा.....हे.....हे.....हे । ”

“कहै छै नी—लड़का शहर सें पढ़ी के एलो—की सिखलको, ते खड़ाखड़ मूतै ले, वही विधतवा”

हा.....हा, हा, हे, हे, हे, ही, ही, ही ।

“मतर एकरा में खाली हाँसै वाला बाते नैं छै भैरो.....नैं ताम, नैं झाम, मतरकि है नाटको में जे ओकरा सिनी बोले छै, ऊ आपनो सिनी वाला नाटक के बात नैं छेकै.....ई नुक्कड़ नाटक हमरो सिनी के कहीं भीतरे-भीतर जोड़

खोदे वाला नाटक छेकै.....सच पूछें तेँ वै में जौन-जौन पात्र आवै छै, ऊ सब जेना हमरे सिनी के बात-व्यवहार के नकल करतें लागै छै ।”

“तेँ की ऊ सब नाटक हमरै सिनी पर लिखलोँ जाय रहलोँ छै, हुएँ-न-हुएँ, ई सब अनिरुधवा के चाल छेकौ.....अरे समझै नैं छैं, ई सब विधतवा के भीतरखेल छेकौ, यहीं राते-रात कमरुद्दीनवा सें है रँ के नाटक लिखवाय छै आरो फेनू दिन भरी है चौबटिया, हौ चौबटिया पर मरद-मौगी सिनी के बीच नौटंकी करवैलेँ फुरै छै । गूड़ोँ के गाछ केतारी छेकै विधतवा । समझी ले । एकरे गोड़-हाथ तुड़वाय देना छै ।”

निताय मंडल आरो भैरो चौधरी एक दूसरा के आँखी में कत्तेँ-कत्तेँ सवाल के हल कुछ देर लेली खोजतें रही गेलोँ छेलै ।

२४

१-३

दीपा

हम्मैं गाँव लौटी गेलोँ छियै । एक तेँ कमरुद्दीन के चिट्ठी हजारीबाग पहुँचलोँ छेलै, दुसरोँ तोरोँ चिट्ठी नैं मनोँ में एतन्हैं सपना बुनी देलेँ छेलै कि गाँव लौटी ऐवोँ एकदम लाचारी बनी गेलै ।

आरो जों गाँव नैं लौटी ऐतियै, तेँ नैं कहलोँ जावेँ सकतियै कि मुखिया-चुनाव होतें-होतें रुपसा के की रूप रहतियै । एखनिये तेँ एकरोँ रूप शिकायत, कनफुसकी, बैर आरनी के धूरा में लेटाय-सनाय केँ अनचिन्हार-अनभुहार रँ लागेँ लागलोँ छै । तोरा ई सुनी केँ अचरज होतौँ कि वहेँ गाँव के लोग, जे कल ताँय चाचा, बाबा, मामा छेलै, चुनाव वाला माहौल सें आय कत्तेँ अजनबी रँ बनलोँ-बनलोँ चलै छै । हालांकि ई कहवोँ एकदम गलत होतै कि गाँव के सब्भे टा यहेँ रँ के होय गेलोँ छै, मतरकि आठ आना किसिम तेँ जरूरे । तोरा विश्वास नैं होतौँ—अठखेली रोँ पोता, बीस बरस रोँ रमखेलिया, पांच दिन भेलै, बीच चौबटिया पर मंसूर काका केँ कही देलकै, ‘मौलवी जी, खाली बसन्ते काका के बैठकी में नैं गेलोँ करोँ, हमरो दुआरी पर बैठकी होय छै, वहुँ ऐलोँ करोँ, हमरो सिनी लेँ दुआ-सलाम करलोँ करोँ ।’ कल ताँय जेकरा मुँहोँ में बोली नैं

छेलै, आय ऊ महाभारत बाँची रहलौ छै । यहें सें तोहें गाँमों के हालत जानें पारौ । ऊ तें समझौ, शनिचर नैं जानौ कहाँ सें आवी गेलै आरो बीच-बचाव करी देलकै, नैं तें मुसलमान-पट्टी के पचासो युवक जे रैं उधियैलौ छेलै कि नैं कहलौ जावें सकें कि की होतियै । खुद मंसूर का, सलामत चाचा, अनवर का, वसन्त का आरो एकवालीका आरनी मिली कें तीन-तीन रोज घोर-घोर जाय कें सबकें समझैतें रहलौ छेलै । होना कें कुछु यहू चाहै छेलै कि बैर होलौ छै तें फैसलौ होय जाय । तोरा आचरज होतौ कि ई बात दोनो दिश वही सब बोली रहलौ छेलै, जे सिनी मंसूर का, सलामत काका, वसन्त का के गोदी में खेती-सुती कें जुआन भेलौ छै । जेना अनवर का आरो वैशाखी बाबां हाथ फैलाय-फैलाय कें एकरौ सिनी के सलामती वास्तें दुआ-मिन्नत माँगतें रहलै, हौ सब बातों कें भुलाय देलकै आरो ई सब जानै छौ कथी ले ? मुखिया-सरपंच बनतै, यही ले । केकरहौ विश्वास नैं छेलै, कोय सोच्छौ नैं सकलै होतै कि है भोग-भाग वाला पद पावै के लोभो में एक दिन आदमी आपनो आँखी के पानी उतारी कें राखी लेतै । दिमाग शैतान के घोर बनाय लेलै छै । बरस भरी पहिने बैशाखी काका के कान्हा पर झूला झूलैवाला सलीम्मा आपनो टोला में मिटिंग बुलाय कें यहें कहलै छेलै कि बैशाखी काका हिन्दू के पक्ष ले छै । हमरा सिनी ओकरहै मुखिया बनैवै, जे हमरो पक्ष लेतै, सुनै में आवै छै कि वहें दिनों सें शनिच्चर साथें काली का, भैरो का साथें सोराजी काका के भी मुसलमान-पट्टी में ऐवो-जैवो तेज होय गेलौ छै । मतरकि है विश्वास तें करवे करो कि जब ताँय रुपसा में अकवाली का, बसन्त का, शिवचरण का आरो मंसूर का हेनो आदमी जिन्दा छै, है गाँव देहो पर हजार चोट खाय लै, मरैवाला नैं छै ।

मतरकि है सोचै लें मजबूर तें करवे करै छै कि आखिर मंसूर का आकि बसन्त का कहिया ताँय । हिनको बाद गाँव जो न पीढ़ी के हाथो में जैतै, की ऊ परफुलवा के यहें पीढ़ी होतै, जे सलीम के छेकै आकि शनिचर के । हममें तें समझै छियै कि हमरो पीढ़ी के खराब करै में हमरो सरकार सबसँ जादा जिम्मेदार छै । पंचायत तें हमरो गामों में हजारो वर्ष सें छै, कोय मुखिया होय लें, मार-पीट नैं करै छेलै । सब्भे कें पता छेलै कि मुखिया के होतै । आय सब मुखिया होय लें चाहै छै, कानो-कोतरो सब । कैन्हें कि मुखिया होय के मतलब छेकै, मुख्यमंत्री-प्रधानमंत्री होवो । बिड़ला-टाटा के सम्पत नाचै छै मुखिया बनै वाला के आँखी में । सम्पत तें आदमी के आय कमजोरी होय्ये नी गेलौ छै—न्याय नैं । गाँव तें नरक बनवे करतै । चुनाव के राजनीति नैं अजीब बनाय देलै छै गामों के.....जुलूस निकली रहलौ छै । किसिम-किसिम के झंडा लै

के । आमना-सामना आवी के टकराय के मूडों में नारा लगाय रहलौं छै । स्कूल बंद छै । मास्टर-चटिया सब जुलूस-राजनीति के पीछू बेहाल । ई बातों के केकरौ चिन्ता नैं छै । ताज्जुब छै, महिना-दू-महीना में आपनो ई गाँव कत्ते बदली गेलो छै । हमरा लागै छै सरकार मुखिया के चुनाव नैं करवाय रहलौं छै, गामों में नेता के कारखाना बनाय रहलौं छै, जे नेता देश-दुनियाँ बाँटी के शासन करै के कला सिखावे सके । ई चुनाव के राजनीति नैं आपनो गाँवों में रामराज के ते उखाड़िये देने छै, जेना लागै छै एकरो सपन्हौ उखाड़ी जैतै ।

तोर्हे विधाता

२५

विधाता के दुसरो पत्र दीपा लेली

७-३

प्रियश्री दीपा

एक चिट्ठी पाँच दिन भरी पहिले डालले छियौं । सबटा बात वै में नैं लिखे पारले छेलियौं । गामों के सब हाल आबे लिखनौ मुश्किले छै । है पाँच महिना के भीतर गाँव की रँ रन्न-भन्न होय गेलो छै । खास करी के सौंसे गाँव में दुर्भाग्य नाँखि जे रँ सफेदा के गाछ उगी रहलौं छै, ऊ ते आरो चिन्ता के बात छेकै । ई गाँव के सपना के जोड़ के उखाड़ी रहलौं छै, ई सोचै ले केकरो पास फुर्सत नैं छै । आपनो-आपनो कोठी भरतें रहे बस, आरो एक दिन जबे कोठी भरना बंद होय जैतै, तबे ? हाही के कोय सीम्हें नैं हुऐ पारे । आदमी के यहें हाही नैं गाँव के जंगल बर्बाद करने छै, करी रहलौं छै । ई महिना-दू-महिना के भीतर दसो-बीस शीशम गाछ आरो खतम भै गेलो छै । जेकरा जान के फिकिर नैं छै, ऊ फुसका-फुसकी करै, मतरकि एकरा सें होय्ये जाय छै की ? कै बार लोगें थानौ में जाय के कहने छै, पर थानावाला यहें कहले छै, वन-विभाग में शिकायत करै ले । शीशम के जत्ते गाछ काटलो गेलो छै, वहाँ-वहाँ सफेदा के पौधा लगाय देलो गेलो छै, धारा-पाँती में । सफेदा यानी धरती वास्ते जहर । हम्मैं ऐह्ने, एकरो विरोध करने छेलियै, मतरकि वहाँ पर कहाँ सें आवी के बसी गेलो पचासो घोर विरोध करै पर जुटी ऐलै । कहे लागलै, “सरकार लगवैले छै आरो हमरासिनी के जोगै ले यहाँ बसैलो गेलो छै, हम्मैं ई पौधा नैं उखाड़े देभौं ।

सबके पता है, सफेदा के ई गाछ कौनें लगवैनें है आरो कैन्हें ? ई पचास घोंर केकरो बसवैलो छेकै आरो कैन्हें ? पर कोय नैं बोली रहलो छै । आबे हमरासिनी दस आदमी बोली के की करौं । नैं बोलै छियै ते दू कारनें । एक ते आखिर ई बेघर जैतै कहाँ, दुसरो कि विरोध करला पर यही बातों के लाभ उठाय में कुछ लोग चुकतै नैं । चाहै वाला ते चाहिये रहलो छै कि बात के बतंगड़ हुए ।

सोचै छियै, ते लागै छै जेना माथो फटी जैतै । एकेक नस ऐंठे लागै छै । आखिर आपनो लाभ वास्ते आदमी पूरा समाज के कैन्हें स्वाहा करै पे तुली गेलो छै । तोरा याद होतौ, एक दिन यहे गामो में सब लोगे कसम खैनें छेलै, ‘आरो कहीं लगतै ते लगतै, रुपसा में सफेदा रो गाछ नैं लगावै देवै, नैं लगैवै ।’ जे सफेदा से मिट्टी के उर्वरा शक्ति मरलो जाय रहलो छै, पानी के सतह सुखते जाय रहलो छै । है सबनें जानी रहलो छै कि जहाँ ई खाड़ो छै, वहाँ आसपास के खेतिहर जमीन बांझ होलो जाय रहलो छै । है देश के बड़का-बड़का खेतिहर के अनुभव छेकै । खेत के ऊपरी मिट्टी ते रेतीला होय्ये जाय छै, साथे-साथ रासायनिक तत्व में परिवर्तन ऐला से सौ फूट के बाद के जमीनो खेती लायक नैं रही जाय छै । जीवन के जे आधार छेकै—पानी आरो मिट्टी—दोनों के खराब करै छै ई सफेदा । दुख ते यही छै कि आय देश के छों-सात लाख हेक्टर जमीनो पर अस्सी-पचासी प्रतिशत वृक्ष यही सफेदे के छेकै । हमरो हिन्दुस्तानी है विदेशी गाछ के जहर से भिड़ रहतौ एको खूबसूरती पर मरी रहलो छै ।

तोरा याद होतौ, उन्नीस सौ तिरासी में बंगलोर से तीस किलोमीटर दूर होसकोटे तालुका में जेबे कर्नाटक उच्च न्यायालय के पूर्व न्यायाधिश चंद्रशेखर आरो प्रो० बी० बी० कृष्णमूर्ति साथे सुन्दरलाल बहुगुणा पर्यावरण-निरीक्षण में गेलो छेलै, ते की कहनें छेलै, कहनें छेलै कि “सफेदा गाछ से संभावित खतरा के बारे में हमरो मनो में कोय शंका नैं छै, यै लेली सफेदा के गाछ उखाड़ी के वै जग्हा में कोय दुसरो उपयोगी गाछ लगैलो जाय ते अच्छा ।”

कर्नाटके में की होलो छेलै । वहाँको रैयत-संघ के सदस्ये चिकमगलूर जिला के सरकारी जमीन आरो नर्सरी में लगैलो सफेदा के लम्बा-लम्बा गाछ आरो पौधा के उखाड़ी फेंकी देनें छेलै । ई संघे सरकार के चेतावनी छेलै कि सफेदा के गाछ लगैवो तुरत बंद करलो जाय । आय वही गाछ आपनो गाँमो में लगैलो गेलो छै, दस हजार गाछ लगाय के योजना छै ।

हमरा मालूम छै कि है सफेदा गाछो के पक्षों में समर्थनो उठी रहलो छै—यही ले नी, कि यै में पानी पटाय के जरूरत नैं पड़तै, पानी के एकरा जरूरतो

नैं छे आरो बड़ो होय केँ पैसो कम नैं देतै, पर हिनका सिनी केँ है मालूमे नैं छे कि यही सफेदा गाछ जबे आपनो जड़ो सें जहरीला रासायनिक तत्व छोड़तै आरो हजारो-हजार हेक्टर जमीन बांझ हुए लागतै; जबे येँ जमीन के भीतरी स्रोतो केँ सुखाय देतै आरो कुँआ-नदी सुखे लागतै, जबे यहीं हजार-हजार गाछ आपनो पत्ती गिराय केँ यहाँ के माँटी पर घासो-फूस उगै सें रोकी देतै आरो मवेशी केँ चारा नैं मिले लागतै, तबे यही गाँव के सुख-शांति हरदममे वास्तें खतम होय जैतै । तबे ई सफेदो केँ खत्म करनौ मुश्किल होतै, केन्हें कि तब ताँय ई सब गाछो के जोड़ जमीनो के नीचे-नीचे दूर-दूर ताँय फैली गेलो होतै आरो एकरा तबे जड़ो सें उखाड़ी फेंकना हजार-हजार आदमी वास्तें भी मुश्किल होय जैतै ।

एक तेँ चानन हेन्हें केँ सुखी गेलो छे । दस साल बाद दसो हाथ नीचे चुआँड़ी खोदलौ पर पानी नैं मिलतै । ई सब बातों केँ ले केँ लागै छे—एक बहुत बड़ो आन्दोलन चलाय के जरूरत पड़तै । है खाली रुपसहै तक सीमित नैं रहे, डड़पा, कटियामो, महाराणा, रजौन, खिड़डी, सब गाँव केँ येँ में समेटे लेँ लागेँ । एक-एक बूढ़ो आरो जुआन केँ समझावै लेँ लागतै आरो आन्दोलन वास्तें तैयार करै लेँ लागतै.....आयकल तेँ नैं, दस रोजो के बाद हमें चौधरी काका, अंसारी काका, पांडे का सें मिली केँ सफेदा-विरोधी-अभियान जरूरे चलैवै आरो येँ जग्घो में बोँर-पीपल-नीमी के कल्पवृक्ष लगवाय के अभियान चलैवै, ताकि कल गाँव के मवेशियो केँ चारा के अभाव में बेचै लेँ नैं लागेँ । कोय नैं सोची रहलो छे, कि कल ताँय यहै रुपसा एत्ते खुशहाल केन्हें छेलै । केकरौ एक दूसरा सें जलन नैं छेलै । सबकेँ खाय जुकुर छेलै । सब सुखी-सम्पन्न छेलै । केन्हें ? केन्हें कि कल के रुपसा तपोवन नाँखि छेलै । जलावन के लकड़ी बाहर जाय छेलै, जड़ी-बुटी गाड़ी में लदी केँ बाहर जाय छेलै । हौ सखुआ पत्ता के थाली । शहर के पैसा यहाँ गाड़ी पर लदी केँ आवै छेलै । सब सुखी-सम्पन्न—पत्ता विनवैय्या सें लैके पम्ता ढोलवैय्या ताँय । आय जंगल-तपोवन खतम भै गेलो छे, तेँ पैसो खतम भै गेलै । लोगें आर्थिक जरूरत पूरा करै वास्तें पंजाब भागी रहलो छे आरो दिल्ली, मजदूरी करै लेँ । घोर छोड़ी केँ वहाँ सड़को पर खोली में सुती रहलो छे । परिवार के शांति छुटी गेलो छे । दू पैसा जुगार नैं आदमी केँ केन्हो टुअर बनाय देले छे । कल जबे यहाँ वही जंगल के छाँव होतै तेँ की लोग हेन्हें परदेशी होतै । कल्लर, घोल्टन, ढीबा, सोमन, कदरा, आरो नैं जानौ कत्ते आदमी गाँव छोड़ी देने छे । केन्हें ? जंगल हमरो जीवन छेकै, एक सुन्नर जीवन के आधार-मंत्र आरो फेनू सें ई मंत्र गाँव-गाँव के कानो में फूँकना छे । ई यहू लेँ कि जबे कल कोय सवासिन, येँ आकि कोय गाँमो के लड़की दुलहिन बनी केँ

जैतै या ऐतै, तेँ आखिर ओकरोँ वास्तें रास्ते के किनारी-किनारी छाँव के व्यवस्थो तेँ करना छै । छाँव तेँ नीमिये-बोरे आरो पीपले रँ कल्पवृक्ष सें होतै, है सफेदा सें तेँ माथोँ भरी नैं बचेँ पारेँ, सौँसे देह छाँह सें की ढकतै ?

दीपा, वसन्त आवी गेलोँ छै, मतरकि वसन्त के अनुभवो हुएँ पारी रहलोँ छै की ? केना केँ होतै ? यही गाँमोँ में कभियो गाछे-गाछ छेलै—शीशम, सागवान, सेउड़ा, आम, जामुन, पीपल, कोँन-कोँन रँ गाछ नैं ठामे-ठाम । आबेँ वहाँ घोर छै, या तेँ परती । बसन्त उतरतै तेँ आखिर कथी पर ? ऊ दिखै तेँ कहाँ ? हमरोँ किंछा छै, फेनू सें यै गामोँ में हजारो-हजार बसन्त एक साथ उतारै के । यै लेली सरकारी सहयोग आरो कानूनी सलाह लेली हम्मैं होली बादे पटना जाय रहलोँ छियै ।

बाद के बात बाद के चिट्ठी में ।

तोरोँ विधाता

२६

“शनिच्चर, तोहें समझै के कोशिश कर । ई चुनाव छेकै आरो चुनाव प्रधानमंत्री के रहेँ कि मुख्यमंत्री के रहेँ कि मुखिया के, धन गलैला बिना जीत के पानी की बाहर निकलैवाला छै ?”

“से बात तेँ हम्मू समझी रहलोँ छियै । मतरकि.....”

“मतरकि-जतरकि कुच्छू नैं । परसू होली छेकै । सब खाय-पीवी केँ अचेत रहतै आरो परसुवे राती आपनोँ काम फिनिस ।”

“नैं-नैं काका । तोरा सिनी समझै नैं छै । है रँ के काम सें गाँव में बड़का कुकांड भै जैतै । तोरहौ सिनी है गाँव में रहेँ लायक नैं रही जैवौ आरो हम्मैं तेँ नहिये.....तोरा सिनी है समझै केन्हें नी छै कि एक-एक गलत बात हमरे बात मानलोँ जाय छै, तबेँ एत्तेँ बड़ोँ बात भै जैतै आरो लोगें है केना नैं मानतै कि यै में शनिचरे के हाथ नैं छेलै । नैं-नैं, हम्मैं तेँ यै कामोँ में हामी नैं भरेँ पारौँ ।”

“तोहें मुखोँ रँ बतियाय रहलोँ छैं शनिच्चर । अरे आठ-दस गाछ कटतै, कोनो सौँसे जंगल थोड़े काटलोँ जैतै । फेनू एत्तेँ बड़ोँ जंगल के बीचोँ

सैं आठ-दस गाछ निकलिये जाय छै, तेँ की पता चलतै । देवतहैं नैं जानेँ पारतै, हों ।”

“देवता नैं जानै तेँ नैं जानेँ । मतरकि ई बात विधाता सैं छुपलोँ नैं रहेँ पारेँ । तोरा नैं मालूम छौँ, आयकल ओकरोँ दिमागोँ में गाछोँ के जिन दुकलोँ होलोँ छै । आरू ऊ जिन के प्रभाव में खुशीलाल, कमरूद्दीन, अनिरुद्ध, लतांत, गंगा, सब-के-सब छै । एक्को केँ जरियो टा भनक मिललै कि.....”

“तहूँ एकदम भोला छैं शनिच्चर । भनक मिलतै केना । कोय होश में रहतै तबें नी । कल होली छेकै । साल भरी यै सिनी उपास करी लै तेँ करी लें, होली में केकरोँ जीहा नैं चटपटाय छै । विधातौ कल कोनो भट्टिये आगू होरी गैतें मिलेँ पारेँ । आरो अबकी भट्टी सैं भूत नैं, जिन निकलतै, जिन ।”

“मतलब नैं समझलियोँ काका ।”

“अरे यै में मतलब की समझना छै शनिच्चर । अबकी ई गामोँ के सब भट्टी समाज-सुधार के नाम पर हमरा सिनी बंद करवाय देलें छियै । चोरी-चोरका दारू बनाय वाला के करेजे कत्तेँ । बुबुआ डरौन सैं हड़कम्प.....से गाँव में बाहरवाला कलालिये सैं अबकी यहाँ दारू पहुँचतै । दारू हेनोँ कि पूछोँ नैं । आधोँ गिलास कंठ सैं उतरतें-उतरतें निसाँव माथा पर.....कनेलियाँ कहलें छै—चिंता करै के कोय काम नैं छै, जरा टा इस्प्रीट के मात्रा बढ़ाय देना छै, ओकरै में तेँ सब मगरमच्छ पानी के भीतर जाय केँ बैठी रहतै—तबें की ? मगरमच्छ पानी के भीतर रहतै आरो एत्तेँ दिनोँ सैं पियासला केँ दू-चार घैलोँ पानी मिली जैतै । अरे दू-चार घैलोँ सैं चुआँड़ी सूखेँ पारेँ, नद्दी नैं । फेनू चुआँड़ियो तेँ संघरी जाय छै ।”

“समझै में नैं आवी रहलोँ छै काका, तोरा सिनी आखिर करी की रहलोँ छौ ।”

“एकदम डरै वाला बात नैं छै । आरो सबसैं बड़ोँ बात, जोँ है मौका हाथोँ सैं गेलौ शनिच्चर, तेँ नैं हाथोँ में तीस-चालीस हजार टाका आवैवाला छौ, नैं तेँ तोहें मुखिया होय वाला छैं.....आय तक सब करलोँ-धरलोँ गूड़-गोबर समझें ।”

“आरो विधाता जे परसू हर साले नाँखि गाँव भरी में घूमतेँ रहतै से ?”

“ऊ अबकी नैं होतै शनिच्चर । सब व्यवस्था करी लेलोँ गेलोँ छै । कल भोर होतैं तोरा सिनी सब विधाता के पास पहुँची जैवैं । बस कहना छै—आय होली हेनोँ दिनोँ में मूँ फुलौव्वल नैं । आय सैं होनै होतै जे विधाता गाँव के उन्नत लेली चाहै छै । हमरा मालूम छै, विधाता आपना पर अविश्वास करी लै,

शनिच्चर पर नैं । बस की छै, कल भोरे सें होरी के जे ढोल-झाल चढ़तै, ऊ रातो-रात नैं उतरे देना छै । हमरौ सिनी वहीं बैठलो रहवै.....तबे केकरौ की, विधाताहौ के मनो में कोय शंका केना हुऐ पारतै.....सब आदमी के फिट करी लेलो गेलो छै । हिन्नें ढोल-झाल के आकाशभेदी आवाज होते रहतै आरो हुन्नें आरी के चर्-चों, चर्-चों । जेना ठनका के बीचो में मैना के आवाज । की गाछ कटै के, की बैलगाड़ी चलै के सबके आवाज खतम । पूरे सौ आदमी फिट छै । विधाता के बात छोड़ें शनिच्चर, कटैवाला गाछो तक के पता नैं चलतै कि ऊ कटी रहलो छै, हों ।”

“तोरा सिनी के जे करना छौं, करो, मतरकि है जानी ले, ई कामो में हम्में कहुँ सें नैं छियौं, कल कोय रँ के बात उठहौं, ते तोहें सिनी जानियौ ।”

“ठीक छै” कही के सोराजी चौधरी आरू गोपी घोष खुश होतें एक दिश चली देने छेलै ।

२७

जेना जेठो के पुआली में अनचोके आग पकड़ी गेलो रहे आरो क्षणहै में होहाय उठलो रहे, वहे रँ गाँव भरी में ई खबर फैली गेलो रहे कि विधाता-शनिच्चर एक भै गेलै, धरती-सरंग एक होय गेलै । कोय जल्दी विश्वास करै ले तैयार नैं छेलै.....तबे ते यही नी कहलो जाय कि सतजुग रो धरती पर गोड़ पड़ी गेलो छै कि छत्तीस तिरसठ भै गेलै.....कत्ते ते घरो सें दुआरी पर आवी-आवी आपनो शंका दूर करने छेलै, कत्ते टोला-टोला सें आवी के !

दसे-पाँच लोग हेनो होतै जेकरा है खबर सें नैं कोय हर्ष होलो छेलै, नैं दुख । वैं में विधाता के दोस्त कमरूद्दीन, अनिरुद्धो छेलै । रवि, गंगा आरो खुशी के ते नहियें होलो छेलै । नैं होलो छेलै ते कारण छेलै—वैं सिनी के ई बातों पर भरोसे नैं होय रहलो छेलै कि शनिच्चर रातो-रात केना बदली जैतै । बदलै के ठोस कारण ते आखिर होना चाहियो । आरो जब ताँय ऊ कारण नैं मालूम होय जाय छै, तब ताँय ई दोस्ती पर ऊ सिनी के भरोसे नैं छै ।

“शनिच्चर, चल मीरा भाभी कन ।”

“नैं, आय नैं । हम्में अनिरुद्ध के खबर करने छेलियै । होतै ते घरे

में, मतरकि कहवाय देलकै—बहियार गेलो छै । ई ते होन्हें छेलै । तोहें असकल्ले जाय के ओकरा समझैय्यै—सूर्य-चाँद के ग्रहण लागै छै, ते ओकरो अंग गली के गिरी नै जाय छै । ग्रहण लागै छै ते ओकरो शांति वास्तें, निस्तार वास्तें लोगें अनुष्ठान राखै छै, करै छै, की जिनगी भर वास्तें आँख चुरैले फुरै छै ।” शनिचर ई बीचो में कत्ते-कत्ते बात बोली गेलो छेलै, ओकरे नै मालूम । हों जखनी ओकरो धौनो पर विधाता हाथ रखले छेलै, तखनी ऊ जरूरे चौकी उठलो छेलै ।

“तोहें ई बातो ले चिन्ता कथी ले करी रहलो छें, अरे आय नै ऐलै खुशी आरो अनिरुद्ध ते की, कल ऐतै । रात भरी सोचै ले दें । कबे ताँय मनमुटाव के ठंडा में घी रँ जमलो रहतै, जरा टा सच्चा दोस्ती के आँच लगहें बरकी जैतै ।” आरो कुछ हुएँ-न-हुएँ, विधाता के दोस्ती के आँच पावी शनिचर एकदम पिघली के रही गेलो छेलै ।

“विधाता, एक बात ते तहूँ नै जानते होबैं, अबकी फगुआ ते वही खुशी में मनतै ।” हठाते बात के बदलतें शनिचर नै कहले छेलै ।

“ऊ की ?”

“महिना भरी पहलें हममें दीपा कन गेलो छेलियै । देखलियै दीपा के नानी सत्तो काकी पर गरमाय रहली छै । हमरहौ आचरज भेलै कि आखिर बात की छेकै ? कि तखनिये सत्तो काकी बोललै, ‘सुनो, है बात की हममें बोली रहलो छियौ, दीपा आरो विधाता के ले के सौंसे गाँव-टोला में काना-फूसी होय रहलो छौ, धनुकायन दी । ठिकके कहै छियौ—दीपा के रोको ।’ आबे ई सुनना छेलै कि दीपा के नानी तर-ऊपर करै ते लागली आरो वहे लहरो में कहना शुरू करी देलकै—छोड़ो सत्तो माय, हम्मू जानै छियै, कोन-कोन टोला में की-की गुप-चुप होय रहलो छै आरो ओकरा ले काँही खुसुर-फुसुर नै छै । हममें नाम गिनैय्यौ, एकरा सें यहे भलो होथौ कि मने-मन गिनी ला । जों हममें अपनी नतनी दीपा के बीहा विधाताहे सें सोचलियै ते बड़का आफत होय गेलै.....जों दिन दीपा के माय-बाबू दीपा के हमरो गोदी में सौंपी के स्वर्ग सिधारी गेलै, वहे दिनों सें दीपा हमरे बेटी नी । एकरो जात हमरे जात नी । आरो सुनो सत्तो माय, ठोठों में अँगुरी दै के नै बोलबावो कि कोन बड़ो-बड़ो जात के बेटी छोटका सिनी के घोरो में जाय के नै बैठी रहलो छै, इलाका भरी आँख उठाय के देखौ ते पता चलथौ । आरो सुनी ले कान खोली, हममें विधाता के पितयैनी सें यै लेली बातो मनवाय लेले छियै, है बात गेठी में बान्ही ला आरो के की कुकवारो करै छै, हमरा यै सें कोय्यो मतलब नै...” शनिचर नै विधाता के धौनो दबैतें फेनू

कहलें छेलै, “हम्मैं ई बात केकरौ नै कहलें छेलियै, तोरा सें पहलो दाफी कही रहलो छियौ । बोल, यही बातों पर होली में आवी रहलों छैं की नैं ?”

विधाता नें फटलो-फटलो आँखी सें शनिचर के देखलें छेलै, जेना ओकरा ई बातों पर विश्वास नै होलों रहै । फेनू ठोरो पर मुस्की लानतें कहलें छेलै, “तोरो बिना ते जोगीरा के मज्जै फीका पड़ी जाय छै शनिचर आरो होली जोगीरा बिना की.....” दोनों एक्के साथ ठठाय पड़लों छेलै ।

२८

फागुनी पूर्णिमा । धरती पे टह-टह इंजोरिया बरकलो दूधो रँ छिरियाय गेलो छेलै । एकदम दगदग चाँदनी । फेनू नद्दी कछारी के शीशम वन सें बुली के ऐलो पुरवैया हवा । जुआन ते जुआन, बूढ़ो-पुरानो ताँय के कहलों नैं जाय । माथा सें लै के गोड़ो ताँय रँगो के धार सें रँगलो । सब चलता-फिरता रँगाघारी रँ लागी रहलो छै ।

आय होली छेकै । कोय एतवार आरो शनिचर नैं कि हफ्ते बाद घुरी-घुरी ऐतै । पूरे साल बाद आवै छै.....ओकरौ में एक्के दिन, बासी फगुआ के की सेल । सब्भे आपनो-आपनो घरो सें निकली गेलो छै.....होली छेकै नी, आयको हेनो शुभ दिन में की मैल-मुटाव । दुश्मनो एक दूसरा के देहो पे दू बूँद रँग दै के शुभ मानै छै । फेनू जो न गाँमो में हजारो बरस सें सब्भैं एक्के ऐंगन के लोग नाँख होली मनैतै ऐलो छै, आय ऊ रेवाज हठाते केना टूटी जैतै । ई हुऐ नैं पारे । धेनू कापरी, सोराजी चौधरी, काली दत्त, असरेस मंडल, भैरो चौधरी बुली-बुली के गाँव के बूढ़ो-पुरानो सें मिललो छै, गोड़ो पर अबीर राखी के प्रणाम करने छै । ई बातों के आबे जौने जे कुछ लिऐ । कहै के ते बहुते यहू कही रहलो छै कि मुखिया-चुनाव में शनिचर के जीत स्थिर करै वास्ते है सब नाटक चली रहलो छै ।

मतरकि शनिचर आय आपनो सब्भे दोस्त के बुलाय के साफ-साफ कही देने छै, “देख प्रफुल्ल, मुखिया बनै लेली हमरा सें गोड़पड़िया नैं होतौ । आय दू महिना सें जे रँ भालू-बन्दर रँ टोलावाला सिनी हमरा नचाय रहलो छै, ऊ आय भोरे सें खतम.....कोय नैं जीत चाहै छै, सब हमरो टका के भुखलो.....”

एक टोला के एक आदमी से मिलौ, ते दूसरा कहतौं—आय ऊ आदमी के साथें मिली के सब गुड़-गोबर करी देल्लौ.....दोसरा साथें मिलौ ते तेसरो कहतौं—अरे ओकरो हस्तिये की छै, चन्नर माँझी के पकड़ो पूरे एक सौ वोट ओकरो हाथो में छै.....चन्नर मरड़ के पकड़ो ते दूसरो-तीसरो टोला नाराज.....गन्धौरी बोलतें रहतौं, “जीत हेने नैं होय छै, सब टोला के पूछे ले लागल्लौं, हम्मैं सबके कही के राखले छेलियै आरो तोहें चन्नर माँझी से मिली के आपनो गोड़ काटी लेले छौं । आबे तोहें आपनो जानौ”.....हमरा मालूम छै, ई गन्धौरी मेठ हेनो कैन्हें बोली रहलो छै, टोला वाला के पटियावै के नामो पर हमरा से हजार टका लेले छेलै, सब पीवी-खाय लेले छै, आरू हमरा से बोली रहलो छै कि ‘आबे तोहें आपनो जानो ।’ ई चुनावें हमरा से सुअरी के गू ताँय माथा से चन्दन रँ लगवैने छै । आबे जे होतै से होतै, हम्मैं गोड़पड़िया नैं करले फुरे सकौं.....आय से सब खेल बन्द । ई मुखिया चुनावें ते शनिच्चर चौधरी के शाने धूल में लेटाय देने छै । कल ताँय जेकरो छाया हमरो दुआरी ताँय नैं पहुँचे पारै छेलै, ओकरो दुआरी पर शनिच्चर हाथ जोड़ी के खाड़ो रहेबंद कर है नाटक । ई परफुलवां कैथबुद्धि लगाय छैं—जों विधतवा कोय्यो काम से भागलपुर गेलो, ते आबी के समझैतौ कि समझै नैं छैं शनिच्चर, ई विधाता आपनो शहरुआ साथी अनिल सहाय, काली झा आरू अश्विनी सिंह से गुटरू गूँ करै ले गेलो छै, के नैं जानै छै—कैथो के घुरची, बाभन के पेंच आरू राजपूतो के शान, तीनो मिले ते लिए जम्मो के जान.....हट्ट, दिन-रात के है शिकायत आरू उटका-पेंची से हम्मैं ऊबी गेलो छियै । बंद कर आबे है सब नौटकी । हम्मैं सोची लेले छियै कि जेना टाड़्डी के मुखिया मरड़ रुपसा के दशहरा-समारोह असकल्ले संभारी लै छै, वहे रँ अबकी होली-समारोह असकल्ले शनिचरा सम्भालतै । ई होली-समारोह में जे-जे मनो से आबे पारौ, आबौ, नैं ते शनिचरा असकल्ले जोगीरा गैतै, सुनी ले, हों ।”

शनिचरो सब तरह निश्चिन्त होय के दुर्गा थानो में आपनो मंडली साथें जुटी गेलो छै । प्रफुलवा, विपिन, ढीवा, खखरी, राम लोचने नैं बनारसी, रवि, अकवाली भी समय पर आवी गेलो छेलै । योगी, खुशीलाल, विधाता के नैं ऐते देखी के ढीवां नैं शनिचरा से जरा आँख नचाय के बोललै, “आभी तांय परदेशिया नैं ऐलो छै ।”

शनिचरा के ओकरो भाव-भंगिमा समझै में देर नैं लागलो छेलै, “देख ढीवा, आइंदा से जों कभियो विधाता के परदेशिया कहलै, ते तोहें ई देशो में दिखाय नैं पड़वे । जानवो करै छैं आपनो देश के माँटी आरू संस्कृति के बारे में ।

आरू जेकरा संस्कृति के, भूगोल के अगलका अक्षर 'भू' तक के भी ज्ञान नैं रहे, ओकरो बुद्धि ते गोल होवे नी करतै, तबे हेनो गोलबुद्धि के करमो गेले समझे । हमरा खूब मालूम छै कि विधाता बारें में कुछ मिली के है प्रचार करी रहलो छै कि ऊ परदेशी छेकै, मध्यप्रदेश सें ओकरो पूर्वज ऐलो छै । रुपसा में हजार-पाँच सौ बरस पहिनें एकरो पूर्वज आवी के बसलो छेलै । ते हेनो के जात छै यहाँ, जेकरो नाभिकमल यहाँ सें निकललै—कान्यकुब्ज कन्नौजे सें ऐलै, राजपूत राजस्थाने सें ऐलै आरू शक्-ब्राह्मण ते भारतो सें बाहर शकद्वीप सें ऐलै । हौ भैरो चौधरी का रहे कि कसोराजी चौधरी का, चाहे शनिचर चौधरी रहे कि रवि चक्रवर्ती, के छेकै यहाँकरो ? खानदान के खतियान उठाय के देखी लें; केकरो बारे में कुछ बात नैं उठै छै—फेनू आय विधाता परदेशी केना भै गेलै । हँकाय के कहै छियौ ढीवा, काँच रस्ता पर फेकै छें, तोरा नैं गड़ौ ते नैं गड़ौ—तोरो घोरो-टोला के लोग ओकरा सें नैं बचे पारतौ । आरू जखनी तोरो कारनामा के पता गाँव वाला के चलतौ, मछली-कबूतर रँ नोची के राखी देतौ । तोरहौ मालूम होतौ कि तोरो परबाबा सौ सवा साल पहिलें सिंध सें भागी के यहाँ बसलो छेलौ । सुधरें, आरो की कहवौ.....नीच, आदमी जातो सें नैं, आपनो नीच विचारो सें होय छै.....पाँच रोज पहिनें जबे हममें विधाता सें मिललियै ते हमरा आपनो भूल समझे में आवी गेलै । हमरा आबे एकरहे दुख छै कि तोरा सिनी मिली के हमरो दिमाग के दिमाग नैं रहे देलें । ढीवा भाग मनावै कि विधाता रँ लोग रुपसा के मिललो छै । जो हेनें लोग ई देश के एक-एक गाँव के मिली जाय, ते तोरो रँ लोग देश-देश में नै दिखावै ।”

“बहुत बोली रहलो छें शनिचर” ढीवा के मूँ तपलो खपड़ी रँ लाल हुएँ लागलो छै । जे स्थिति के भाँपते हुएँ ही रवि चक्रवर्ती नैं बीच-बचाव करतें कहले छेलै, “जानै छियौ, दबैवाला दोनों में सें कोय नैं छै, आखिर ढीब्हें ते शनिचरे के माय के दूध पीवी के बड़ो होलो छै, जेना कि विधाता, कहो जी सा रा, रा, कहो जी सारा, रा, रा, रा, रा, रा.....रवि चक्रवर्ती के शुरू होना छेलै कि खखरीं ढोलक पर एक ताल दै के कहलकै,

ओ नाथ जी हल्ला-गुल्ला बन्द करो, सुनो हमारी बानी जी
नैं ते भरो शनिचर का पानी जी—

सबे नैं एक्के सुरो में बोललो छेलै, “सत्य है जी” शनिचरो के चेहरा कुछ-कुछ नरम पड़ी गेलो छेलै । सब टोला के सबे युवक जुटलो छै । बूढ़ो-पुरानो यै मंडली में भाग नैं लै छै । पछियारी टोला के धुरखेली बाबा के वासा पर बूढ़ो-बुजुर्ग के मंडली होली के दिन जमै छै । धुरखेली बाबा कहै छै, “ई छौड़ा

सिनी के कोय ठिकानो नैं, गीत गैतें-गैतें वैमें हेनो-हेनो गाली वाला बात जोड़ी दै छै, जेना लाज-शरम एकदम घोटी के पीवी गेलो रहे । काका-मामा के नैं करै ते नैं करे, बाबू तक के लाज नैं करै छै.....

ठिक्के में धुरखेली बाबा कहै छै, “एकदम्मे लाज-बीज नैं । होली के दिन ते सब बेशरम होय जाय छै—बुढ़वो सिनी । मतरकि बड़ो के सम्मुख बूढ़ो के बात चली जाय छै, छौड़ा सिनी लुग मुश्किल छै । पछियारी टोला में भीमसिंह नैं ढोलक पर थाप देलकै—धिन्नक धिन, धिन्नक धिन, धिन्नक धिन.....

कि हुन्ने दुर्गा-थानो में शनिचराहैं ढोलक पर आपनो हाथ फेरना शुरू करलकै,

धिन्नक धिन, धिन्नक धिन, धिन राम लिखो.....

सुमिरौं आज गणेश ठाकुर पोथी में पहिलें लिखौं

राम लिखौं लक्ष्मण लिखौं लिखौं सिया एक बार

ठाकुर पोथी में पहलें लिखौं.....

धिन्नक धिन, धिन्नक धिन, धिन्नक धिन

पछियारी टोला के भीम सिंह के जोड़ नवयुवक पार्टी में खाली विधाता आरू शनिचरें दिऐं पारे । नैं ते केकरो मजाल कि भीमसिंह के सामना में कोय ठहरी जाय । एक होली सें जादा नैं चलै छै ढोलक—भीमसिंह के चटकन छेकै, कोय दूसरा के नैं आरू फेनू भीमो के लड़ाय ते भोरम भोर ।

बेरी-बेरी बरजौं पियवा सँवरका

के तिरया जानू ताक तिना तिन

धिन्नक धिन, धिन्नक धिन

ढोलक पर भीमसिंह के थाप आरो वै थापो पर चमरू पासवान के कंठ के जोड़ नैं छै ।

.....पर है के टाड़्डी दिशो सें आवी रहलो छै ?

अरे मसूद्दी मियां छेकै, की रँ झुमलो गैले आवी रहलो छै,

चैत, बैशाख मासे सुतलां ऐंगनमा

पियवा पापी मारै छै रे नजरिया

हम्में तोरा पूछियौ मालिन के बेटिया

कैसे-कैसे जोड़लें रे पीरितया

मसूद्दी मियां के साथो में लागलो बमभोला बंगाली मुँहो सें अलसैलो आवज निकलै छै,

धिन, धिन, धिन, धिन तिका

धिन, धिन, धिन, धिन तिका
मसूद्दी मियां बमभोला के नैं छोड़ें पारे ।
“बानर वास्तें ते बरनिये नी पद्मनी । हा, हा, हा, हा, बुरा नैं मानों
होली छै”

“ई बमभोला के नी देखो, ठेपी भर पीले नै पीले होतै, की रँ मस्त
छै ।”

“खोटा वास्तें भूते हेलाव । हा, हा, हा, हा, बुरा नैं मानों होली छै ।”
मसूद्दी मियां आरू बमभोला बंगाली के समझें में देर नैं लागलै, “छौड़ा
सिनी भांग-गांजा चढ़ाय के बैठलो होतै, गीत-नाद की करतै । खाली होहारी
.....” मसूद्दी मियां आँख झोली के देखै छै ।

बनारसी मंडल नैं बमभोला बंगाली दिश हाथ उठाय के गाना शुरुवे
करलें छेलै कि धीरेनो के कण्ठ गनगनाय उठलै,

कहौ जी सारा, रा, रा
हिरिया के बेटी किरिया बैठल दुकान पर
गला में शोभै शिकरी, मोती छै कान पर
एक नजर जे चल गेलै पनमा दुकान पर
मसूद्दी काका मरी गेलै किरिया के जान पर
फिर बोल-बोल कि सारा, रा, रा
कि रामलोचनौं नहला पर दहला छोड़तें कहलकै,
हुक्का बरै गुड़गुड़ चिलम के मजा ले
छोटी रानी गिर गेलै उठाय के चुम्मा ले
फिर बोल-बोल कि सारा, रा, रा

मसूद्दी मियां के होली के यहें सब अच्छा नैं लागै छै । बूढ़ों-पुरानों
के लाज-लिहाज नैं । लाज-लिहाज ते छै, मजकि मसूद्दी मियां के देखलैं गाँव
के छौड़ा सिनी में एकदम्में उमंग भरी जाय छै । ई बुढ़ारी में तेसरो बीहा करने
छै । पूछला पर कहै छै, “जबे ताय लहू, तबे ताय बहू”.....है रँ होहारी देखी
के मसूद्दी मियां घूमी के कहै छै, “ते यहाँ की करी रहलो छैं, आपनों-आपनों
ससुराल भागें, फेनू गोछियाय के चूमे.....होरी की गैतै, खाली होहारी, अभी
होली गावै छेलै आरू अभी जोगीरा-होरी हो.....

होहारी में मसूद्दी मियां के आवाज एकदम दबी के रही जाय छै आरू
ऊ बमभोला बंगाली साथें पछियारी बासा दिश चली दै छै, गैने-गैने-चैत-बैशाख
मासे सुतलां ऐंगनमा.....

एक साल बाद मीरा बहु दी के नाम दीपा रो चिट्ठी
बहु दी

८-६

अन्धड़, बतास-विन्डोवों आरू प्रलय के झेलतें-झेलतें मनार केन्हो शिल होय गेलो छै-जड़ो तक में कटियो टा जान नैं छै, जेकरो रोआँ-रोआँ तक के रस सूखी गेलो छै—बस होन्हे कुछ है पाँच सालो में बनी के रही गेलो छी । बस तोरासिनी के स्मृतिये हमरो पास पापहरणी-सीताकुण्ड आरू आकाश गंगा नाखी बची गेलो छै, नैं ते आरू की ।

होली के बादे हमरा गंगा दा के चिट्ठी मिललो छेलै । होली के रात गाँमो पर बज्जड़ खसी गेलो छेलै । जेना पाइप लगाय के कोय देहो सें खून खीची लेले रहे, एकदम सुन्न होय गेलो छेलै हमरो हाथ, गोड़, माथो..... .जंगल-पानी सें उजड़ला के बादो मनार खाड़ी छै नी, बस ओन्है के खाड़ो छी, नैं कोय शीतल बतास के झोंका, नैं कोय चिड़िया चुनमुन के गीत—ठीक मनारो पर खड़ा कलयुग के मूरत, जेकरा पर सब ऐतें-जैतें लोग पत्थर फेंकते रहे—होन्हें के हम्मं । हमरा आपनो चिन्ता नैं, सोचै छियै ते गामो बारे में—कहाँ होतै सोराजी, शनिच्चर दा, कहाँ होतै गोपी का, कहाँ होतै आरो फूल चौधरी का । वकील काकां समझैले छेलै ते गलत नैं समझैले छेलै । हम्मूं जानै छियै कि गछकट्ठी में नौ साल तांय के सजा हुए पारे । यै में खाली अपराधिये के नैं, अपराधी के साथ दै वालाहौ के ओन्हें सजा छै—क्रिमिनल कॉन्सपेरेसी कानून रो अधीन दोनों के एक्के सजा । वहू में खून ! सीधे आई० पी० सी० तीन सौ दू के मामला—आजीवन जेल नैं ते फाँसी । अच्छा करलकै कि वकील का के कहला पर हुनकासिनी गाँव छोड़ी देले छेलै, मतरकि अभी तांय की हुनका सिनी गामो सें बाहरे छोट ? गंगा दा के चिट्ठी सें जे कुछू मालूम होलो छेलै, ओकरा सें यह पता चललै कि पुलिस दिन-रात गामो में रौन करते रहै छै—रात-बेरात कखनियो केकरो घरो के छान-बीन करे लागै छै । घरो में एकाध बूढ़ी जोर-जनानी छोड़ी के सब हिन्ने-हुन्ने नुकैले फुरै छै । केन्हो भांय-भांय करते होतै गाँव, ऊ स्थिति देखी के ते ठिक्के नानी हदासे सें मरी जैतियै, अच्छे करलकै कि गंगा दा रातो-रात आपनो नानी के गाड़ी पर बैठाय के बड़का मामा कन छोड़ी ऐलो छेलै । पुलिस सें ई शंका में कि शनिच्चर दा, दीवा दा आरू प्रफुल्ल दा हमरे घरो में नुकैले छै, घरो के सब्भे द्वार-खिड़की तोड़ी-उखाड़ी के राखी देने छै, उत्तरवारी भीतो तोड़ी देने छै, ताकि ऐंगन उदामो होय जाय आरू ऐंगन छिपै के

अड़्डा नैं बने पारे, यहू चिट्ठिये सें जानलां । की-की गामो में होय गेलै । चिट्ठिये सें जानलियै कि स्थिति यहाँ तांय आवी गेलो छै कि गाँव के सीमाना पर कहुँ सें कोय चोरबत्ती के रोशनी दिखाय छै ते पुलिस के आशंका सें जोर-जनानी आपनो-आपनो मरद के पिछवारी दिश सें बँसबिट्टी आरू बिहियारी दिश भगाय दै छै । पुलिस के की, शंकाहौ पर पकड़ी के जेल भेजी दिऐ पारे । फेनू दौड़ौ पैसा-पोटली लै के साल-दू-साल । जानलियै कि गामो में लोगें शनिच्चर दा, जोगियो दा, खुशियो दा के बारे में कुच्छू बोलै लें नैं चाहै छै । लाख पुछलौ पर कोय केकरौ कुच्छू नैं बतावै छै—गोबध लागी गेलो रहें सबके । की समय छेलै, की समय होय गेलो छै । ई बात खाली हमरहै नैं, गाँव में हेनो के छै, जेकरा ई विश्वास नैं होतै कि ई घटना में शनिच्चर दा, गोपी का आरनी के केन्हौ के हाथ नैं हुऐ पारे, आबे इखनी जान बचाय लें जत्ते चुप होय जाय, मजकि बहु दी, है चुप्पी गाँव के शांति के कारण नैं बने पारे । डर आरो भय सें जबे आदमी शांत होय छै, तबे समाज आरू टोला के अशांति सौगुना बढ़ी जाय छै, ई लोग केन्हें भूली गेलो छै ।

बिना विधाता के घोर की । आखिर करवो की करतियै दादी, काकी, काका आरनी, जानलियै सब्बे गामो के छोड़ी बाँका में रहे लागलो छै—डीह-डाबर सबटा के मोह-माह छोड़ी के । अच्छा करी रहलो छै कि कमरूद्दीन दा, रवि दा, एकबाली आरो शिवचरण काका—सब मिली के शनिच्चर दा आरू गोपी का आरनी के निर्दोष सिद्ध करै लेली कानूनी दाँव-पेंच के सहारा लै रहलो छै—दिन के दिन नैं समझी रहलो छै, आरू नैं रात के रात । जमानत मिलियो गेलो होतै, ते केस खतम होय में, पाँच-दस बरस लगिये जैतै । जे न्याय के स्थिति छै..... तबे वकील काका साथ छै ते गाँव भरी के भरोसा छै—कोय शंको नैं होना चाहियो । जों दू-चार मनो के टुटला सें हजार-लाख टुटलो मौन जुटी जाय ते दीपा के विधि रो सबसें बड़ो विपद भी स्वीकार छै । होना के आबे एकरा सें बढ़ी के आरू विपद विधि के पास की होतै, हमरा दै लें । एक-न-एक-दिन गाँव के सुख ते लौटवे करतै सब लौटी ऐतै—शनिच्चर दा, गोपी का, चौधरी का.....मतरकि हमरो विधाताहौ घुरी ऐतै की ?गामो में पछियारी टोला के एकदम किनारी में बसली बेलडीहा वाली काकी के वहे गीत आयकल रही-रही मनो में गूँजे लागै छै,

सभै के बिहाउल हो बाबा, मगहा-मुंगेर
हमरा बिहाउल गंगा पार हे
सावन-भदौवा के उमड़ल नदिया

कओन विधि उतरव पार हे
सिकिया जे चीरी-चीरी बेड़वा बनैवे
ओही रे बेड़वा उतरव गंगा पार हे
टूटी गेलै बड़वा छिलकी गेलै बान्हन
डूवी रे मरलां बीच धार हे ।

हों, हम्में पार नैं उतरे पारलौं, बान्हन टूटी गेलै आरो हम्में बीच धार में डूबी गेलां । विधाता नैं छै ते लागै छै कि हम्में धरती रो सबसैं बड़ो अपशकुन बनी के खाड़ो छी । सपना गुजरै के पहिलें यै में भाँगटो लागी गेलै, मजकि हम्में दोष केकरा दिऐ पारौं । जत्ते समय, ओतन्हें विधाताहौ । शनिच्चर दां रोकै रहलो छेलै, ते विधाता के रुकी जाना चाहियो.....आखिर एक गाछ कटतें-न-कटतें सौंसे गाँव लै के शनिच्चर दा पहुँचिये ते गेलो छेलै, मतरकि एकरा सें की, तब तांय एक गाछ भले न कटलो रहे, सौंसें गाँव के भाग्य जरूरे कटी चुकलो छेलै.....भाग्य नैं कटी गेलो होतियै ते हेने गाँव में भाँय-भाँय होतियै । गंगा दा लिखले छेलै कि विधाता के बेजान देह देखी के शनिच्चर दा केन्हो बच्चा नाँखि बिलखी-बिलखी के कानले छेलै । कभी-कभी सोचै छियै कि विधाता के अधूरा सपना पूरा करै लेली हमरा गाँव लौटी जाना चाहियो, मजकि जे खुद्दे भोरको सपना रँ बिखरी गेलो छै, ऊ केकरो सपना के की सड़ियैतै । हमरो सौंसे जिनगी जेना एक बड़का भाँगटो, चाँदनी रात में जेना प्रेत-छाया, भुताहा हवेली में जेना कोय जनानी के कपसवो ।

हममें रेगिस्तान के ई देश में कत्ते असकल्ली होय गेलो छी—प्रोफेसर साहब आरू दीदी सब छात्र-छात्रा सिनी साथें हमरो तबीयत ठीक होतैं लौटी गेलो छेलै । लाख कहलो पर हममें महीना भरी बाद ही लौटे के बहाना करी देले छेलियै, चिट्ठी के सब्भे बात छुपाय लेले छेलियै । की करतियै देश लौटी के । कै दाफी मोन होलो छै कि यहीं सें राते-रात देश के सीमाना लाँधी के परदेश में चल्तो जाँव, जहाँ सें ई अपराध लेली शुरू होय छै—कैद रो अनन्त यातना.की करियै, कहाँ जइयै, डूबी मरियै ? कोय झील में, कोय बाबड़ी में, कोय कुइयाँ में ? की करियै ? हम्मू जानै छियै कि आयको दुनियाँ में नारी पचास साल पहिले वाली नारी नाँखि नैं रही गेलो छै, कि पुरुष बिना औरत जीयै नैं पारे, यहू नैं कि बिना पुरुष के औरत के पैठो नैं छै, तहियो मोन ते अभियो होन्हे छै, जेहनो पचास-हजार साल पहिने छेलै । ओकरो दुनियाँ में एत्ते उथल-पुथल के बादो कोय नया उथल-पुथल नैं होले—तभिये ते हमरो मोन विधाता लेली एतना बेकल होय जाय छै । बहु दी, होना के तोरा सें ई बात छिपलो ते नैं छेलौं,

छिपलौ रहौ नैं पारै छेलै, तहियो तोरा सें हम्मैं ई बात छिपैलै राखलियौ कि हम्मैं विधाता के कत्तै मनो सें चाहै छेलियै, आभियो मानै छियै ।

बस यही ले आपने के एत्ते निबल पावै छियै, सब तरह सें मजबूत होला के बादो । आय हम्मैं जो न रेगिस्तानी इलाका में आपनो पचासो नया साथी साथें काम करी रहलौ छियै, ऊ रेगिस्तान में खेजड़ी के दसो हजार छोटों-छोटों गाछ लहलहावें लागलौ छै—खेजड़ी यानी रेगिस्तान लेली कल्पवृक्ष—बड़ौ होला पर जेकरो छाल दवाय बनी जैतै, फरी—गरीबो लेली तियौन, पत्ता—मवेशी लेली चारा, टहनी—जलावन, जेकरो छाया ही पंथी वास्तें स्वर्गधामे नैं बनतै, ई छाया नीचें खेतियो होन्हे खूब हरियैतै । मजकि हमरो जिनगी के है पसरलौ रेगिस्तान में की आबे कभियो कोय कल्पवृक्ष उगे पारतै ! हम्मैं केकरो लेली कल्पवृक्ष नैं बने पारलियै ।

हमरा याद छै, तोहें हमरा देखी-देखी कैन्हें बरवक्ते ई गीत गावी उठै छेलौ,

बाबा के ऐंगना अलरी-झलरी
छै चानन घन गाछ हे—
ताही तर अहे बाबा पलंग बिछावल
बही गेल पुरबा बतास हे—

आय वहे गीत ई खेजड़ी वनो के बीच जेना हठाते गुंजे लागै छै । निंदवासलो हम्मैं चिहाय के चारो दिश देखै छियै, काँही ते कोय नैं छै, बस लागै छै—खेजड़ी-वन के चारो दिशो सें उठी-उठी के खाली गीत हमरा लुग आवी रहलौ छै,

बही गेलै पुरबा, बही गेल पछिया
बही गेल रंग बतास हे—
आइ रे, माइ रे टोला-परोसन
बाबा के देहू जगाय हे ।

हम्मैं जानै छियै कि आबे हमरो वास्तें कोय नैं जागतै । पाँच साल में पचासो ठियाँ आवी-जाय चुकलौ छियै, बिना कुच्छू केकरहौ कोय खबर देलें-लेलें । आबे केकरहौ नैं जगैय्यौ बहु दी, कैन्हें कि अबकी दाफी, यही राती बिना कुछ सोचल्लैं, जानल्लैं हमरा चली देना छै वीजू वन—खाको जंगल, देखना छै कि ऊ हमरो जिनगियो सें की ज्यादा भयावह छै, ज्यादा दारुण । तोरो ननद

दीपा

